

YA KELE NA MUNTU AWA YINA LENDA PELISA MWINDA



Matondo na nge mpangi ya bakala. (Bika yandi kuyimba.)
Beto kulumusa bayintu ya beto ntangu yayi.

Tata ya beto ya Mazulu, beto me tonda Nge na suka yayi samu na bumbote mpe kyadi ya Nge, na kupesaka beto bweso ya kuvukana dyaka awa kintwadi, kilumbu mosi na lweka yayi ya Seko ya nene, samu na kusambila Yina ya luzolo, Mfumu Yesu Klisto. Beto ke tonda Nge samu ti Yandi kwizaka na ntoto na—na kuvulusa beto na luzingu ya disumu, mpe samu na kupesa beto difwa yayi ya nene yina beto me kuzwa na nzila ya ludedomo ya Yandi. Mpe mutindu beto, na suka yayi, kele awa mutindu bamvwala ya Yandi, samu—samu na kukabula Dimpa yayi ya Luzingu na dibuundu yayi yina ke na kuingila, ti Mpeve-Santu kutwadisa konso Ndinga mpe kutula yawu na kati ya bantima ya bantu, kaka mutindu beto kele na nsatu. Beto me lomba yayi na Nkumbu ya Yesu. Amen.

Beno lenda vwanda.

² Ya kieleka mu ke tala yayi, mpe bweso ya nene, mbala mosi dyaka na suka yayi, na kuvwanda awa na beno. Beno lemvokila na yina beto kele na bakiti mingi ve mutindu beto zolaka kuzwa, samu na kukeba bantu. Tabernacle ya beto kele nene mingi ve. Mpe beto ke vutula matondo mingi na kuvwanda awa, na ntangu ya bakonze yayi, na—na kukatukaka yinzo ya beto na...na Tucson. Mpe ntangu vwandaka mwa ngolo, kasi beto vwandaka na kiese na kuvwanda awa mpe kuzwa lukutakanu.

Ntangu yayi, mu zola kusamuna ti na nkokila yayi ya ke vwanda na lukutakanu ya kubeluka ya nzutu na nkokila yayi, to bisambu ya bambevo. Mpe mu vwanda me tuba kaka na Billy na ntangu yayi. Yandi tubaka, “Mbote, yinki nge ke sala?”

³ Mu tubaka, “Mbote, mu banza ti nge fwana kabula mwa bakalati na nkokila yayi, pene ya ngunga sambanu na ndambu, samu ti bantu vwanda ve...”

Mpe, beno me mona, ya kele ya kifuluka mingi na kati awa, samu beto lenda zaba kaka mutindu ya kunata bawu, mosi na mosi, na yawu ba lendaka bokila beno na numelo ya kalati ya beno, mpe ya ke vwanda ve na kifuluka mosi. Beto lenda bokila kaka bawu, mosi na mosi, kubika bawu kuluta na ndonga na yina beto ke sambila samu na bawu.

⁴ Na yawu, beno, kana beno kele ya kubela, to beno kele na baya beno ya luzolo ke na kubela, mpe beno zola kunata bawu,

beno kwiza na ngunga pene ya sambanu na ndambu, kima ya mutindu yina, ngunga ya sambwadi, mpe beno kuzwa kalati ya bisambu. Yandi ke vwanda na kielo, to ata mutindu yina yandi ke kabula yawu, na yina beno ke kota.

⁵ Mpe, na yina, mu banza ti yayi ke vwanda na kutala mbala ya nsuka mu ke vwanda awa, samu na mwa ntangu fioti, samu ti mu me kuma na manaka mosi ya kilo ntangu yayi. Awa, mpe kaka na kati ya Etats-Unis tii ntama, na printemps yayi. Na yawu, beto, mu banza beto ke vutuka dyaka fioti na mantwala ya été yayi.

Kana Mfumu kuzola, mu ke zola, kana beto kuzwa kisika awa kana ya kele na klime. Mu ke lomba na Billy. Mu ke zola kutubila na zulu ya Bampungu Sambwadi yina, kuzwa ki- . . . lukutakanu awa na zulu ya Bampungu Sambwadi, kana—kana Mfumu kuzola. Samu ti, yina, Bansungi Sambwadi ya Dibundu, mpe Bidimbu Sambwadi, mpe ntangu yayi Bampungu Sambwadi. Mpe beto lendaka kuzwa mwa ntangu mutindu na Ngonda ya sambanu kisika bantu kele na bakonze ya bawu, kupesa bawu ntangu samu bawu kwiza.

⁶ Mpe mu kele na kiese na kumona Mpangi Shepherd awa na suka yayi, yina me katuka na lupitalu. Mu kwendaka kumona yandi kilumbu yankaka yina. Mpe Mpangi ya kento Shepherd, mu lendaka ve na kubokila nge mazono. Ndosi yina nge tindaka munu vwandaka kieleka, kieleka mbote. Nge monaka, mutindu ya vwandaka, Klisto na—na zulu ya . . . na—na mazulu, na zulu ya mpunda ya mpembe yayi, kasi dyaka ya kukanga, beno me mona. Kasi, dyaka, ntete yawu kuzimbana, dibuta ya nge nyonso lendaka na kumona yawu. Na yina, lutendulu ya ndosi, kele ti dibuta ya nge me mona movema ya Yandi ya bilumbu yayi ya nsuka ntete yawu kuluta, yina Yawu vwandaka. Na yawu, ya kele, yina vwandaka kieleka ya kimpeve, mpe lusakumunu ya mbote mingi samu na beno, samu na dibuta ya nge. Dibuta yina me basika na mwa bampasi ya nene, samu na kukuma kisika bawu kele bubu yayi.

⁷ Mpe ntangu yayi beto kele na kima mosi, na mwa kiti na lweka ya mawa, na suka yayi. Tuka mu kutanaka awa . . . Mosi ya bankundi ya beto ya ntalu, mpe—mpe ya bayina ke kwizaka na tabernacle yayi, dibuta Coats; yina, beto nionso zola bawu. Bawu me katuka na esete, mpe, to me katuka na bizunga, ya Chicago. Mpe Mpangi ya kento Billie Habib, mpe—mpe mpangi ya yandi ya kento, Armstrong, mpe bana nionso ya bakento. Bawu . . . Mu banza ti ba vwandaka ba-Nazaréen na ntama, mpe me kwiza na Mfumu, mpe bawu kele bankundi ya beto ya ntalu.

Mpe Mpangi ya bakala mpe Mpangi ya kento Coats, tata mpe mama ya bawu, vwandaka na nzila na yinzo kilumbu yankaka yina, bawu katuka Wesete, mpe muntu mosi syelumukaka na nzila mpe—mpe kufwaka na mbla mosi, Mpangi ya kento Coats. Mpe—mpe na ntangu bawu bokilaka munu kuna, na—na Tucson,

mpe mu kuwaka yawu, Mu vwandaka kaka ya kuvwanda kuna na bwate ya babombo yina yandi vwanda me sala kaka samu na munu, mu vwandaka ya kuvwand na mesa. Mpe beno zaba ve mutindu ya salaka munu kuwa. Kasi mu—mu banza ti, matondo na Mfumu na suka yayi, yandi vwandaka na nsatu ya kutala mpasi ve. Yandi vwanda kuma kiboba, mpe yandi vwandaka na nsatu ya kutala mpasi ve. Mpe yandi kwendaka na Yinzo samu na kuvwanda na Nzambi.

⁸ Mu vwanda banza kaka, mpe vwanda solula na bana ya yandi zole ya bakento, kaka ntangu yayi, na kati ya kivinga kuna. Mpangi Coats kele awa na suka yayi; yandi kele na bawanzio ya kubukana. Mpe mu bokilaka yandi na lupitalu mpe kisika yandi vwandaka na lupitalu, kuna na Missouri, mpe bawanzio ya yandi ya kubukana mpe nionso, kasi ya kieleka yandi vwandaka na kibakala, Muklisto ya kieleka; na kuzabaka ti mwa ntinu ya yandi ya kento me kufwa ve, yandi kele moyo samu na ntangu nionso, na Klisto, mpe ya ke vwanda na ntangu ya kuvukana.

⁹ Job tubaka, kilumbu mosi, “Oh, ti Nge ke bumba munu na ntoni, mpe ke bumba munu na kisika ya kinsweki, tii nganzi ya Nge ke luta.”

¹⁰ Beno me talaka ntete Nzambi, na yinza, kusala kima mutindu mosi? Mutindu maza ya yinti yina kele na kati ya bayinti awa, ba me simba yawu na makasa; mpe ntete hiver kukwiza, nganzi yina ke mwanganaka na zulu ya ntoto. . . . Beno me mona, na ntangu mosi ntoto vwandaka ve na hiver. Mpe na Millenium ya ke vwanda dyaka ve na ba-hiver, beno me mona. Na yawu ya kele nganzi na zulu ya ntoto. Na yina ntangu ya ke salamaka. . . . Beno me mona, ntete nganzi kwiza, Nzambi na lemvo ya Yandi ke tindaka maza ya yinti yina mbala mosi na yisi na . . . na yisi ya ntoto, na kati ya bansimbulu ya yinti yina, mpe ke bumba yawu kuna tii nganzi ya hiver ke luta, na manima ke vumbula yawu dyaka, beno me mona, na printemps.

“Oh, ti Nge ke bumba munu na kati ya ntoni, mpe ke bumba munu na kisika ya kinsweki, tii nganzi ya Nge ke luta.” Ya kele yina Yandi me sala samu na mpangi ya beto ya kento. Ya kele yina Yandi ke salaka samu na Muklisto nionso.

¹¹ Mpangi Coats, Nzambi kusakumuna nge. Mu kele na kyese mingi na kuzaba yawu, ti Kidimbu ya Nzambi ke simba na ngunga ya mpasi. Mu zaba na yina yandi ke na kulutilaka, samu ti mu lutilaka na kima mosi ya mutindu yina, bamvula me luta. Kasi mu kele. . . . Mosi na mosi beto fwana sabuka nzadi ya nene yayi; mpe, mu, mpe ya ke vwanda ntangu ya munu, mosi ya bilumbu yayi; mpe ntangu ya beno, mosi ya bilumbu yayi. Kasi mutindu David tubaka, “Mu ke vwanda na boma ya yimbi ve; samu ti Nge kele na munu. Houlette ya Nge mpe nkawa ya Nge ke pesa munu ngolo.”

¹² Ntangu yayi samu na kubambuka moyo na Mpangi ya kento Coats, mpangi ya beto ya ntalu ya kento yina me kwenda na Nzambi. Munu. . . Mutindu lubambuku ya fioti samu na yandi, na suka yayi, mu zola ti dibuundu kutelema kaka mwa ntangu fioti.

Ti beto kulumusa bayintu ya beto mpe beto banza na yandi yina mbala mosi, na mwa bilumbu me luta, kotaka na—na tabernacle yayi, yina vwandaka kota mpe kubasika na kati-kati ya beto, me pesaka beto mbote, Muklisto mosi ya luzolo, kele ntangu yayi na kisika yina Mfumu bikaka munu kumona ntama mingi ve, ntwenya mosi ya kento dyaka, yina ke vingila na dibuta ya yandi na kukwiza.

¹³ Tata ya beto ya Mazulu, beto ke tonda Nge samu na kubambuka moyo ya Mpangi ya kento Coats. Wapi mpangi ya kento ya ntalu, ya luzolo! Mpe awa ke kwiza ntangu yina ntangu beto ke zinga ntangu ya beto ya luzingu, yina ba zengaka samu na beto, beto fwana sabuka nzadi. Beto ke tonda Nge samu ti yandi vwandaka na nsatu ya kutala mpasi ve. Ya zolaka vwanda ve na kima mosi ya yimbi na yandi awa, ti yandi zolaka tala mpasi. Yandi kwendaka kaka mbala mosi na maboko ya Nzambi, na mwa ntangu fioti.

¹⁴ Bakala ya yandi, na bana ya yandi, kele awa na suka yayi, Mfumu, kaka na kisika ya bawu ya kosalu. Wapi mutindu beto ke tonda Nge samu na lukwikilu ya ngolo yina! “Lukwikilu ya batata ya beto ke zinga dyaka, na kisika ya baboloko, tiya, mpe mbele.” Beto ke tonda Nge samu na bima nionso yayi.

¹⁵ Pesa kupema na moyo ya yandi ya ntalu, Mfumu. Yandi vwandaka mpangi ya beto ya kento. Mawa, maza ya meso ke kubwa na kati ya ntima ya beto, samu yandi kele ve, kasi kiese ke basika na maza ya meso yina ke kubwa, ti beto zaba na kivuvu ya Ndinga ya Nge ti yandi ke zinga na luzingu yina ke kufwaka ve yina lendaka kufwa ata mbala mosi ve. Mpe ya ke vwanda dyaka ve na dikubu kisika yandi kele ntangu yayi, na kuingilaka kaka na bayina ke kwiza na ntwala na kuvukana na yandi.

¹⁶ Sakumuna Mpangi Coats, mpe sakumuna bana ya bawu ya bakento mpe dibuta ya yandi, Mfumu, mpe bayina nionso ya luzolo, mpe bayina nionso ke zolaka yandi. Mpe kilumbu mosi, Tata, beto kele na kivuvu na kukutana na yandi na zulu kuna na Mazulu yina ya nene, kisika kimbevo, mawa, to lufwa kele ve. Tii na ntangu yina, bumba beto nionso na mavimpi ya mbote mpe mbote, na kusadila Nge, mpe na kuingilaka kilumbu yina. Na Nkumbu ya Yesu Klisto beto ke lomba yawu. Amen.

¹⁷ Ti Mpeve-Santu ya nene yina ke salaka na beto awa na tabernacle, na kumonisaka Ndinga ya Yandi, ti Yandi kupesa kupema na moyo ya yandi ya ngolo na ngemba tii beto ke kutana na yandi.

18 Ntangu yayi ya kele tiya na kati awa na suka yayi, samu na banzutu, beno zaba, mingi ke na kukatuka na tiya ya nzutu ya bantu.

19 Ntangu yayi, beto ke zola kupesa nsamunu ntangu yayi. Bambala mingi balukutakanu ya beto awa, ke vwandaka yinda, ya—ya suka, ya kele samu. . . Ya kele kieleka ya kulunga ve na kuzwa lukutakanu ya yinda, samu ti, ngunga, ngunga mosi na ndambu, to bantangu yankaka bangunga zole. Kasi yina mu ke na kusalaka, mu ke na kubakaka na babande awa, beno me mona, mpe babande yayi ke kwendaka bisika nionso na yinza. Mpe ya kele na yina mu. . . beto ke vukanaka, ngunga ya yinda mingi, na suka, ya kele—ya kele samu ti mu ke kwizaka awa samu na kubaka na babande yayi. Ya kele samu. . . Mu. . . ya kele. . . Beno me mona, beno lenda mona na kati ya kivinga kuna, babande yina ba me—ba me sala. Ntangu yayi. . . Mpe ya ke kwendaka bisika nionso na yinza.

20 Ntangu yayi, ntama ve, kana Mfumu kuzola, na yayi ke na kwiza, kaka ntangu mu ke katuka awa. . . Mu ke kwenda, kana Mfumu kuzola, mbasi na suka, na ntangu mosi, na kuvutuka na Arizona, samu ti mu kele na lukutakanu yina ke na kwiza. Mpe na yina ya kele kaka nzila nionso na Sude. Mpe beno bantu ya sude na Georgie, mpe na Mississippi, mpe na Texas, mpe na Alabama, beto ke na kwiza kuna, nzila nionso tii na Floride, ntama mingi ve.

21 Na kukwendaka awa na Phoenix, na manima na Californie, mpe mbala mosi kuvutuka na Dallas, mpe—mpe mu banza kusikama na San Antonio, mu banza ya kele, mpe kuvutuka dyaka na Alabama, mpe na Floride, mpe kuluta kuna. Na yawu beto ke mona beno bantu kuna, kana Mfumu kuzola, ntama mingi ve.

22 Mpe na yina beno landila na kusambila samu na beto, mpe beto ke zabisa beno ntangu, kana beto. . . Mfumu kutula na zulu ya ntima ya beto ntangu yayi na kusimbisa mwa bilumbu fioti awa, na été yayi yina me na kwiza.

23 Mu vwandaka na nkonga ya balukutakanu ya kukubika. Mpe mingi ya beno na New York zaba ntangu vision kwizaka, yina tubaka ti balukutakanu yina na yinsi ya Scandinave. . . Beno ke bambuka moyo na kukubika ya yawu kuna? Mpe kuna, na yina mu vwandaka na New York, vision kwizaka, ti mosi na mosi ya balukutakanu yina ke salama ve, samu na dyambu mosi. Mpe mu ke bambuka moyo ti mu tubaka na bayankaka ya beno awa, ntangu beto vwandaka na New York. Ya kele kaka ya kieleka yina salamaka, samu ti bawu nionso zolaka kilumbu mosi mpe lendaka ve na kuzwa yinzo yina.

Na yawu, kuna, yina lendaka bika mwa kisika mosi kuna na Ngonda ya sambanu. Ya lendaka vwanda luzolo ya Mfumu, Mu vwandaka banza, na kutala kuvutuka samu na Bampungi

yina kaka awa, ntete ti ya vwanda lutale. Beno me mona? Na yawu beto zaba ti mambu nionso ke tambula mbote. Na yawu yina vwandaka na ntima ya munu, na yawu ya lendaka vwanda yina Yandi zola ti beto sala.

²⁴ Ntangu yayi mu ke mona ti beno ke sobisa bakiti mosi na yankaka, mpe—mpe kuna na bakulwale, mpe nionso yina. Beto zola kana beto vwandaka na bisika mingi ya kuvwanda.

Mpe ntangu yayi ntangu beto ke kuzwa Bampungu yina, yina kele . . . beto zole kuzwa gymnaze ya lukolo ya nene. Mu banza ti ya ke vwandisa bantu bankama makumi tanu na tanu, kuna beto ke kuzwa siansi, mpe, samu muntu nionso kuzwa kiti, mpe kuvwanda mpe kuwa na makelele ve na yina beto ke—na yina beto ke longa.

²⁵ To, yayi, Bampungu, ya kele kieleka, kieleka mbote. Mu vwandaka tala na yawu kilumbu yankaka yina. Beno me mona, na Kidimbu ya Sambanu, Bampungu Sambwadi nionso ke wakana mbote kuna na Kidimbu ya Sambanu yina, beno me mona, kaka ntete Kidimbu ya Sambwadi kuzibula Nkwizulu ya Klisto.

²⁶ Mpe, na nkokila yayi, mu kele na Nsangu mosi ya mfunu mingi yina mu zola kuzonzila na ntwala ya lukutakanu ya bisambu. Mpe kana beno kele awa, mpe beno ke vwanda kuna, mbote, beto ke meka, kana ya lendaka banda kaka mwa ntangu fioti na ntwala, samu ti ya ke vwanda na ndonga ya bisambu. Mu ke longa ntangu ya yinda ve, kasi ya kele na kima yina mu vwanda zola kutuba na dibuundu, ya me kuma mwa bilumbu, mpe mu zolaka na kutula kuzonzila beno na . . . mutindu bima ke na kutambulaka na ntangu yayi, mpe kaka kisika beto me telama, mpe landila luzabu ya munu ya kulutula na Masonuku.

²⁷ Ntangu yayi, mu zola ti beno baka na munu na suka yayi, kana beno zola kusonika to beno zola kusonika kisika beto ke tanga, na Buku ya Esaïe. Mpe mu zola kutanga na Esaïe, kapu 42 ya Esaïe.

²⁸ Beto kele na kyese mingi na suka yayi, mpe, na kuzwa Mpangi Dauch yina kele ya kuvwanda na beto awa. Na yina beno ke na kubalula . . . Beno zaba, ba vwandaka banza ti yandi zolaka zinga dyaka ve, awa na Shreveport kilumbu yankaka yina. Mpe ya kieleka yandi kele na lukwikilu. Yinga, tata, yandi me mata mbala mosi me basika na yawu; Mfumu ke na kulandila kaka na kusakumuna yandi, yinga. Beno me mona, Mpangi ya bakala Dauch kele na bamvula makumi yivwa na mosi, mpe kuzwaka kulemba ya muvimba ya ntima; mpe ntima kangamaka, na zulu ya yawu. Mpe dokotolo yina kaka tubaka ti bawu monaka ve ti ya kele na mutindu mosi samu na yandi na kuzinga. Mpangi Dauch ke na kuzingaka, mpe dokotolo yina me kufwa. Beno me mona? Samu ti, yandi . . . Beno me mona, Mpangi Dauch kele ya kuvwanda awa.

29 Mpe na yina, muntu ya bamvula makumi yivwa na mosi, na ntima ya kulemba mpe na ntima ya kukangama. Mpe kuna, ntangu mu vwandaka mata kuna, mu monaka yandi kukulumuka bala-bala; mu monaka yandi na kati ya dibuundu. Mpe mu kwendaka mpe tubaka na yandi, na yisi ya tenta ya oxygène, “Na Nkumbu ya Mfumu, mu ke pesa nge mbote na . . . Mu ke mona dyaka nge na dibuundu, mpe ke pesa nge mbote na bala-bala.”

Lukutakanu yina landaka, awa yandi vwandaka, yandi vwandaka ya kuvwanda kaka awa na manima na kati ya dibuundu. Mpe mu kwendaka kuna na Louisville, kisika beto vwanda kudyaka na Blue Boar kuna, samu na kudya, mpe kaka na yina mu basikaka na ditoma ya munu, mu me banda na kumata bala-bala, awa ke kwiza Mpangi Dauch yina vwanda kululumuka bala-bala. Kuna ya vwandaka, kaka ya kulunga. Mpe mutindu Mfumu me sakumuna yandi!

30 Ntangu yayi beto ke zonzila na kubeluka ya nzutu, na nkokila yayi, mpe bima, mpe mu kele na bima mosi ya kieleka ya mutindu yankaka ya kutuba na beno na nkokila yayi.

31 Kasi ntangu yayi, samu ti mu kuzwa babande ntangu yayi, mpe kukubama na kunamisa yawu, Mu zola kubanda na kutanga na Esaïe kapu 42, mpe nzila ya 1 tii na nzila ya 7. Mpe Matthieu kapu 4, kubanda, kubanza, mu banza, banzila 15 mpe 16.

32 Ntangu yayi, na—na kapu ya 42 ya—ya Esaïe, beto ke tanga.

Tala kisadi ya munu, yina mu ke simbidila; musoolami ya munu, na yandi moyo ya munu ke tala kilengi; Mu me tula mpeve ya munu na zulu ya yandi: yandi ke nata lufundusu na Bantu ya makanda.

Yandi ke boka ve, to ke telama ve, to ke tombula ve ndinga ya yandi na bala-bala.

Dititi ya yinda ya kubeba yandi ke zenga ve, mpe nsinga ya mwinda yandi ke kufwa ve: yandi ke samuna lufundusu na kieleka.

Yandi ke kondwa ve to ke vwanda ya kulemba ve, tii yandi me . . . ke vwandisa lufundusu na ntoto: mpe bisanga ke vingila misiku ya yandi.

Mutindu me tuba . . . MFUMU, yandi yina vangaka mazulu, mpe tandamisaka yawu; yandi yina tandamisaka ntoto, mpe yina ke basikaka na yawu; yandi yina pesaka pema na bantu yina kele na zulu ya yawu, mpe mpeve na bayina ke tambulaka na zulu:

Munu MFUMU me bokila nge samu na ludedomo, mpe ke simba nge na diboko, mpe ke keba nge, mpe ke pesa nge samu na ngwisani na bantu, samu na nsemo ya Bantu ya makanda;

Samu na kuzibula meso ya kufwaka, samu na kubasisa bantu ya boloko na boloko, mpe kubasisa bayina kele ya kuvwanda na kati ya mpimpa ya yinzo ya boloko.

³³ Ntangu yayi na Nsangu ya mbote ya Matthieu, kapu 4, mu zola kutanga kulungisama ya profesi yina Esaie pesaka. Na kapu ya 4 ya Matthieu, mu—mu ke banda na kutanga. Kana ya lenda salama, beto banda na nzila ya 12 na kisika ya nzila ya 15.

Ntangu Yesu kuwaka ti ba tulaka Jean na boloko, yandi kwendaka na Galilee;

. . . bikaka Nazareth, yandi kwizaka mpe vwandaka na Capernaum, yina kele na simu ya mubu, na bandilu ya Zabulon mpe ya Nephthali:

Samu ti ya salama yina zonzaka Esaie profete, na kutubaka,

Beno tala, ntoto ya Zabulon, mpe ntoto ya Nephthali, na lweka ya mubu, na manima ya Jourdain, na Galilee ya muntu ya makanda;

Bantu. . . ya kuvwanda na mpimpa me mona nsemo; mpe na bayina vwandaka na bizunga mpe na bivudi ya nsemo ya lufwa me telama.

Mpe kubanda ntangu yina Yesu bandaka na kulonga, mpe kutuba, Beno balula ntima: samu ti kimfumu ya mazulu me belama.

³⁴ Bika ti Mfumu kubwela balusakumunu ya Yandi na ntangulu ya Ndinga ya Yandi! Mpe ntangu yayi, mwa masonuku ya ngitukulu yina mu me kuwa muntu kuzonza, kutuba yayi, kasi mu zola kubaka yayi mutindu dilongi: *Ya kele Na Muntu Awa Yina Lenda Pelisa Mwindi.* Mpe ntangu yayi beto ke zonzila na dilongi ya nsemo.

³⁵ Yayi ke landila malongi tatu yina beto vwanda me zonzila kaka.

Mosi ya yawu, na Tucson, to na Phoenix, na samu na yinki Yesu kwizaka na nzila ya Bethlehem. Ti, Yandi zolaka vwanda, samu ti Yandi kele Bethlehem. Bethlehem! *B-e-t-h* kele “yinzo”; *e-l*, “Nzambi”; *e-h-e-m* kele “dimpa,” dimpa. “Yinzo ya Dimpa ya Nzambi.” Mpe Muklisto nionso yina ke butuka na Klisto ke butuka na Bethlehem, na yinzo ya dimpa ya Nzambi.

³⁶ Mpe, na kati kuna, kifwanukusu ya David, yina vwandaka muntu vwandaka kima na ntangu ba basisaka yandi na bantu ya yandi. Ba mangaka yandi. Mpe Bethlehem vwandaka ya kuyala, mpe ba-Philistin vwandaka zunga Bethlehem. Mpe David, muntu vwandaka kima, kifwanukusu ya dibuundu bubu yayi, ya Klisto. Beno me mona, Klisto kele Muntu ke kima yina dibuundu ya Yandi Mosi bubu yayi. Ba kele. . . *Muntu ke kima* kele “kima ba me manga.” Mpe ba mangaka David, ata ti

yandi vwandaka ya kupakulama samu na kuvwanda ntinu; kasi profete pakulaka yandi.

³⁷ Mpe na kati ya ntangu yayi, na kuvwandaka muntu vwandaka kima bantu ya yandi, yandi vukisaka bantu mingi ya ngolo ya Bantu ya makanda. Mosi ya bawu kufwaka bantu bankama nana, kilumbu mosi, na dyonga, to na mbele. Mpe mosi yankaka dumukaka kotaka na dibulu mosi mpe kufwaka nkosi, na kilumbu ya mvula ya mpembe. Mpe—mpe bawu vwanda buka ba-lentille, yina kele madeso to bankasa, to kima, mpe—mpe bawu nionso tinaka, mpe yandi telemaka mpe yandi kufwaka bantu tii diboko ya yandi kulembaka. Bawu mpe kufwaka bampangi yina ya yinda ya Goliath.

Bantu ya ngolo, ya kukwikama na David, samu bawu zabaka ti yandi vwanda kota na kimfumu. Bawu zabaka, ata nionso yina muntu nionso vwandaka tuba. Nzambi vwandaka na kupakula na zulu ya David, mpe bawu zabaka yawu. Bawu vwandaka Bantu ya makanda. Ata mutindu bawu mangaka yandi, kasi bawu zabaka ti yandi vwanda kota na kimfumu. Mpe kilumbu mosi kuna . . .

³⁸ Wapi kifwanukusu ya kele bubu yayi, ya—ya Klisto, Muntu ke tina! Beno ke tuba, “Klisto, Muntu ke kima?” Landila Biblia, yina beto . . . Nzambi me twadisa beto mbote mingi na nzila ya Bansungi Sambwadi ya Dibuundu yina. Dibuundu ya Laodicée yayi, Klisto vwandaka Muntu ke tina na ngaanda ya dibuundu ya Yandi, yina ba mangaka, na kumekaka na kuvutuka dyaka na kati. Beno me mona? Yandi kele Muntu ke tina, samu na dibuundu ya Yandi Mosi. Mpe kikuma na yina Yandi kele Muntu ke tina, kele samu ti Yandi kele Ndinga, mpe bawu ke bika ve Ndinga kukota. Ba me ndima ba-credo, na kisika.

³⁹ Mpe beto me mona, kuna, ti na kati ya mpasi yayi ya nene, bantu ya ngolo yina na ziunga—na ziunga ya David, Bantu ya makanda.

⁴⁰ Kana beno tala mutindu ba tungaka Bethlehem. Mu zola kukota na dilongi yina ve, kasi mutindu Bethlehem . . . Ya kieleka, Rahab, kento ya kindumba, mwana ya yandi vwandaka yina tungaka Bethlehem. Ya vwandaka kikuminu ya ble, mpe maza mingi ya mbote vwandaka kuna. Mpe yandi tungaka mwa mbanza. Mpe ya vwandaka mbanza ya kulutila fioti na bawu nionso, samu ti profete tubaka, “Na . . . Bethlehem na Judée, nge kele ve ya kulutila fioti na bambanza nionso ya Jérusalem . . . to ya Judée? Kasi na nge ke basika Muyadi yina ke twadisa bantu ya Munu.” Na mbanza ya fioti.

⁴¹ David, ntangu ba soolaka yandi kuna. Bampangi ya babakala ya nene, ya mbote, ntangu profete Samuel kwendaka kuna, samu na kupakula, bawu nionso vwandaka kuna. Bantu ya nene, ya ngolo, bayina vwandaka talana mutindu zolaka vwanda, na kutala, bantinu ya mbote na kutala. Kasi ya kieleka

yandi yina ba vwanda manga vwandaka yandi, David, vwandaka yandi yina ba tsyamunaka mafuta na zulu. Mbanza yina ba mangaka vwandaka yina Klisto. . .

Ya kele bayina ba me manga ti Klisto ke baka, beno me mona, bayina ba me manga.

⁴² Mpe beto ke tala ti, na manima ya yandi me kwiza Obed. Mpe na manima ya yandi me kwiza Boaz. Mpe kuna kwizaka Muntu yankaka ya makanda, na yina yandi kwizaka na nzila ya Ruth. Mpe kuna me kwiza Isai. Mpe kuna na Esai me kwiza David. Mpe na kidikilu mosi ya fioti na lweka ya mongo kuna kwizaka Ntinu ya bantinu, Yesu Klisto, Mwana ya David, Mwana ya yandi ya kimpeve.

⁴³ Ntangu yayi na yina, yandi vwandaka, David yandi mosi na kubutukaka na kati ya mbanza yayi, yandi zolaka basika na kisika yayi ya fioti. Mpe ba vwanda bokila yawu Bethlehem, yina zola kutuba, “yinzoy ya dimpa ya Nzambi.” Mpe Yandi kele Yinzoy ya Dimpa ya Nzambi.

⁴⁴ David, ya kuvwanda kuna na zulu ya mongo kilumbu yina, mpe yandi talaka na yisi mpe yandi monaka ba-Philistin me zunga mutindu yayi, yandi zola kuzwa tiya mpe mpwila. Yandi tubaka, “Oh, kana mu lendaka kaka kuzwa ya kunwa na dibulu ya maza yina, mbala mosi dyaka!” Mbote, bansatu ya yandi ya fioti vwandaka lutumu na bantu ya yandi, bayina zolaka yandi.

⁴⁵ Ya kele mutindu mosi bubu yayi, mabanza ya fioti ya Yesu, to mutindu samu na Ndinga ya Yandi, fwana vwanda lutumu na beto Bantu ya makanda yina ke zolaka Yandi. Samu beto zaba ti Yandi ke na kukota na kimfumu, ata mutindu ba ke manga Yandi. Mazulu na ntoto ke luta, kasi Yayi ke yala kaka mutindu mosi ntangu mazulu mpe ntoto nionso ke kufwa. Mpe beto zaba ti Yandi ke na kukota na kimfumu, samu ti kima ve ke kanga yawu na kusalama. *Yayi* kele Klisto, luzayikisu ya Yandi, mpe yayi ke salama kaka mutindu Ndinga tubaka ya ke vwanda, samu ti Yandi kele Ndinga. Mpe balutumu ya Yandi ya fioti kuna, ata mutindu fioti ya kele, kana ya kele “kubotama dyaka,” to nionso yina ya kele, beto ke sala yawu, na mutindu nionso. Ya kele lutumu ya Yandi.

⁴⁶ Mpe nsatu ya fioti ya David vwandaka lutumu ya Bantu ya makanda yina, samu ti, bawu, kifwanukusu ya Dibundu ya Bantu ya makanda bubu yayi. Bantu ya ngolo! Beno me mona, bantu yina telamaka na lweka ya David vwandaka Bantu ya makanda, kasi, bantu ya ngolo. Bawu vwandaka na boma ve. Bawu zabaka ve yina boma vwandaka.

⁴⁷ Muntu mosi bakaka mbele mpe yandi kufwaka bantu bankama nana, mpe bawu nionso na ziunga ya yandi. Wapi muntu ya muntu ya vwandaka! Mosi ya bawu, . . .

Muntu mosi yankaka. Ya vwandaka na kinwani mosi ya Egypte yina kimaka, na dyonga ya yinda. Yandi vwandaka

kaka na nkawa na diboko ya yandi. Yandi bakaka nkawa mpe bwisisaka mbele na diboko ya yandi; bakaka dyonga mpe kufwaka yandi, yandi mosi. Beno me mona?

⁴⁸ Mosi ya binwani yina vwandaka na misapi ya basentimetele makumi tatu na tanu ya yinda, mutindu yina. Ntangu yayi, basentimetele makumi tatu na tanu ya yinda, musapi ya beno kele kaka yinda mutindu diboko ya beno, beno kanga; beno zibula yawu, yina ke vwanda makumi sambwadi na mosi ya yinda ya diboko. Mpe na dyonga! Mpe dumukaka kaka kuna mpe kufwaka yandi. Beno me mona? Samu na yinki? Yandi vwandaka muntu ya ngolo, Muntu ya makanda na kutalaka na muntu ya kupakula yina yandi zabaka vwandaka kota na kimfumu.

⁴⁹ Beno me tala, bawu vwandaka mbote mingi na David, ntangu David na nsuka kotaka na kimfumu, yandi kumisaka bawu bantwadisi ya bambanza? Yesu silaka kima mutindu yina ve? Kima kaka mosi, ke kumisa bawu bantwadisi.

⁵⁰ Na yina, na kati kuna, ntangu nsatu ya David vwandaka kuzwa maza ya madidi. Na kutala yandi vwandaka na mwa maza ya ntama, ya mwa-tiya yina ke ninganaka ve kuna, yina yandi vwanda kunwa. Kasi yandi kumaka na kubanza na maza yina ya madidi kuna na Bethlehem, na yinzo ya dimpa ya Nzambi. Mpe yandi tubaka, “Kana mu zolaka kaka kunwa maza ya dibulu yina!” Mpe bantu yina basisaka mbele ya bawu mpe nwanisaka ba-Philistin na bakilometele makumi zole na yiya ya kitamina, ve samu ti yandi lombaka na bawu, kasi samu bawu zabaka ti yandi zolaka yawu. Mpe bawu kufwaka ba-Phillistin yina, nzila nionso tii na dibulu ya maza. Na yina zole ya bawu vwandaka nwana, mosi yankaka kuzwaka kantini ya yandi ya maza; mpe bawu nwanaka na nzila ya bawu ya kuvutuka, nzila nionso ya kuvutuka, mpe vutulaka yawu na David. Beno zonzila na yina me tala ngolo!

⁵¹ David, muntu yina ya santu, tubaka, “Nzambi kukeba munu na kunwa yawu na bankundi yayi yina me tula luzingu ya bawu na lufwa.” Mpe yandi salaka munkayulu ya kunwa; tsyamunaka yawu na ntoto, samu na Mfumu. “Beno pesa yawu na Mfumu. Yandi kele Yandi yina kele ya kulunga samu na yawu, munu ve.” Bawu tulaka . . .

⁵² Kifwanukusu ya kieleka ya Klisto Yandi mosi, na Luzingu ya Yandi Mosi ya Seko na kati ya Yandi; Ditadi yina ba bulaka, tsyamunaka Luzingu ya Yandi na ntoto, mutindu munkayulu ya disumu samu na beto, ti Ndinga yayi lendaka zinga.

⁵³ Oh, Bantu ya makanda, mutindu mu vwanda me tuba, nani ke benda mbele yina na munu? Yandi ke sosa maza ya madidi, na suka yayi, ve ba-credo ya ntama ya dibuundu yina ke ninganaka ve mpe bima yina ke bebisaka ntangu ya beto. Yandi ke sosa lukwikilu ya kieleka na Ndinga ya Yandi, yina ke kwikila Ndinga nionso ya Yawu. Beto kwenda na dibulu ya maza mpe beto

vutuka na maza, ya madidi; lusambulu yina me tungama ve na zulu ya ba-credo mpe ba-denomination. Kasi lusambulu ya kieleka ya Kimpeve, na Klisto na kati ya beto, ke zinga Luzingu ya Yandi mutindu Yandi zola, na kati ya beto, yina—yina kele ve na ba-credo mpe bima yankaka. Beto kuzwa kaka—kaka Yandi mutindu yina.

⁵⁴ Ntangu yayi, yina landaka vwandaka mutindu Nzambi ke salaka na bantu na nzila ya ndosi, na bilumbu ya—ya Joseph. Beno me bakula? Ndosi kele kima ya zole. Ya kele nzila ya zole ya kusadila ya Nzambi. Bantu yankaka lenda kuzwa bandosi, yina zola kutuba kima ve. Beno lenda kudya mingi mpe kuzwa bandosi ya yimbi. Mpe ndosi kele nzila ya zole. Beno me mona? Kasi samu na yinki Nzambi ke keba Mwana ya Yandi Mosi na nzila ya zole? Yandi monanaka na Joseph. Lusalusu ya Mwana ya Yandi Mosi, Yandi fidisaka nzila ya zole. Beno me banzaka ntete na yawu? Samu, ya vwandaka ve na profete na yinsi. Yandi zolaka sala na nzila ya bandosi. Mpe ya vwandaka ve ndosi yina ba zolaka tendula. Wanzio ya Mfumu tubaka, “Joseph, kuvwanda na boma ve na kubaka na nge Marie kento ya nge, samu ti kivumu yina kele na yandi kele ya Mpeve-Santu.”

⁵⁵ Ya vwandaka kima ya mumesanu ve na kusalama. Joseph na kuvwandaka muntu ya mbote, yandi. . . Ya vwandaka ya mumesanu ve. Nzambi kele ya mumesanu ve. Mpe yina ya mumesanu ve kele mpasi na kubakula. Ya kele samu na yina ya kele mpasi mingi na kubakula Kieleka bubu yayi; Ya kele ya mumesanu mingi ve. Kento ke kuzwa bebe kukondwa kuzaba bakala, yina vwandaka kieleka ya mumesanu ve.

Kasi kana beno kele ya kusungama mpe kele ya kieleka, Nzambi lenda monika dyaka na beno na ndosi. Ya ke lakisa kima yina kele na beno, kana ya kele dibanza ya beno, kana beno lenda sala mwita, kuyimba, kupesa kimbangi, to nionso yina beno lenda sala, kana nionso ya beno me pesama na Nzambi, Nzambi lenda sadila yawu kana beno ke bika kaka Yandi kusala yawu.

⁵⁶ Mpe, nkokila yina vwandaka landa awa, Mpangi Neville longaka na dilongi “kutina,” mutindu muntu ke tinaka. Mpe mu banzaka ti yawu vwandaka dyambu mosi ya mutindu yankaka.

Mpe na suka yayi Mpeve-Santu ke monana na kuzwa munu na kusadila na zulu ya dilongi yayi nsemo, yina kaka ke landa. Kukwenda kaka, na mbandukulu, mutindu luzingu ya Klisto kubandaka na kidikulu, beto ke na kuvutukaka dyaka na kati ya masonuku ya beto. Mpe yandi zabaka yawu ve; mu zabaka yawu ve; mpe awa ya kele kaka na kima mutindu mosi. Beno me mona, kaka kuna, kima yina ke landa kele kisika Yandi ke kota na ministele ya Yandi. Mpe na nkokila yayi beto kele na kima yina ke vukana mbote na yawu, samu na kukwenda na ntwala, na nkokila yayi, kana Mfumu zola.

57 Ntangu yayi, Nsemo ya nene! “Bantu ya makanda yina me vwanda na bizunga ya bivudi ya lufwa, Nsemo ya nene me basika na kati-kati ya bawu. Na Zabulon, mpe na Nephthali, na . . . na nzila ya Galilée ya Bantu ya makanda, Nsemo ya nene, bawu me mona Nsemo ya nene.”

58 Ntangu yayi nsemo, ya mbala ya ntete nsemo, beto ke mona yawu na Biblia, ya kele na Genèse 1:3. Ya vwandaka, Ndinga ya Nzambi yina zonzamaka salaka Nsemo. Nzambi tubaka, “Ti nsemo kuvwanda,” Genèse 1:3, mpe nsemo vwandaka.

59 Ntangu yayi beno bambuka moyo, na yina, nsemo kwizaka na nzila ya Ndinga ya Nzambi yina zonzaka. Mpe nsemo kele kimbangi, to kima ti Yandi zonzaka, ya kele nsemo, na ntangu nsemo ke mwangana, ke talisa ti (Nzambi tubaka, “Ti nsemo kuvwanda.” Ya vwandaka ve na nsemo, mpe Yandi tubaka, “Ti nsemo kuvwanda,” mpe kuna nsemo kuvwandaka. Yina kele kidimbu.) nsemo kele kimbangi ya Ndinga ya Yandi yina zonzamaka, kima mosi bubu yayi, kimbangi ya Ndinga ya Yandi yina zonzamaka.

60 Ntangu yayi ntangu beno ke mona Ndinga ya Yandi kusiamisama, to, na bampova yankaka, kuzabana, kusiamisa, yina kele Nsemo ya Ndinga ya Yandi yina zonzamaka. Mpe, kukondwa nsemo, kima ve lenda zinga kukondwa nsemo. Ya kele ve na luzingu na zulu ya ntoto bubu yayi yina kasi yina ke kwiza na nzila ya nsemo ya mwini, na luzingu ya bayinti, mpe nionso yina. Mpe ya kele ve na Luzingu ya Seko na ngaanda ya Mwana ya Nzambi. Beno me mona? Yandi kele Nsemo.

61 Ntangu yayi beto ke tala, mu banza, na yina beto ke longuka ntangu yayi, mpe nsemo yayi . . . “Ntoto vwandaka ya kukondwa mutindu.”

62 Ntangu yayi, bantu yankaka ke swana bubu yayi na balukolo ya beto, mpe nionso yina, na zulu ya yinza vwandaka mafuku mingi ya bamvula, mpe ke meka na kubedisa Biblia mpe kutuba ti Yawu kele luvunu. Bawu ve kaka, me tangaka ntete ve Biblia. Kaka yina. Samu ti, Biblia ke tuba ve na beto bamvula yikwa kele na yinza. Biblia ke tuba, “Na mbandukulu Nzambi vangaka mazulu mpe ntoto.” Pwin! Na wapi ntangu, wapi mutindu, ya kele, beto zaba yawu ve. Ntangu yayi, yina kele ya ntete. Mpe, yina kele pwin, ya kele nsuka ya flaze.

63 “Na mbandukulu Nzambi vangaka mazulu mpe ntoto.” Ya lendaka vwanda nkama ya mafuku, to ya byazi, to nionso yina ya vwandaka. Mpe mutindu Yandi salaka yawu, yina me tala Yandi na kuzaba, beno me mona, samu na munu ve.

Kasi yinza, mbote, “Ntoto vwandaka ve na mutindu, mpe ya mpamba; mpe maza vwandaka na zulu ya ntoto. Mpe Nzambi,” tubaka, “vwanda tambula na zulu ya maza.” Mpe tubaka, “Ti nsemo kuvwanda.”

⁶⁴ Ntangu yayi, mu ke kwikila ti mwini, mpe nionso yina, vwandaka yimeni na luzingu, mu banza, ngonda. Mutindu ya ke landila, na Genèse 3, samu na kutendula yawu. . . Kasi mu banza, yina vwandaka awa, ti yinza, beto zolaka sadila yawu, mpe na yawu. . . Mpe ya kotaka; ya vwandaka na dibungi mpe dibungi ntoto nionso, na kusalaka yawu mpimpa. Mpe Nzambi tubaka, “Ti nsemo kuvwanda,” mpe mpimpa kuzimbanaka, mpe kuna vwandaka na matuti ve.

⁶⁵ Mpe mu banza ya kele mutindu ya Nzambi ya kusala mambu. Yandi. . . na kati ya Biblia, nzila yina ke landa ke tuba, nzila ya 4 ke tuba, “Mpe Yandi kabulaka nsemo na mpimpa. Mpe nsemo Yandi bokilaka ‘kilumbu,’ mpe mpimpa Yandi bokilaka ‘mpimpa.’” Mpe Ndinga ya Nzambi ke kabulaka ntangu nionso Nsemo na mpimpa. Beno me mona? Ya kele Ndinga yina ke salaka nkabwani, beno me mona, Nsemo na mpimpa.

⁶⁶ Nzambi ntangu nionso ke salaka kima mutindu mosi, ntangu Yandi ke kubamaka na kusadila kima nionso. Mutindu Yandi kubamaka na kusadila mbwetete yayi ya ntama, to nionso yina ya vwandaka, yinza yayi, Yandi zolaka kabula nsemo na mpimpa. Ntangu Yandi ke kubamaka na kukwenda, samu na kusadila nkonga ya bantu, Yandi fwana kukabula Nsemo na mpimpa. Ntangu Yandi ke kubamaka na kusadila muntu, Yandi ke kabula Nsemo na mpimpa. Beno me mona?

⁶⁷ Nsemo ke kwizaka na nzila ya Nzambi. Mpe. . . Beno bambuka moyo, nsemo kwizaka na nzila ya Ndinga ya Yandi yina zonzamaka. Ndinga ya Nzambi tubaka, “Ti nsemo kuvwanda,” na yina nsemo vwandaka ve, mpe Yandi fidisaka nsemo na kukabula mpimpa na nsemo.

⁶⁸ Ndinga yayi ya lutumu kumisaka dizulu pwelele samu mwini kulezima. Mpe Ndinga ya Yandi bubu yayi kele yina ke kumisa pwelele ba-atimosifere nionso ya kukondwa lukwikilu.

⁶⁹ Mu vwandaka zonza, mu kuzwaka—kuzwaka, mu banza, ba-interview kumi na mosi kaka ntete mu kwiza na chaire na suka yayi, na kati kuna. Ya yimbi mingi. . .

⁷⁰ Kilumbu yankaka yina mwa nkundi ya munu mosi, Jim Poole, mwana ya yandi ya bakala, bawu banzaka ti yandi kuzwaka mpasi ya ntima, bawu nataka yandi mbangu na lupitalu. Ya vwandaka kimbevo ya asthma, yina losaka mwa mwana yina. . . Yandi vwandaka lenda ve. . . Mwa ntima ya yandi vwandaka dumuka, mpe vwandaka pema, mpe—mpe yandi vwandaka boka mpe vwandaka lenda ve kuzwa mpema ya yandi, mpe mwa mwana yina vwandaka talana mutindu ti yandi vwanda kufwa, ntangu bawu kunataka yandi awa. Mpe mu vwanda kubama na kukwenda na lupitalu; ba nataka yandi awa. Mpe simbaka mwa diboko ya yandi; mu tubaka, “Yina me sala yawu, kele kintuntu me bula mwana. Mpe, kintuntu, fièvre me bula mwa mwana. Beno tala yandi mbote. Na mwa bilumbu

mu zola kumona dyaka yandi. Yandi ke vwanda ya kufuluka na kintuntu.” Mpe awa yandi kele ya kufuluka na kintuntu, beno me mona. Beno me mona?

⁷¹ Ntangu yayi, yinki? Nzambi ke kabulaka mpimpa na nsemo, to nsemo na mpimpa. Mpe Yandi ke kabulaka lufwa na Luzingu, mpe Yandi ke salaka yawu na nzila ya Ndinga ya Yandi. Ndinga ya Yandi kele yina ke pesaka ntangu nionso yayi.

⁷² Ntangu yayi, nsemo! Mbote, ntangu yayi, nkuna vwandaka yimeni na zulu ya ntoto. Mu ke kwikila ti Nzambi kunaka nkuna. Mpe kaka na ntangu yina mwini lenda kuma na nkuna yina, ya ke banda na kumena. Mpe ya kele samu na yina ya lombaka kaka bilumbu samu na kubasisa bima yayi, samu nkuna vwandaka yimeni na ntoto. Nionso yina ya vwandaka na nsatu vwandaka nsemo.

⁷³ Mpe ya kele mutindu Nzambi kele na yawu bubu yayi. Nkuna ya Yandi kele yimeni awa, Ndinga ya Yandi. Kima kaka yina Yawu kele na nsatu kele Nsemo na zulu ya Yawu. Mpe Yandi kele Nsemo yina, samu ti Yandi kele Ndinga. Ndinga mpe Nsemo kele kima mosi. Luzingu na kati kuna kele Nsemo ya Ndinga, beno me mona, ya kele Luzingu. Nkuna ya luzingu kele na kati ya mbuma, mpe mbuma . . . luzingu kele yina ke basikaka mpe ke basisa luzingu ya mbuma. Ya kele mutindu yina Klisto, na kati ya Ndinga, ke salaka Ndinga kusala yina Yawu fwana kusala. Kaka mutindu luzingu na kati ya mbuma ya blé, to na nionso yina ya kele; ya ke salaka ti blé kusala yina ya fwana kusala, samu ti ya kele luzingu yina kele na kati ya yawu. Luzingu nionso!

⁷⁴ Na yawu, Luzingu kele kaka na nzila ya Ndinga ya Nzambi yina me monisama. Luzingu ke kwizaka kaka na nzila ya Ndinga ya Nzambi yina me monisama. Ntangu nionso yina ya kele kaka na kati ya Buku, mutindu yayi, ba lenda vwanda dyaka na kyuvu na yawu. Kasi na ntangu ya me talana, kuna beno ke mona mbuma ya yina Yawu zonzilaka, kutalana, na yina ya kele Nsemo na—na Ndinga. Beno me mona? Ya kele yina ke nataka . . . Ndinga me tuba mutindu yina, mpe, na yina, ntangu ya ke salama, ya kele Luzingu na kati ya Nsemo, Nsemo na kunataka Luzingu. Nsemo ke nataka Luzingu.

⁷⁵ Beno kuna ble na ngaanda awa, ya ke . . . mpe beno tula yawu na yisi ya yinzo, beno fuka yawu nionso, mpe ya ke—ya ke basisa ata mbala mosi ve kima, samu ti ya lenda ve. Ya kele na ata nsemo kuna ve. Kasi kaka na ntangu nsemo ke bula yawu, kuna ya ke basisa luzingu kana ya kele na kima ke butisa nkuna.

Ya kele kima mutindu mosi ya kele na kati ya Ndinga. Beno me mona, Ndinga kele Nzambi, mpe ntangu Luzingu ke bulaka Yawu, yawu ke nataka Yawu . . . Nsemo ke bula Yawu, yawu ke nata dyaka Ndinga na luzingu. Na nsungi nionso ya me vwandaka ntangu nionso mutindu yina. Oh, mutindu beto ke

sepelaka na bima yayi ya nene, mutindu ti Ndinga me siamisama kele Nsemo ya Ndinga yina tubamaka. Beno me mona?

Nzambi tubaka, “Ti nsemo kuvwanda.”

⁷⁶ Ntangu yayi, yinki kana Yandi tubaka yawu mpe ata nsemo mosi ve kwizaka? Na yina beto zaba ve kana ya kele kieleka to ve. Beto zaba ve kana Yandi kele ya kulunga. Beto zaba ve kana Yandi kele Nzambi to ve, samu ti Yandi tubaka kaka, “Ti ya vwanda,” mpe ya vwandaka ve. Beno me mona?

Na yawu kuna ntangu Nzambi zonzaka mpe beto ke mona ti ya kele, na yina ya kele Nsemo yina ke na kulezima, Kieleka ya Ndinga. Beno me mona? Ya kele na Nsemo mpe Luzingu.

⁷⁷ Luzingu nionso ya yinza ke kwizaka na nzila ya Ndinga ya Yandi yina tubamaka. Mpe mwini kele Ndinga ya Yandi yina tubamaka. Yandi tubaka Yandi vangaka nsemo ya nene na mazulu, samu na kilumbu, mpe nsemo ya fioti samu na mpimpa. Beno me mona? Mpe luzingu nionso ya yinza fwana kukwizila na Ndinga ya Nzambi yina tubamaka. Fololo lenda ve kukula kukondwa nsemo ya Ndinga ya Nzambi yina tubamaka kulezima na zulu ya yawu, samu ti mwini kele, m-w-i-n-i, kele Ndinga yina tubamaka ya Nzambi, na ntangu Yandi tubaka, “Ti nsemo kuvwanda.” Beno me mona? Ya kele luzingu ya Nzambi yina tubamaka. Mpe ata bambala yikwa bantu ke meka na—na kutuba *yayi*, *yina*, to *yankaka*, ya kele dyaka mutindu mosi. Beno fwana vwanda na mwini yina, na yina luzingu, ya yinza, lenda kwiza kaka na nzila ya Ndinga ya Nzambi yina tubamaka.

⁷⁸ Mpe Luzingu ya kimpeve, Luzingu ya Seko, lenda kwiza kaka na nzila ya Ndinga ya Nzambi yina tubamaka yta Luzingu. Luzingu vwandaka M-w-a-n-a ntangu yayi. Na kati ya Yandi kele Nsemo, mpe na kati ya Yandi kele na ata mpimpa ve; mpe Yandi kele Nsemo ya Nzambi yina tubamaka. Ya kele kieleka? Ndinga ya Nzambi yina me tubama, samu ti, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.” Mpe Yawu kele ntangu nionso Nzambi. Beno me mona?

Mpe ya ke lomba Nsemo ya Nzambi na kubula Ndinga, samu na kusala Yawu kuzinga. *Benotala* yina Yandi tubaka, ntangu yayi ti Nsemo kulezima! Amen! Ti Nsemo kulezima, mpe Nsemo ke nata konso Ndinga na kisika ya Yandi ya kulunga, na nsungi ya yawu. Amen! Oh! Beno me mona, ntangu ya ke kwiza!

⁷⁹ Bantangu yankaka mbuma yina ke vwanda na ntoto, ke lala, nsungi nionso ya hiver, mutindu nkuna, ble ya hiver ba me kuna na ntoto. Kasi ntangu mwini yina ke kota kaka, oh, ya fwana kuzinga. Beno me mona? Mpe ya lenda zinga ve kukondwa mwini.

Mpe Nzambi salaka bansilulu samu na konso nsungi mpe konso kilumbu. Mpe na ntangu Nsemo ke kota kaka, mpe ke

lezima na zulu ya yawu, yawu ke basisa kaka kieleka yina Ndinga tubaka, samu ti Yandi kele Nsemo mpe Luzingu.

⁸⁰ Ndinga ya Nzambi ke kwizaka kaka na nzila ya Biblia. Biblia ya Nzambi kele bisono ya Mwana ya Nzambi, samu ti Biblia ke tuba ti Yawu kele luzayikisu ya Yesu Klisto. Ya kele Nzambi ke na kumonikisa Yandi mosi na nzila ya Klisto, mpe Klisto kele Ndinga. Mpe ya ke lombamba Nsemo ya Nzambi na kulezima na zulu ya Ndinga yina, samu na kusiamisa Yawu, samu na kusiamisa ti Nzambi ke zonzaka dyaka Luzingu, Luzingu ya Seko. Yandi ke zonzaka nsemo ya yinza, ke nataka luzingu. Luzingu ke kwizaka kaka na nzila ya Nsemo, Ndinga me monisama, to me kuma nsuni. Ntangu bansilulu nionso kumaka, na kati ya Biblia, me monisama, ya kele ntangu Yesu Klisto, Ndinga, kumaka nsuni na kati-kati ya beto. Nzambi ntangu nionso ke salaka na nzila ya muntu. Muntu kele kima ya Nzambi.

⁸¹ Ntangu yayi, kana ya kele mwa tiya awa samu na beno, beno lenda kulula banela, to nionso yina beno zola, kukulula chauffage. Mu banza ti mukengi lenda kulula chauffage fioti. Mu ke mona mingi kuwa tiya. Mpe ya kele tiya ya kutelama awa, mpe, na yawu—na yawu beno bambuka moyo na yawu. Mu kele na kyese ti ya kele tiya na kisika ya madidi, samu ti mu—mu zola tiya. Mu . . . Tiya ntangu nionso ke nataka nsemo, luzingu, ya fwana vwanda na tiya.

⁸² Beno tala ntangu yayi, “kuma nsuni.” Ntangu Ndinga ke kumaka nsuni, Yawu ke kumaka ya kumonisama. Mutindu, beno baka Ndinga mpe beno kotisa Yawu na kisika ya kulunga mpe na mutindu ya kulunga ya ntoto, Yawu ke basisa. Nkuna ke basisa mutindu ya yawu. Mpe Ndinga, kunatama na kati ya mutindu ya ntima ya kulunga, ya ke monisama Yawu mosi. Yawu ke basisa nsemo. Yawu ke mwangana na zulu ya yawu. Mbote mingi.

⁸³ Ata kima ya yinza, ata kima ya yinza to ya kimpeve, lenda zinga kukondwa Nsemo ya Nzambi. Luzingu lenda kwiza kaka kuna na nzila ya Nsemo. Ata kima ya yinza to kima ya kimpeve lenda zinga kukondwa Nsemo ya Nzambi. Beno banza na yawu. Mbote mingi. Kasi ntangu Yandi ke fidisa beto Nsemo, beno me mona, mpe ke sala bima nionso yayi, mpe kuna beto ke manga Yawu; ntangu yayi yina kele kitini ya mawa, ya kele ntangu ba ke manga Nsemo ntangu ba me fidisa yawu na beto.

⁸⁴ Ntangu yayi beno lenda banza na muntu mosi ke tuba bubu yayi, “Mu me manga kaka na kutuba ti ya kele na kima mutindu mwini. Mu ke kwikila ve ti ya kele na mwini?” Mpe yandi ke kulumuka na mbangu na yinsi ya yinzo, mpe—mpe ke kanga myelo nionso, mpe ke vwanda na kati ya mpimpa, mpe kutuba, “Ya kele ve na kima mutindu mwini. Ya kele ve na kima mutindu nsemo.” Beno ke zaba, na mbala mosi, ti ya kele na kima mosi ke tambula mbote ve na yintu ya muntu yina. Beno me mona? Ya kele na kima mosi ke tambula mbote ve, na ntangu yandi

ke vutuka mbangu na yisi ya yinzo ya mpimpa mpe ke manga na kundima ndandu ya nsemo Nzambi pesaka. Ya kele na kima ke tambula mbote ve na yandi. Yandi zola ve tiya ya minzenzi ya yawu. Yandi zola ve kima ya mavimpi yina yawu ke pesaka. Yandi zola ve nsemo ya yandi, na kutambula na kati. Yandi ke sepela na kisika ya kuvwanda na mpimpa. Ya ke lakisa, na yintu, ti kima mosi ke tambula mbote ve, na muntu yayi.

⁸⁵ Mpe mu ke tuba yayi na zola nionso mpe buzitu. Na yawu ya kele na kima na kimpeve yina ke na kutambula mbote ve na muntu yina ke vutuka mbangu na credo ya ba-denomination ya yandi mpe ke manga na kumona Nsemo ya Biblia ntangu ya ke na kulezima kaka na ntwala ya yandi. Ya kele na kima mosi ke tambula ve mbote na yandi. Beno me mona, ke vutuka na ba-credo mpe mitindu ya yandi, mpe ke kanga kyelo mpe ke tuba, “Ya kele ve na kima mutindu Yina. Bilumbu ya bimangu me luta. Ya kele ve na kima mosi ya mutindu kubeluka ya Kinzambi, ya kele na ata mosi ya bima yayi ve. Yina vwandaka samu na ntumwa.” Muntu yayi na kimpeve kele kilawu. Beno me mona? Ya kele na kima mosi ke tambula mbote ve na yandi. Yandi—yandi—yandi me kulula balele ya nela mpe me manga Mpeve-Santu yina lenda kwiza na zulu ya yandi. Kana yandi lenda . . .

“Kana beno kangama na kati ya Munu, mpe Bandinga ya Munu na kati ya beno, na yina, Nsemo ke na kulezima na zulu ya Ndinga yayi, beno lomba yina beno zola.” Beno me mona? Beno me mona?

⁸⁶ Ya kele na kima mosi ke tambula ve mbote, ti yandi ke manga bayinto Nzambi pesaka yina Nzambi pesaka beto samu na kuzingila, Ndinga ya Yandi. “Muntu ya kudedama ke zinga na lukwikilu.”

“Mpe muntu ke zinga kaka na dimpa ve, kasi na Ndinga nionso,” na ndambu ya Ndinga ve, “konso Ndinga yina basikaka na yinwa ya Nzambi.” Mpe ntangu muntu ke manga kaka Yawu, ya kele na kima mosi ke tambula ve mbote na muntu yina; kima mosi ke tambula ve mbote na kimbangi ya yandi, ti yandi ke tuba zola Nzambi mpe na manima ke manga Nzambi. Kima mosi me tambula ve mbote na muntu yayi. Beto zaba yawu, kukondwa kivudi ya ntembe. Yandi ke manga Yawu, ke kota na mbangu na kisika yayi, mpe ke tuba, “Ntangu yayi mu ke kaka . . . Mu zola zaba kima mosi ve na yina me tadila Yawu. Beno tuba na munu kima mosi ve na yina me tadila Bima yayi. Mu, mu ke kwikilaka ve kima na zulu ya Yawu. Beno, ata yina beno ke tuba!”

⁸⁷ Muntu mosi tubaka, ntama mingi ve. Mu tubilaka beno yawu. Yandi tubaka, “Mu ke kipe ve kana beno ke nata ba-cancer makumi tanu, mpe beno nata badokotolo makumi tanu na kusala kimbangi ya bawu, Mu ke kwikila ve. Mu ke kipe ve kana beno ke vumbula muntu ya kufwa, kaka na mantwala ya munu, mu ke kwikila yawu ve.” Beno me mona, ya kele na kima mosi ke

tambula ve mbote na muntu yina. Ya—ya—ya kele. Mpe—mpe, dyaka, muntu yina vwandaka mulongi, beno me mona, beno me mona, zolaka vwanda mulongi.

Kasi kaka samu ti organisation yina ke kwikilaka ve na—na bangolo ya Nzambi, ke kwikila ve yawu (Ndinga) Yawu zolaka tuba kaka yina Yawu tubaka, muntu yina ke kota na mbangu na yisi ya yinzo yayi, ya nsunga ya yisi ya yinzo ya ntama ya kukangama, ya mvindu, ya yimbi ya organisation, mpe ke manga tiya mpe Luzingu ke pesaka minzenzi ya Mpeve-Santu, Yesu Klisto, yina kele mutindu mosi mazono, bubu yayi, mpe ntangu nionso. Na yina ya kele na kima mosi ke tambula ve mbote na muntu yina. Beno me mona?

Yandi ke zola kuzinga na kati ya nsunga ya kukangama yina, ya mpimpa, mpe nionso yina, na kisika ya kuzinga na Nsemo ya Nzambi mpe ya Biblia yina ke tuba, ti, “Yesu Klisto kele mutindu mosi mazono, bubu yayi, mpe ntangu nionso. Bisalu yina Mu ke sala beno ke sala mpe. Mpe ya kulutila nene na yayi beno ke sala, samu ti Mu ke kwenda na Tata ya Munu.” Ya kele na kima mosi ke tambula ve mbote na muntu yina. Kukondwa kyuvu, na nionso, ya kele na kima mosi ke tambula ve mbote.

⁸⁸ Mpe na beno muntu yina ke na kuwa yayi, bisika nionso na yinza, ata kisika beno lenda vwanda. Ya kele na kima mosi ke tambula ve mbote na nzingulu ya beno, na ntangu beno ke tuba ti beno zola Nzambi mpe ke manga Ndinga ya Yandi. Ya kele na kima mosi. Beno ke manga kieleka. . . Kukondwa kuyituka ti bima lenda ve, dibuundu kele na kati ya nkadulu ya yawu, mpe bima lenda salama ve mutindu Nzambi silaka, ya kele samu ti beno ke yamba mpe ve Ndinga to kutambula na kati ya Nsemo. Biblia ke tuba, “Ti beto tambula na kati ya Nsemo, mutindu Yandi kele na kati ya Nsemo, na yina Menga ya Yesu Klisto, Mwana ya Nzambi, ke sukula beto na masumu nionso.” Disumu kele “kukondwa lukwikilu.”

⁸⁹ Na yina kana beto ke na kutambulaka na kati ya Nsemo yina Nzambi pesaka ya ngunga, na yina Nzambi ke baka Ndinga yina pesamaka na ngunga mpe ke siamisa Yawu.

Kaka mutindu Yandi salaka na Genèse 1:3, na tubaka, “Ti nsemo kuvwanda,” mpe nsemo basikaka. Ndinga ya Yandi basikaka, mpe nsemo landaka Yawu, mpe zimbisaka dibungi. Mpe mpimpa kwendaka na nsongi mosi, mpe nsemo lezimaka na lweka yankaka.

⁹⁰ Ya kele mutindu Nzambi ke salaka bubu yayi. Yandi ke tinda Ndinga ya Yandi samu na ngunga yayi, mpe Mpeve-Santu ke kwiza mpe ke sala Ndinga yina kuzinga. Mpe mpimpa ke landila na ba-credo mpe ba-denomination ya bawu, kasi Nsemo ke lezima samu ti ya kele Ndinga ya Nzambi yina me siamisama ti Ndinga ya Yandi kele kieleka. Ntangu yayi, ya kele ve na kima

mosi ya luvunu na yawu, yina kele kaka kieleka ya Masonuku. Mbote mingi.

⁹¹ Ntangu yayi, beto ke mona ti bantu ya ndwenga, bantu ya ndwenga ya Ntama, landaka kima mosi Nzambi pesaka. Ba landaka Ndinga ya Nzambi, na Nsemo, samu ti ya vwandaka Ndinga yina nataka Luzingu. Ntangu yayi beno ke tuba, “Wapi mutindu bawu landaka?” Mbote, bawu vwandaka, mutindu, mimoni, landila lubakusu ya beto.

⁹² Mpe kuna beto ke tala ti Balaam, profete, kuna na Nombres 24:17, Balaam vwandaka mutindu mumoni yandi mosi. Yandi vwandaka profete, ya kieleka, mpe yandi pesaka profesi awa mpe tubaka ti Mbwetete mosi ke basika na Jacob.

Mpe ntangu bantu ya ndwenga yayi monaka ti Ndinga ya Nzambi tubaka Mbwetete ke basika na Jacob, ba landaka mwa kidimbu yina Nzambi pesaka na yinto ya Nsemo ya Seko.

Mutindu mosi bantu ya ndwenga bubu yayi, bayina kele ve ya kufwa meso na nzila ya ba-credo, ke landa Ndinga Nzambi pesaka, Ndinga yina me tubama tii bawu ke mona muvimba ya Ngolo ya Nzambi kutandama na ngunga yayi. Bawu, bawu ke mona yawu, mpe bawu zaba ti ya kele awa na Masonuku. Nzambi silaka yawu samu na kilumbu yayi.

⁹³ Ata lutangu ya ba-observatwale, ata lutangu ya bima yankaka, tubaka na bantu ya ndwenga, “Mbote, beno kele na ngaanda ya dibanza ya beno!” Bamvula zole bawu zyetaka. Bawu lutaka na bayinsi mingi, mpe bantu zolaka tuba, “Wapi kisika beno ke na kukwendaka?”

⁹⁴ “Oh, beto me mona Mbwetete ya Yandi na Esete, mpe beto me kwiza sambila Yandi.”

Mpe ntangu bawu kumaka na Jérusalem, na ba-quartier général ya ba-denomination, bawu vwandaka na mvutu ve. Bawu mataka mpe kulumukaka babala-bala, na kubokaka, “Wapi kisika Yandi kele, Ntinu ya ba-Juif yina me butama?” Bawu zabaka kima ve na yina me tala yawu.

Na yawu, ba salaka mbokolo na Ndinga, samu na kutala. Ba landaka, zabaka ti Mbwetete yina vwandaka twadisa bawu na Nsemo ya Seko. “Twadisa beto na Nsemo ya Nge ya kulunga.” Mpe Ndinga kele yina ke twadisaka beno na Nsemo, mpe Nsemo kele yina ke siamisaka Ndinga. Beno tala, ba vwandaka bantu ya ndwenga.

⁹⁵ Mpe bantu ya ndwenga bubu yayi, ba- . . . “Ndwenga ya yinza yayi kele bulawu samu na Nzambi.” Bantu ya beno nionso ya science, mpe beno bantu yina ke talaka na luzabu ya nene, to na kima yankaka, yina ke tuba na beno mutindu ya kubuka atome; ya lenda pesa beno Luzingu ve. Ya kele ve na kima lenda pesa beno Luzingu kasi Ndinga ya Nzambi yina me tubama. Ya kele

kaka kisika yina Luzingu yina lenda kwiza, ya kele na nzila ya Ndinga ya Yandi yina tubamaka.

⁹⁶ Mpe ya kele nionso ya kulunga, na kuzaba mutindu ya kubuka atome. Mu zolaka zola ti bawu kubakula yawu ata mbala mosi ve. Kasi kana bawu . . . Ba zolaka sala yawu, samu ti yinza yayi kele ya kulelika bubu yayi. . . Ya fwana salama, samu na kutimuna mabulu ya nene yayi na ntoto, samu na kubika lave yina kubasika mpe kuvutula dyaka ya malu-malu yinza yayi, samu na kusala ntoto ya malu-malu; kisika bantu ya kudedama ke tambula na zulu ya mfundu-mfundu ya bantu ya yimbi, kisika ba ke zimbana disumu. Kima nionso kele na mutindu ya yawu ya kuvutuka ya malu-malu. Mpe muntu, yina ba pesaka na kuzinga na zulu ya ntoto yayi, na nzila ya ndwenga ya yandi mosi, na kubakaka yinti ya luzabu na kisika ya Yinti ya Luzingu, yandi ke bebisa ntoto yina Nzambi pesaka yandi na kuzingila. Kasi bayina kele dyaka na zulu ya Yinti ya Luzingu, ke kwiza na mazulu ya malu-malu mpe ntoto ya malu-malu, kisika kimbevo to lufwa kele ve. Nsemo! Nsemo, Mfumu, fidisa beto Nsemo.

⁹⁷ Ya vwandaka Bawanzio ya Nzambi yina lakisaka nsemo na zulu ya mongo, samu na kutwadisa mivungi na Nsemo ya Seko. Beno me mona, ya ke kwizaka kaka na nzila ya Nsemo. Luzingu lenda kwiza kaka na nzila ya Nsemo. Mivungi, vwandaka zola kuzaba. Beno zaba, ntangu ntinu me butuka, ba ke yimbaka, kuyangalala kele nene, ntangu ntinu me butuka. Ntangu yayi, Yandi butukaka na mansweki mingi, mpe butukaka na kidikulu, na kidikulu kisika bangombe mpe bampunda vwanza kudyaka, kasi dyaka Yandi vwandaka Ntinu. Mpe Bawanzio kulumukaka mpe yimbaka nkunga na mivungi, na kati ya Nsemo.

Bawanzio, bawu mosi, vwandaka bansemo yina vwandaka lakisa na Ndinga ya Nzambi. Bawu vwandaka na Ndinga ya Nzambi, mpe tubaka na bawu, “Bubu yayi, na mbanza ya David, na Bethlehem, me butuka Klisto Mvulusi.” Bawanzio vwandaka na Ndinga, mpe Ndinga kwizaka na nzila ya Nsemo, samu na kutwadisa. Mpe bawu landaka Ndinga ya Bawanzio, na Nsemo ya Seko. Ba monaka Bebe kuna, ya kufuka na bilele, mutindu Bawu tubaka. Samu, beno me mona, Luzingu ke kwizaka kaka na nzila ya Nsemo.

⁹⁸ Beno tala, Yandi vwandaka Ndinga yina salamaka Nsemo, to kumaka Nsemo. Ndinga na kati ya nsungi yina, Yandi vwandaka Ndinga Nsemo ya nsungi yina, samu ti baprofete ya ntama zonzilaka na Yandi, mpe awa Yandi me kwiza mpe me siamisa ti Yandi vwandaka Nsemo ya Ndinga ya Nzambi yina me tubama. Beno me mona? Baprofete nionso tubaka—tubaka, kulungisamaka na kati ya Yandi, beno me mona, baprofete ya ntama awa na Ndinga.

Mutindu Nzambi vwandaka na mbandukulu, ntangu Yandi tubaka, “Ti nsemo kuvwanda,” mpe nsemo kwizaka.

Ntangu yayi profete tubaka, “Mwense mosi ke kuzwa kivumu, yandi ke buta Mwana. Ba ke bokila Nkumbu ya Yandi Emmanuel, samu ti Yawu ke vwanda Nzambi na beto.” Ntangu yayi, bawu zonzaka yawu, Ndinga basikaka; kasi Yandi vwandaka Nsemo. Yinki Yandi vwandaka? Kulungisama. Aleluya! Yandi vwandaka kulungisama ya Ndinga yina. Yandi vwandaka kumonisama ya Ndinga yina.

⁹⁹ Mutindu mosi ya kele bubu yayi, Ndinga ya Nzambi me lungisama na ngunga! Yina kele Nsemo. Ya kele Nzambi ke na kumonisama Yandi mosi. Yandi vwandaka Nsemo ya yinza.

¹⁰⁰ Mpe ntangu baprofete, ya kutwadisama na Mpeve-Santu, tubaka, “Mwana me butuka na beto, na beto Mwana me pesama, to Mwana me pesama na beto; mpe ba ke bokila Yandi na Nkumbu ‘Konseye, Mwana ya Ntinu ya Ngemba, Nzambi ya Ngolo nionso, Tata ya Kukonda nsuka,” kuna ya vwandaka. Yinki Yandi vwandaka? Nsemo yina lungisaka Ndinga yina, amen, Nsemo yina lungisaka Ndinga yina.

¹⁰¹ Na Matthieu, na Santu Matthieu kapu 28, beto ke mona. Mpe ntangu Yesu vumbukaka na lufwa, Yandi mpe vwandaka Nsemo ya Ndinga yina David zonzaka, yina tubaka, “Mu ke bika ve moyo ya Yandi na difelo; to dyaka kubika ya Munu ya Santu kumona kubola.” Lufwa vwandaka na kati ya mpimpa. Kasi Yandi bukaka bidimbu ya lufwa, mpe kotaka na yawu, mpe basikaka dyaka. Yandi vwandaka Nsemo, Ndinga ya kusiamisa, ti bantu ya kufwa lenda zinga na manima bawu me kufwa. Yandi vwandaka.

¹⁰² Na Kilumbu ya Pentecote, yina vwandaka Nsemo yina lakisaka ntangu Mpeve-Santu kwizaka.

Esaïe ke tuba, na kapu 28 ya Esaïe, Esaïe tubaka yawu, na, “Musiku na zulu ya musiku; lutumu na zulu ya lutumu; ndambu awa, mpe ndambu kuna.” “Beno kangama na yina kele mbote.” “Samu ti na bikoba ke tekita mpe na bandinga yankaka ti Mu ke zonga na bantu yayi. Mpe yayi kele kupema, yayi kele Saba yina Mu ke pesa na . . . Mpe ata nionso yayi bawu zolaka kuwa ve; bawu kwendaka, mpe ningisaka bayintu ya bawu.”

Mpe ntangu na Kilumbu ya Pentecote, ntangu Mpeve-Santu kulumukaka na zulu ya bantu yina, mpe bawu vwandaka sala mutindu babakala mpe bakento ya kulawuka malafu, na kubwaka na ngolo ya Mpeve-Santu. Mpe bawu kwendaka mpe ningisaka bayintu ya bawu, mpe tubaka, “Bantu yayi kele ya kulawuka malafu, ya kifuluka na vinu ya malu-malu,” mpe nionso yina. Ya kieleka ya vwandaka Nsemo, Ndinga yina ba pesaka na profesi, kumonisamaka.

¹⁰³ Mutindu mosi ya kele na konso nsungi, Ndinga monisamaka, kwizaka na Luzingu, ya kele Nsemo ya nsungi yina, kuna Ndinga monisamaka. Kaka mutindu ya vwandaka na Genèse 1, ntangu Nzambi tubaka, “Ti nsemo kuvwanda,” mpe kuna nsemo

vwandaka. Ntangu Nzambi tubaka ti ya ke vwanda na Mwana; mpe kuna vwandaka na Mwana.

¹⁰⁴ Ntangu Nzambi tubaka, na Joël 2:28, “Ya ke salama na bilumbu ya nsuka, Mu ke mwangisa Mpeve ya Munu na zulu ya bantu nionso; bana ya beno ya babakala mpe bana ya bakento ke pesa profesi; na zulu ya bisadi ya Munu ya bakento mpe bisadi ya Munu Mu ke mwangisa Mpeve ya Munu; bana ya beno ya babakala ke mona ba-vision; biboba ya beno ya babakala ke mona bandosi.” Mpe bima nionso yayi yina Yandi silaka, ntangu Yawu, Mpeve-Santu kulumukaka, vwandaka Nsemo na zulu ya Ndinga yina. Ntangu Ndinga kumonisamaka, kuna Yawu kumaka Nsemo.

Yandi kele Nsemo. Yandi kele Nsemo yina beto fwana landa. Yandi kele Nsemo kaka. Bawanzio talaka Nsemo, mpe landaka Yawu na Yandi.

¹⁰⁵ Ntangu yayi, na bansungi nionso, Nzambi tulaka Ndinga ya Yandi mingi samu na konso nsungi. Nzambi ntangu nionso ke tindaka muntu ti Ndinga lenda kota mpe kutalisa Nsemo ya Yawu. Ti, konso nsungi, ya ke salaka kima mosi, ntangu nionso ya ke salaka mutindu yina.

¹⁰⁶ Yandi vwandaka kulungisama, mutindu mu tubaka, na bangolo nionso ya Kinzambi ya santu, ya baprofete. Bawu vwandaka banzambi ya fioti. Ntangu Ndinga ya Mfumu vwanda kwiza na muntu, Yesu tubaka, Yandi mosi, ti yandi vwandaka nzambi. Beno zaba yawu. Yandi tubaka, “Kana musiku ya beno ke tuba, mpe batata ya beno ntama kuna, bokilaka bawu, bayina Ndinga ya Nzambi vwandaka kwiza, bokilaka bawu ‘banzambi,’ wapi mutindu beno lenda bedisa Munu, na kutubaka, na yina mu ke tuba, ‘Mu kele Mwana ya Nzambi yina?’” Beno me mona?

Ntangu, Nzambi ya kieleka Yandi mosi, Yina zonzaka Ndinga na nzila ya baprofete, Yandi vwandaka kumonisama ya Ndinga yina me tubama. Mpe kana ba bokilaka profete nzambi, samu ti yandi vwandaka kumonisama ya Ndinga ya profete yankaka, wapi mutindu beno lenda bedisa Yandi na ntangu Yandi vwandaka kima mosi? Yandi vwandaka Mwana ya Nzambi, mutindu ba ke bokila Yandi Mwana ya Nzambi.

¹⁰⁷ Yandi vwandaka Mesiya ya nsilulu ya yinda yina yinza vwandaka vingila. Yandi vwandaka nsilulu ya Mesiya yina monisamaka.

¹⁰⁸ Beno tala Yandi ntangu Yandi telemaka kuna. Yandi tubaka, “Kana Mu ke sala bisalu ya Tata ya Munu ve, na yina beno bedisa Munu.” Beno me mona? “Kasi kana beno lenda kwikila Munu ve, beno kwikila bisalu yina Mu ke sala. Ya ke pesa kimbangi ya Nani Mu kele. Ya ke tuba na beno Nani Mu kele.”

Beno me mona, na ngunga ya mpofu yina, ya mpimpa yina bawu vwandaka kuzinga, bawu lendaka ve kumona Yawu. Bawu lendaka kaka kubakula yawu ve. “Wapi mutindu Yandi lenda

vwanda Yawu? Wapi mutindu Yandi lenda vwanda Mwana ya Nzambi, na yina Yandi butukaka awa na Bethlehem?” Kana bawu zabaka kaka, Ndinga tubaka ti Yawu ke salama mutindu yina. “Kasi, tata ya Yandi, Joseph, kele kisadi-mabaya. Kasi, mama ya Yandi, na kati ya bampangi ya beto ya kele ya kukwikila ya kieleka ti Yandi butukaka mwana ya makangu.” Beno me mona? Kasi dyaka Ndinga ya Nzambi tubaka yawu.

¹⁰⁹ Yandi tubaka, “Beno fyongonina Masonuku, samu ti na kati ya Yawu beno ke banza ti beno ke kuzwa Luzingu ya Seko, mpe Yawu kele Yina kaka ke pesa kimbangi ya Nani Mu kele. Yawu kele Yina ke pesa kimbangi ya Munu, Masonuku yayi ya Santu.” Na yina yinki Yandi vwandaka? Nsemo ya Nzambi. Kukondwa ntembe ti Yandi tubaka, “Mu kele Nsemo ya yinza.”

¹¹⁰ Yandi tubaka kaka ve, “Mu kele Nsemo,” kasi Yandi tubaka, “Beno kele Nsemo.” Kana Ndinga ya Yandi kele na kati ya beno, ke pesa kimbangi ya Yawu mosi, kuna beno kele Nsemo ya yinza. Beno tala, beto ke tala, Nsemo ya konso nsungi monisamaka kaka mutindu mosi.

¹¹¹ Na yina mu zola kupesa kyuvu, mutindu. . .ntete ntangu ya beto kuluta. Samu na yinki, samu na yinki kuna bawu vwandaka. . .bawu mangaka yawu? Wapi mutindu bawu zolaka sala yawu, na ntangu. . .Kaka Bibliya ya bawu, yina bawu vwanda tangaka, vwandaka ya kumonisama na ntwala ya bawu. Ntangu yayi beno fyongonina yawu kieleka mbote ntangu yayi.

¹¹² Ntangu yayi beno bambuka moyo, mu ke na kuzonzila na bantu mingi na ntangu yayi, beno me mona. Kaka bankama yiya to tanu awa ve, kasi mu ke—mu ke na kuzonzila na mafunda mingi.

¹¹³ Beno telama kaka minuti. Beno kanga bande ya beno mpe beno fyongonina kyuvu. Samu na yinki muntu ya nsambulu, muntu ya mbote. . .Samu na yinki Joseph zolaka kukiyufula? Beno me mona? Samu na yinki Jo- . . .? Samu yandi longukaka ntete ve Masonuku.

Samu na yinki banganga-Nzambi kukiyufulaka? Na kikuma mosi bawu salaka ve. . .bawu zabaka yawu. Nicodeme tubaka yawu mbote. Yandi tubaka, “Rabbi, beto zaba ti Nge kele mulungisi ya Nzambi. Muntu ve lenda sala yina Nge ke salaka kukondwa Nzambi kuvwanda na yandi. Beto kele ya kuzaba yawu.” Kasi yinki ya vwandaka? Binkulu ya bawu kubumbaka bawu na kusalaka yawu.

¹¹⁴ Na yina samu na yinki bawu vwandaka, bawu mangaka Mesiya? Ya kele sa- . . .Samu na yinki bawu mangaka Nsemo yina? Awa kele Ndinga yina bawu zabaka yina zolaka salama, kasi ntangu Ndinga talanaka na kulakisa ti Ndinga ya Nzambi kulungisamaka (Kufwanikisa yawu na bubu yayi. Beno me mona?) ntangu kuna, ya vwandaka ya kusonama na Ndinga, ti yina ke salama, na yina samu na yinki bantu yina mangaka

yawu? Milongisi. Samu bawu vwandaka zinga na kungenga ya nsemo mosi yankaka. Yawu yina. Bawu vwandaka zinga na kungenga ya nsemo mosi.

Yawu yina bawu ke na kusalaka bubu yayi. Bawu ke na kuzinga . . .

Kikuma bawu mangaka yawu kele samu ti bawu vwandaka zinga na kungenga mosi ya nsemo yankaka. Beno me mona? Ntangu yayi, bawu vwandaka zinga na kungenga ya nsemo yina Moise tubaka, bawu tubaka. Bawu vwandaka zinga na kungenga ya nsemo mosi yina (nsungi yankaka) lutaka.

Mpe ya kele kaka samu na yina bubu yayi ti Nsangu yayi, ti, “Yesu Klisto kele dyaka mutindu mosi,” me mangama, samu bantu ke na kuzingaka na kungenga ya nsemo ya bansungi yankaka. Na kikuma mosi, bawu ke manga Yawu. Ntangu yayi beto ke tala.

¹¹⁵ Mpe Webster ke tuba, ti, “Kungenga kele mutindu ya nsemo ya luvunu. Kungenga kele nsemo ya luvunu; ya kele kima nionso yina ke ngenga.”

Mutindu—mutindu maza ya luvunu na nzila. Beno ke kulumuka nzila, mingi ya beno yina ke na nataka matoma, mpe beno ke tala na yisi na ntuala ya beno. Ntangu beno ke mona mwini yina na zulu ya ntoto, ya ke lakisa nsemo, mpe mutindu maza ya luvunu, ya ke talana mutindu ya kele na maza bisika nionso ya nzila. Kasi, na ntangu beno ke kuma kuna, ya kele na kima mosi ve kuna. Ya kele kaka luvunu, maza ya luvunu, kungenga ya nsemo ya kieleka.

Ya kele yina diabulu ke na kusalaka bubu yayi, ke na kulakisa bantu maza ya luvunu, Lukutakanu ya Mabuundu, nkonga ya badenomination, yina ke basika samu na kuvwanda ya luvunu. Samu, ya kele samu ya kele na Nsemo ya kieleka ke na kulezima. Kana Nsemo yina ya kieleka vwandaka lezima ve, maza ya luvunu zolaka vwanda kuna ve. Nsemo ya kieleka lezimaka. Mpe ya kele . . . Ba ke na kuzinga na kungenga ya nsemo ya nsungi yankaka, ya kima yankaka, samu ti yawu bulaka mpe me luta.

Ntangu yayi, kungenga, maza ya luvunu yayi kele luvunu. Ya kele kungenga ya nsemo ya mwini.

¹¹⁶ Mpe ya kele mutindu yina, bawu salaka mutindu mosi, kungenga ya luvunu ya Nsemo ya kieleka.

¹¹⁷ Ntangu yayi, ya me siamisama ti Yandi vwandaka Nsemo ya kieleka. Yandi vwandaka Nsemo. Samu na yinki bawu zabaka ti Yandi vwandaka Nsemo? Wapi mutindu beno lenda zaba ti Yandi vwandaka Nsemo? Samu ti Ndinga yina ba silaka monisamaka na nzila ya Yandi, na yawu Yandi vwandaka Nsemo ya Ndinga yina me tubama. Amen! Oh, yina ke sala munu, Baptiste ya pentecote, na kuboka. Beno tala, beno banza na yawu!

118 Kungenga, beno me mona, na kuzingaka na kungenga mosi! Kasi na ntangu Ndinga ya kieleka kele moyo, yina kele Nsemo, yina Nzambi tubaka.

Ntangu yayi, yinki kana Nzambi tubaka, na mbandukulu, “Ti nsemo kuvwanda,” huh, mbote, mpe ya vwandaka na kima yankaka yina monikaka, beno me mona, kaka maza ya luvunu? Beno me mona, ya zolaka vwanda ve, ata ti, yina Nzambi tubaka. Ve, ya zolaka vwanda ve. Yinki kana Nzambi tubaka, “Ti nsemo kuvwanda,” mpe dibungi mingi kwizaka? Beno me mona, ya zolaka vwanda nsemo ve. Kasi, kikuma nsemo kwizaka, ya vwandaka Ndinga ya Yandi yina monisamaka.

Mpe bubu yayi, ntangu Nzambi me tuba bima ya mutindu ke salama na ntangu yayi, mpe beno ke mona yawu kusala yawu, (yinki ya kele?) ya kele Nsemo na zulu ya Ndinga ya Nzambi. Ya kele Ndinga me kuma Nsemo, na kumonisamaka Yawu mosi.

119 Ntangu yayi, bawu tubaka, “Nani Nge ke tuba ti beto kele? Mbote,” yandi tubaka, “Nge ke meka na . . . Beto zaba ti Nge kele kilawu. Mbote, Nge kele Samaritain; Nge kele ve na mabanza ya Nge mbote. Mbote, Nge ke meka na . . . Nani lenda tuba . . . Beto zaba ti Nge butukaka na disumu. Beto zaba ve kisika Nge me katuka. Beto kele ve na kima mosi ya kusonika ya kutalana ya Nge na kati ya bimvuka ya beto. Mbote, Nge kele kilawu. Nge kele na mpeve ya yimbi.” Beno me mona? Bawu tubaka, “Mbote, Nge kele na ngaanda ya mabanza ya Nge.” Kasi Yandi vwandaka kieleka, Nsemo ya kieleka ya Nzambi, yina vwandaka lezima.

Mpe kungenga kusalaka, kufwaka bawu meso. “Beto kele na Moise mutindu ntwadisi ya beto!”

120 Yandi tubaka, “Kana beno zolaka kwikila na Moise, beno zolaka zaba Munu.”

121 Mpe kana beno ke kwikila Yesu mpe Biblia, beno ke zaba ngunga yayi yina beno ke na kuzingila. Ba ke tuba, “Mbote, beto kele Baklisto. Beto . . .” Kana beno vwandaka, beno zolaka zaba bisalu ya Klisto samu na kilumbu yayi. Beno me mona, beno zolaka zaba yawu.

122 Yesu tubaka, “Baprofete nionso yina zonzilaka na Munu. Mpe kana beno ke kwikila baprofete yina, na yina, beno ke zaba Munu. Bisalu ya munu ke talisa. Samu, yina yawu ke tuba ti Mu ke sala, Mu ke sala yawu. Mpe nani lenda bedisa Munu na ntangu yayi ya kukondwa lukwikilu?”

123 Mpe dyaka bawu kumonaka yawu ve. Samu na yinki? Meso ya bawu kufwaka, na kungenga; beno me mona, kungenga ya kima yankaka yina bawu bakaka na yina Ndinga ya kieleka me tubama vwandaka. Ntangu yayi beno banza na yawu. Beno banza na yawu. Bawu vwanda tuba ti bawu kwikilaka Ndinga yina. Kasi binkulu ya bawu balulaka bizizi ya bawu na Ndinga ya kieleka, na kungenga mosi, na yawu bawu lendaka ve kumona kima mosi ya kieleka.

Mutindu mosi ya kele bubu yayi. Mutindu mosi ya me vwanda na bansungi nionso. Beno me mona, Ndinga ya kieleka ke lezimaka, kasi bawu kele mingi na kati ya binkulu, ti, bawu lenda ve kumona Ndinga yina. Bawu ke na kutala na kungenga mosi, mpe bawu kele ya kufwa meso. Kungenga ke kufwa beno meso. Ya kele na mukyama ke basika na yawu. Ya ke kufwa beno meso. Mpe, ya ke, na ntangu. . .

¹²⁴ Yesu tubaka, “Beno kele ya kufwa meso, ke na kutwadisaka bantu ya kufwa meso.” Bawu zolaka vwanda na lenda ya kumona yawu, na kumona Nani Yandi vwandaka. Kasi bawu lendaka ve, samu bawu vwandaka zinga na kati ya kungenga yina.

¹²⁵ Ntangu yayi, kungenga, mutindu mu me tuba, kele nsemo ya luvunu, maza ya luvunu, dibanza ya luvunu ya Nsemo ya kieleka. Dibanza ya luvunu; ya kele kima yina—yina zola kotalana mutindu Yawu, kasi ya kele Yawu ve.

¹²⁶ Ntangu yayi mutindu kaka bawu zolaka tuba luswaswanu, samu bima ya kieleka yina Yesu siamisaka Nani Yandi vwandaka, ti Yandi vwandaka Nsemo. Bawu banzaka ti bawu vwandaka na kati ya Nsemo. Kasi ntangu yayi kana beno telama kaka minuti mpe kutala nani kele na kati ya Nsemo, kuna.

¹²⁷ Ntangu yayi, bubu yayi! Kana mutindu ya nzimbani ya kukondwa kuyindula kusalamaka na bantu ya dibuundu ya kilumbu yina, mutindu ya kima ya kukondwa kuyindula kusalamaka, bampangi, beno banza ve ti ya kele ntangu ti beto ke telama mpe ke tala yinki kele Nsemo? Ti beto sala ve mutindu ya nzimbani ya kukondwa kuyindula. Kasi beno ke na kusalaka yawu. Beno me sala yawu yimeni, beno me mona, mpe zabaka yawu ve, mutindu mosi bawu vwandaka kuna. Ntangu yayi beno telema kaka mwa fioti mpe beno tala yina Ndinga me tuba samu na bubu yayi.

¹²⁸ Kana bawu telemaka mpe banzaka, “Awa Yandi ke na kulungisaka, landila bisono, ya kieleka yina Ndinga tubaka ti Yandi ke sala.”

Mpe Yandi teleminaka bawu, mutindu mu ke na kutelemina beno! Beno me mona? Beno me mona? Mu ke telemina beno na kutala na kati ya Ndinga, beno longuka Masonuku, beno tala kana yayi kele ngunga ve. Beno me mona? “Beni longuka Masonuku, samu na Yawu beno ke banza kuzwa Luzingu ya Seko, mpe Yawu kele Yawu yina ke pesa kimbangi ya Munu.” Yawu kele Yawu yina ke pesa kimbangi ya kusalu yayi bubu yayi. Bisalu yawu mosi ke pesa kimbangi ti yawu me salama, mpe Masonuku ke tuba ti ya ke salama, na yawu ya kele Nsemo ya ngunga. Ndinga ya Nzambi ke yawu.

¹²⁹ Binkulu ya beno mpe bima kele ya kieleka yina Biblia ke tuba, mutindu bayina ningisaka bayintu ya bawu mpe kwendaka. “Bamesa nionso me fuluka na bilusi,” Biblia ke tuba. Mpe ya kele kisika bawu vwandaka. Bawu zolaka kwikila yawu

ve. Bawu ningisaka bayintu ya bawu. Mpe, batata, beno ke bakula? Mpe, bampangi, beno ke bakula yayi, ti, na ntangu beno ke na kumanga kima ya kieleka yina Nzambi ke na kusiamisa na ntwala ya beno, ti beno ke na kusala kima mosi bawu salaka, na kuvutukaka na bilusi ya beno ya binkulu?

¹³⁰ “Mutindu yimbwa ke vutukaka na bilusi ya yandi.” Kana ya me sala yandi nganzi mbala ya ntete, ya ke sala yandi nganzi na mbala ya zole. Kana dibuundu ya Katolika, na kubongisaka mpe salaka organisation ya ntete, ya nataka nganzi na dibuundu; mutindu mosi ba-Luthérien, ba-Methodiste, mpe bayankaka nionso, ba-Baptiste, ba-Presbyterien, mpe ba-Pentecotiste. “Yimbwa ke vutukaka na bilusi ya yandi, mpe ngulu ke vutuka na potopototo ya yandi.” Beno me mona? Beto ke zonzila yawu na mwa baminuti, kana Mfumu zola.

¹³¹ Kungenga, kutambula na kungenga, beno me mona, maza ya luvunu, dibanza ya luvunu ya Nsemo ya kieleka. Yandi siamisaka ti Yandi vwandaka Nsemo.

Samu, Yandi, na kuvwandaka na . . . bantu fioti mingi, oh, la la, mafuku vwandaka telemina Yandi! Ya vwandaka ve na mosi ya sambanu ya bantu, makumi yivwa ya bantu, na zulu ya ntoto, yina zabaka ti Yandi vwandaka awa. Ve, mu banza, nkama mosi—mosi ya Bazwife, to na mpasi mosi ya makumi tanu ya bawu, to makumi yiya na kati ya bawu, mu ke tuba, ya lendaka vwanda yisi mingi kulutula yina, ya yinsi ya Yandi Mosi, zabaka ti Yandi vwandaka kuna. Mpe bayina zabaka ti Yandi vwandaka kuna, talaka Yandi kima mosi ya luvunu, samu ti denomination tubaka na bawu yina kele yina Yandi vwandaka. Beno me mona?

Kasi dyaka Yandi vwandaka Nsemo ya kieleka yina ba zonzilaka kubanda Genèse, na mbandukulu, mpe lombaka bawu na kutala Masonuku mpe kutala kana Yandi vwandaka zinga kaka ve na ntangu yina; kana Yandi, bisalu yina Yandi salaka, kulungisamaka ve ya kieleka yina ba silaka na ntangu yina. Amen. Oh!

¹³² Wapi dyambu ya kusakana ve ya kele, mpangi! Beto ke na kuzinga na ntangu mosi ya nene.

¹³³ Yandi siamisaka na kuvwanda kieleka. Yandi vwandaka Nsemo ya kieleka yina bawu tubaka ti bawu vwandaka sambila. Ba tubaka vwanda sambila Nsemo yina.

Mpe mutindu mosi ya kele bubu yayi. Ba ke tuba ti ba ke na kusambila Yawu. Bantu ya Pentecote ke tuba yawu. Bawu ke tuba ti bawu kele, mpe bawu kele ya kufwa meso mingi ti bawu lenda ve kumona yawu. Samu na yinki? Bawu salaka organisation, mpe, kasi kungenga na kizizi ya bawu. Beno me mona? Kinkulu kele yina bantu ke vwandaka kintwadi, mpe ke tuba, “Beto ke kwenda mpe ke sala *yayi* mpe *yayi*, mpe *yayi* mpe *yina*.” Ntangu yayi beto ke kuma na yinki yina fwana kusalama, kana Mfumu kuzola.

¹³⁴ Beno tala, bisalu ya Yandi vwandaka Ndinga ya moyo Yawu mosi. Yina Yandi salaka vwandaka Ndinga ya moyo Yawu mosi, na kulakisaka ti Yandi vwandaka Nsemo yina ba silaka kubanda mbandukulu ya yinza. Yandi vwandaka Nsemo yina. Nsemo ya Yandi na zulu ya Ndinga ya nsilulu ya nsungi salaka Yawu kuzinga ya kieleka yina nsilulu tubaka ti Yawu ke sala, kasi bawu balulaka Yawu mingi tii bawu lendaka ve kumona Yawu. Beno me mona? Kasi Yandi vwandaka Nsemo ya nsungi yina.

¹³⁵ Yandi vwandaka Nsemo yina bawu vwandaka tuba vwandaka sambila. Bawu banzaka ti bawu vwandaka sambila Nzambi ya kieleka ya luvangu. Bawu vwandaka zinga na kati mpe vwandaka sambila kungenga, mpe Yesu tubaka, “Beno ke sambilaka Munu mpamba, na kulongaka Malongi ya binkulu ya bawu ya bantu, mpe Ndinga ve.” Yandi kele Ndinga, mpe Yandi vwandaka Ndinga monisamaka. Bawu zolaka zaba yawu.

¹³⁶ Mu banza ti ya lenda luta, bisika nionso ya ke wakanaka, beno me mona, ti ya kele Ndinga monisamaka. “Oh,” beno ke tuba, “oh, beto kele na Ndinga.” Mbote, Ndinga, muntu nionso yina zola, ke tambula na Biblia. Kasi, ntangu Ndinga me siamisama, me monisama!

Na yina, beno ke tuba, “Mbote, beto ke kwikila!”

¹³⁷ Yinga, tata, bawu kwikilaka, nzila nionso. Mutindu mosi ke salaka Satana. Ba-Pharisien yina, nani zolaka bedisa bawu, ti vwandaka kwikila ve? Kasi bawu kwikilaka ve na Ndinga ya ngunga. Bawu vwandaka sambila kungenga ya kima yankaka.

Ya kele kima mutindu mosi ba ke na kusalaka bubu yayi. Beno me mona? Bawu ke simbidila yina Luther na ntwa- . . . binkulu, to—to binkulu ya Wesley, mpe ya bayankaka, kinkulu ya ba-Pentecotiste. Kasi wapi mutindu samu na ya ngunga?

Ba-Pharisien vwanda simbidila binkulu ya bawu. Kasi na manima ya binkulu ya bawu vwandaka Ndinga ya kieleka ya Nzambi yina vwanda kwiza na kulezima, mpe, ntangu Yawu salaka, Yawu kufwaka bawu meso. Ba zolaka mona Yawu ve samu bawu vwandaka tala kima yankaka.

Mutindu mosi ya kele bubu yayi! Ti Nzambi bika ya kota mbote, tii ya kieleka ya ke bula yinzo ya bantu yina lendaka kwikila yawu. Ntangu me luta ti beno ke banza yawu ve.

¹³⁸ Mwana ya munu ya bakala, Billy Paul, yandi ke zonzaka na kati ya pongi ya yandi, kasi yandi ke lotaka mingi-mingi ve. Yandi kuzwaka mosi mpimpa yankaka yina ningisaka yandi. Yandi tubaka ti yandi lotaka ti yandi vwandaka na dibuundu mosi, mpe—mpe bawu. . . Mu vwandaka me kuma ntete ve.

Yandi tubaka, ntangu mu kotaka, tiya vwandaka basika na meso, mpe mu tubaka, “Ntangu me kuma. Yimeni.”

Mpe bantu nionso bandaka na kuboka, “Mu lenda ve! Bana ya munu!”

139 Mpe ata kento ya munu tubaka, “Mu lenda ve kuzwa Sarah na kulomba lusakumunu na mesa,” mpe nionso yina. Mpe mu tubaka. . .

Yandi tubaka, “Mu fwana kwenda baka Loyce mpe—mpe bebe.”

140 Mu tubaka, “Loyce lenda kwiza ve ntangu yayi. Bebe kele ntwenia mingi na kuzaba. Billy, ngunga me kuma. Beto fwana kwenda.” Mu tubaka, “Ya me kuma kati-kati ya mpimpa ntangu yayi. Ntete nsemo kutalana, Yesu ke vwanda awa. Kana ya kele ve, na yina mu kele mbangi ya luvunu ya Klisto.”

Mpe muntu mosi zangulaka ndinga, tubaka, “Muntu ve zaba minuti to ngunga.”

141 “Mu tubaka ata mbala mosi ve muniti to ngunga. Mu tubaka, ‘Ntangu mosi na kati-kati ya ntangu yayi mpe kutalana ya nsemo.’” Mpe mu tubaka, “Beto—beto kwenda.” . . .? . . . Mu tubaka, “Kasi beto me kuma na ntangu. Beto kwenda.”

Mpe beto kotaka na ditoma, mpe bandaka, mpe beto bandaka na kumata mongo. Mpe ntangu beto salaka yawu, ya vwandaka talana mutindu ti nsemo vwandaka kwiza na mazulu, kasi mpimpa na zulu ya ntoto. Yandi tubaka mu sikamaka na lweka ya nzila, mpe simbaka maboko ya munu na zulu mutindu yayi, tiya vwandaka basika dyaka na meso. Mpe yandi tubaka mu tubaka, “Mfumu, mu me sala yayi na lutumu ya Nge. Mu me sala yayi kaka samu ti Nge me tuba na munu na kusala yawu mutindu yayi. Mu me sala bima yayi landila yina Nge tubaka na munu.”

Mpe mu fikulaka mongo mosi ya nene na bambuma; mpe Nsemo, kukondwa lusalusu ya diboko, katulaka Ditadi mosi na mongo, ya bankama ya batone ya bakilo, mpe awa Yawu ke kwiza. Mu tubaka, “Beno balula bayintu ya beno; beno tala ve. Nionso ke suka kaka na mwa ntangu fioti.” Yandi tubaka, na yina swi mosi ya nene ya santu kwizaka bisika nionso, na yina Ditadi yayi vwandaka belama na kisika.

142 Ntangu lendaka luta ti beto ke banza ve. Kuna, beno me mona, yina kele ya kieleka ya Masonuku, beno me mona, “Ditadi, kukondwa lusalusu ya diboko, katukaka na mongo.”

Mpe na yawu mosi ya bilumbu yayi ya ke vwanda mutindu yina, ntangu beno ke boka samu na kima mosi. Mu tubaka na bawu, “Beno kuzwaka yimeni ntangu yina. Nzambi bantangu nionso vwanda pesa beno malongi, ntangu na manima ya ntangu. Yinga.” Mu tubaka, “Ata ti ya kele mwana ya munu mosi, to nani ya kele, ngunga me kuma. Mu lenda tuba kaka yina Yandi me tuba na munu na kutuba, mpe ya ke vwanda kuna,” mpe ya vwandaka.

Mpe—mpe kuna, na mbala mosi [Mpangi Branham me bula maboko ya yandi—Mu.], awa Yandi me kwiza, “Ditadi me katuka

na mongo, kukondwa lusalusu ya diboko.” Daniel monaka yawu, beno zaba, bamvula mingi me luta. Billy zabaka kima mosi ve na yawu, kasi ya vwandaka—ya vwandaka ndosi yina ba tindaka yandi na Mfumu.

¹⁴³ Ntangu yayi, beno me mona, bawu tubaka vwandaka sambila Nzambi yina ya kieleka yina bawu vwandaka seka. Mpe kima mutindu mosi me salama dyaka bubu yayi, na kikuma mosi, na kuzingaka na kati ya kungenga mosi na kisika ya Nsemo. Bansemo ya Nene kele na kulezima. Mbote mingi.

¹⁴⁴ Beno tala na wapi mpimpa beto kele na kati bubu yayi! Beno tala yina ke na kusalama bubu yayi! Beno tala kufwa-bantu, kubaka bakento na kingolo-ngolo, kuswana! Na yina, ya me salama. Mu banza ti ya vwandaka Billy Graham yina tubaka, na lukutakanu ya yandi ya nsuka, “Na bamvula kumi kubanda ntangu yayi, konso sitwaye ya Californie ke tambula na munduki samu na kukikeba bawu mosi. Beno ke lenda ve kutula bapulusu mingi.” Bantu me kuma kaka bilawu; kukubula, kufwa-bantu, mpe kubaka bakento na kingolo, nionso, beno me mona. Ya me kuma kaka bulawu, beno me mona, na babala-bala. Beno me mona, ya kele—ya kele kilumbu na kati ya yina beto ke na kuzinga, kilumbu ya Sodome. Beno me mona?

Kasi ya kele na Nsemo ke na kulezima! Kana bawu lenda kutala kaka, kana bawu lenda kumona kaka, kutala na kati ya Ndinga mpe kumona yina zolaka vwanda na ngunga yayi, ba ke zaba yina ke na kumeka na kusalama.

¹⁴⁵ Ntangu yayi, bawu ke tuba ti bawu ke sambila Nsemo yina, mutindu mosi bawu tubaka ti bawu vwandaka sambila Nsemo yina, kasi bawu vwandaka sambila na kati ya kungenga ya nsemo yankaka na kisika ya ya kieleka. Beno me mona? Yandi vwandaka Nsemo.

¹⁴⁶ Ba-credo mpe binkulu, na nkadulu ya bawu ya kufwa meso, balulaka bawu na Nsemo ya kieleka ya Ndinga ya nsilulu. Ndinga yina Nzambi siamisaka, na nzila ya Yesu, Nsemo ya yinza, kwizaka mpe salaka Ndinga yina kuzinga kaka ya kieleka na nzila ya ntangu ya Yandi, ya kieleka na bilumbu yina. “Ba ke katula yandi na kati-kati ya basabala makumi sambwadi, ya kele kieleka, yina kele bamvula tatu na ndambu ya profesi ya Yandi. Mesiya ke kwiza, Mwana ya ntinu, mpe ke pesa profesi, mpe bilumbu tatu na ndambu ya yayi, kuna ba ke katula Yandi na bantu, mpe ke sala kukatula masumu.” Mpe ya kele ya kieleka. Yandi longaka bamvula tatu na ndambu. Mpe ya bawu. . .

¹⁴⁷ Mpe kaka Psaumes yina David tubaka, “Nzambi ya Munu, Nzambi ya Munu, samu na yinki Nge me yambula Munu?” Psaumes 22, “Mikwa ya Munu nionso, bawu ke tala Munu. Bawu ke ningisa bayintu ya bawu. Bawu ke luta na lweka ya Munu.” Bankama nana mpe makumi tanu ya bamvula, na ntwala, ntangu David yimbaka nkunga yina na Kimpeve, mpe ba talaka yawu

profesi, mpe yina pesamaka. Ba vwandaka yimba minkunga yina na tempelo ntangu Munkayulu mosi yina vwandaka ya kulelika na zulu ya kulunsi, na maboko ya Yandi, mpe ya kutobola. “Mpe bawu tobolaka maboko ya Munu mpe makulu ya Munu.” Beno me mona? Beno me mona kuna? Na yina, samu na yinki? Bawu vwandaka zinga na kati ya kungenga mosi. Bawu monaka Nsemo ve.

¹⁴⁸ Beno lenda banza muntu ya mayele ke sala mutindu yina? Kulutila ve ti mu lenda banza muntu ya mayele kukima na yisi ya yinzo mpe kukota na nsunga ya yawu ya kukangama, mpe ke kanga myelo ya yandi, mpe ke tuba, “Mu me manga kumona ti ya kele na nsemo.” Ya kele bulawu.

Mpe kimpeve ya yandi me syelumuka, kisika mosi, ntangu muntu ke mona ti Biblia me sila yayi, mpe kumona yawu kuzinga kaka na ntuala ya yandi mpe kumonisama, mpe na yina kulandila na kuvwanda na ba-credo yina mpe bima yina kuna yina ke manga Yawu. Ya kele bumpumbulu ya kimpeve. Ya kele kaka kieleka.

¹⁴⁹ Awa Yandi vwandaka ntangu yayi. “Yandi vwandaka—Yandi vwandaka Nsemo ya yinza, mpe yinza zabaka . . . Yandi kwizaka na baya ya Yandi mosi; baya ya Yandi Mosi zabaka Yandi ve. Yandi kwizaka na yinza, mpe yinza kusalamaka na Yandi, mpe yinza zabaka Yandi ve.” Beno me mona? “Kasi bayina nionso zabaka Yandi, na bawu Yandi pesaka ngolo na kukuma bana ya Nzambi, na bawu yina kwikilaka na Yandi.”

¹⁵⁰ Beno bambuka moyo, beto lenda zinga ve na nzila ya nsemo ya mazono. Nsemo ya mazono me kwenda. Yawu kele dyaka ve. Yawu, nsemo ya mazono, kele kaka lubambuku. Nsemo ya mwini kele kaka lubambuku, to, ya kele disolo. Beto lenda dyaka ve, kuzinga na nsemo ya mazono. Mpe mosi, ata ti ya kele mwini mosi, mwini mosi, kasi konso kilumbu yawu ke lezima na mwa ngolo ya yawu ya kulutila, samu na kuyelisa mbuma ya kuyonzika. Beno me mona?

¹⁵¹ Mwini yina ke kwiza bubu yayi, ke kuzwa mwa ngolo mingi. Konso kilumbu ntangu yayi ya ke kuzwa mwa ngolo mingi, mwa ngolo mingi, mpe na nsuka blé, yina kele ya kuvwanda kuna, ya ke—ya ke baka luzingu. Na manima ya mwa ntangu, luzingu ke basika, kuna mwa ngolo mingi, mwa ngolo mingi. Ngonda ya tatu, Ngonda ya yiya, Ngonda ya tanu, Ngonda ya sambanu, Ngonda ya sambwadi, yawu kuna kele na ntangu ya kubuka bambuma, beno me mona. Mwini mosi ke na kulezimaka bubu yayi, na—na Ngonda ya mosi to na Ngonda ya kumi na zole, yina kele na zulu kuna na kuyobisaka mvula ya mpembe yina mpe ke sulumuna mbumba yina, na kunataka yawu maza; ya kele mwini mosi, kasi ble yina lenda zinga ve na nsemo mosi yina ya mwini na Ngonda ya sambanu. Beno me mona, ya lenda sala yawu ve. Beno me mona, mwini ke kwizaka mwa ngolo mingi

konso kilumbu, mpe mbuma fwana vwanda mwa ya kuyela mingi na kuzwa nsemo ya mwini.

¹⁵² Yawu yina dyambu bubu yayi. Mbuma yina ba kunaka na batata ya ntete, na manima kuna na—na Luther mpe Wesley mpe bayankaka, yawu me kulumuka; ya lenda ndima Mwana ve. Mwana ke kufwa yawu. Ya ke manga na kukula. Beno me mona? Yawu ke zenga yawu, ya ke katuka yawu mosi na mwinga, mutindu, mpe ke kwiza *awa* mpe kukisalaka yawu mosi kima mosi ya fioti. Yawu kumaka mpusu, kuna, mpe Luzingu mosi ve na kati ya yawu. Mbuma zolaka kuma ya kukula mpe kukuma ngolo mingi, mutindu Mwana ke kumaka ngolo mingi konso kilumbu.

¹⁵³ Ntangu yayi beto tala mbote minuti. Beto ke tala mbote bansungi ya dibuundu. Ya kele na bansungi sambwadi ya dibuundu. Mpe mutindu bansungi yina ya dibuundu, mosi na mosi, beno tala mbote mutindu Yandi zonzaka na bawu yina ke sala, mutindu mbuma ke yela mpe ke kulumuka na ngunga yayi ya nsuka awa, ngunga yayi ya nsuka na kati ya yina beto ke na kuzinga. Na yawu mabuundu fwana sala kima mutindu mosi, beno me mona, mabuundu.

¹⁵⁴ Ntangu yayi beno tala, Luther kunaka mbuma, mpe Luther vwandaka mbuma mpe yandi kunaka yawu. Mbote mingi. Mutindu mosi vwandaka Wesley; mpe, dyaka, mutindu mosi vwandaka bantu ya Pentecote; mutindu mosi vwandaka ba-Baptiste, ba-Nazaréen. Kasi, beno me mona, ntangu yayi Luther ke vutuka ve mpe kuzinga na nsemo ya denomination ya ntete, ya Katolika. Ve, tata; yandi vwandaka nsemo yankaka. Ya vwandaka Nzambi yina vwandaka yelisa kima. Ntangu yayi mwa bantu fioti basikaka na yawu, reveil yina ba-Luthérien.

¹⁵⁵ Na manima me kwiza reveil ya Wesley, mpe kuna, na yina, mbote, bawu zolaka vutuka ve mpe kusala mutindu ba-Luthérien. Beno me mona?

Mpe kuna kwizaka ba-Pentecotiste. Mpe na manima bantu ya Pentecote kubongisaka mpe salaka kima ya mutindu mosi, bakaka mpusu. Beno tala.

¹⁵⁶ Kasi mbuma ke landila na kukwenda. Ntangu yayi beto kele na nsungi yankaka. Samu na yinki bawu ke ndima Yawu ve? Samu na yinki bawu ke mona ve ti mbuma me yela? *Awa* kele Ndinga ya nsilulu samu na kilumbu yayi. Samu na yinki bawu ke mona Yawu ve? Samu bawu ke na kuzinga na kungenga ya Luther, na kungenga ya ba-Wesleyen, na kungenga ya ba-Baptiste, na kungenga ya Pentecote. Bawu ke na kuzinga na kungenga ya nsemo yankaka. Ya kele samu na yina bawu lenda ve kuzwa Nsemo ya Ndinga ya muvimba yina me siamisa mutindu Nzambi silaka. Bidimbu Sambwadi yayi, kisika mansweki nionso kumonanaka, ke vutuka mpe ke tuba samu na yinki mansweki yayi kusalamaka mutindu yina; mpe, dyaka, na

ntangu yina ke kwiza, bawu ke kwenda ntama mingi na Yawu kulutula ntangu nionso. Bawu kele kukondwa esikize.

¹⁵⁷ Nzambi me sala yawu na nzila ya Kimpeve, na nzila ya baluzayikisu. Yandi me—Yandi me siamisa yawu na mutindu ya kulunga, na nzila ya science mpe na nionso yankaka, ti ya kele Kieleka, ti ya kele Kieleka. Mpe dyaka bawu zola kuzinga na kati ya kungenga ya Pentecote, “Mu kele ya ba-Assemblee! Mu kele ya ba-Unitaire! Mu kele ya Dibuundu ya Nzambi! Mu kele ya *yayi!*” Beno me mona, ke na kuzinga na kungenga ya bamvula makumi yiya, makumi tanu me luta. Ke na kuzinga na kungenga ya Luther. Ke na kuzinga na ya Wesley, na ya ba-Baptiste, na ya ba-Presbyterien, to ya mwa ba-Nazaréen, na kungenga ya nsungi ya dibuundu yankaka yina kwendaka mpe salaka organisation mpe salaka kima mutindu mosi, mpe ke manga mpe ke losa Nsemo na yina Yawu ke na kulezimaka ya kieleka.

¹⁵⁸ Mpe beno ke na kuzinga na kati ya maza ya luvunu. Mu ke tuba yawu na buzitu nionso, beno me mona, kasi beno kele. . . ve samu na kuniongisa beno, kasi samu na kuvumbuka beno. Beno ke na kuzinga na kati ya maza ya luvunu.

Yinki kana Yesu, tubaka “Mbote, beno kele mpofo, mpe beno ke na kutwadisa bampopo”? Bawu lendaka ve. . . Yandi mekaka na kutuba na bawu; mpe ya simbaka ve. Yandi tubaka, “Beno bika bawu. Kana mpofo ke twadisa mpofo, bawu nionso ke kubwa na dibulu.” Ya kele ngunga mu me kwiza! Kana ba ke kubwa, mu lenda sadisa yawu ve. Mu me sala nionso mu lenda sala. Mu me sala ya kieleka.

Mu me sala yayi na lutumu ya Nge, Mfumu. Nge kele mbangi.

Tuka mvula 1933, kuna na nzadi, ntangu Nsemo yina kuna beno monaka, lezimaka, Ya vwandaka kaka awa na tabernacle mpe pesamaka kimbangi na beno, bamvula nionso yayi. Mpe nionso yina Yawu tubaka kusalamaka. Mpe bawu ke landila na kukwenda na ntwala. “Ti mpofo kutwadisa mpofo.” Mu ke vingila kaka na ngunga yina; Yandi ke kwiza, mosi ya bilumbu yayi.

¹⁵⁹ Beno tala, ke zinga na kungenga ya Luther, ke zinga na kungenga ya Wesley, ke zinga na kungenga yina ya ntama kuna, ya kele samu na yina bawu lenda kumona Nsemo ya kieleka ve. Kana bawu lenda telema mwa ntangu fioti, mpe kubaka kaka Biblia mpe kutanga Yawu, ba ke mona ti. . . yayi kele Nsemo yina ba silaka samu na ngunga.

¹⁶⁰ Ntangu yayi beto ke baka mwa bima yayi na minuti mosi. Yandi silaka, landila Malachie 4, bima yayi ke salama. Yandi silaka, na nzila ya Masonuku nionso, ya ke salama. Beno me mona?

¹⁶¹ Beno tala Israel mpe, kifwanukusu ya beto, na nzyetelo. Beno tala, vwanda kudya mani, yina vwandaka Nsemo ya bawu, Luzingu, yina pesaka bawu ngolo, Luzingu. Ya kele kieleka?

Israel zola kudya ve mani yina kubwaka na bawu mazono. Ya bebaka. Ya bolaka. Ya vwandaka ve mbote samu na bawu. Ba zola kufwa, na yawu. Mani yina bumbaka bawu ya moyo mazono zolaka kufwa bawu bubu yayi. Biblia ke tuba ti ya kuzwaka bamiklobe na kati ya yawu, ya bebaka. Mpe mani, bawu zolaka kuzwa mani ya malu-malu konso kilumbu. Amen.

Mpe yinki ya kele? Bantu yina ke zinga na mani ya Luther, Wesley, mpe ya bayankaka ntama kuna, beno ke na kudya kima ya kubola yina ke na kufwaka beno, na kimpeve. Ya ke na kufwaka beno, beno ke kufwa na binkulu ya beno.

¹⁶² Ya mazono, mani ya Luther, ke simba ve samu na ba-Methodiste. Mani ya ba-Methodiste ke simba ve samu na ba-Pentecotiste. Mani ya Pentecote ke simba ve samu na bubu yayi. Beno me mona yina mu zola kutuba? Konso kilumbu yawu ke kwizaka, kilumbu na manima ya kilumbu, ya malu-malu, mpe mutindu mosi ya me luta na bansungi ya dibuundu.

Mani ya Luther vwandaka nsangu ya mvedolo. Nsangu ya wesley vwandaka kumonisama ya kusantisama. Pentecote vwandaka kuvutula ya makabu. Kasi yayi ke na kukotisa Ditadi ya yintu, kilumbu ya nsuka, Yinti ya Kento ya makwela, yina kele ya kuswaswana na nionso ya yawu, mpe dyaka Yawu kele Nsemo mosi samu na yina me yela.

Mutindu mwini mosi, ke lezima bubu yayi, ke yelisa mbuma samu na kuyonzika na Ngonda ya sambwadi. Beno me mona yina mu zola kutuba? Kasi nsemo bubu yayi ke sala mbote ve kuna na Ngonda ya sambwadi. Ya kele ngolo mingi. Blé me kwenda mingi na ntuala; ya me yilama na kubaka yawu. Amen. Ya kieleka ya kele. Ba zolaka baka yawu ve ntangu yayi; ya lenda kuna. Nsungi vwandaka mbote ve, na yina; ya kele ntangu yayi.

¹⁶³ Beno lenda ve kukwenda na kutelemina nkadulu ya Nzambi. Yandi kele na musiku, mpe, na kuswaswana na musiku yina, ke kufwa kimenina ya beno. Beno fwana kwenda landila misiku ya Nzambi zonzaka, mpe misiku ya Yandi kele Ndinga ya Yandi. Musiku nionso kele ndinga tubamaka. Mpe ndinga kele dibanza yina me monisama. Beno me mona? Ntangu yayi beto—beto zaba ti ya kele kieleka.

¹⁶⁴ Vision kele yinki? Ndinga ya Nzambi, to kima yina ba zonzaka na ntuala, to kubanza ya dyambu. Mpe vision yina bapofete kuzwaka, mpe yina Yesu kuzwaka, yina Paul kuzwaka, mpe bawu nionso, mpe kutuba na kilumbu yayi, vwandaka kubanza ya yina zolaka salama. Mpe awa beto ke mona kubanza kumonisama, mpe bantu ke zaba kaka yawu ve. Beno me mona yina mu zola kutuba? Ntangu yayi, mani ya mazono . . .

¹⁶⁵ Beno tala awa. Beno me talaka ntete, mwini, m-w-i-n-i, me zyetaka, Esete na Wesete, mutindu yawu ke kwendaka konso ntangu. Beno me talaka yawu? Mpe, beno tala, bansungi ya dibuundu salaka kima mutindu mosi. Yinki? Mwini, m-w-a . . .

m-w-i-n-i, bandaka na Esete. Mpe sivilisasyo me zyeta na mwini, nsemo yina Nzambi zonzaka samu na bawu na kuzingila na kati. Ba me landila, na kulandaka mwini, na kumonaka kisika ya vwandaka kwenda.

¹⁶⁶ Luzingu yawu mosi, ntangu beno ke butuka, ya kele mutindu mwini. Beno kwenda, mbala mosi na kisika ya kulala ya mwini, katuka mbutukulu ya beno na kuvwanda ya mwini.

¹⁶⁷ Muntu ke zyetaka ntangu nionso, na wesete. Sivilisasyo ya ntama yina kele na beto kele ya Chine, na bayinsi ya esete. Jérusalem. . . Mpe, beno tala, yandi ke landila na kuzyetaka na wesete yandi ke kwenda, mpe na yina yandi ke landila mpe ke landila, na Wesete.

¹⁶⁸ Mutindu mosi me zyeta nsungi ya dibuundu mutindu mosi, na nzila ya M-w-a-n-a ya Nzambi. Beno tala, Paul, dibuundu ya ntete, bandaka na Esete; yandi kwendaka kubanda kuna, me sabuka mubu, kuna na Allemagne. Yawu me sala bakubenda tatu. Beno tala awa. Kubanda Asie, kuna na—na Palestine, ya me sabuka mubu tii na Allemagne; yina vwandaka Luther. Mpe ya me dumuka na Luther, na lweka yankaka ya Manche, kuna na Angleterre; na Wesley. Mpe kubanda Wesley, yandi me dumuka na Simu ya Wesete, tii na Etats-Unis. Mpe yayi, kana beno kwenda ntama, ya ke na kuvutuka dyaka na Esete. Yayi kele ntangu ya nkokila yimani.

¹⁶⁹ Beno tala mutindu bansangu ya dibuundu me nwana. Luther. . . Paul, ntete, kuna na nsungi ya ntete; na manima kulumukaka na Irlande, na Irénée, mpe nionso yina; tii na France; katuka kuna, na Allemagne; na Angleterre; ntangu nionso ke na kwenda Wesete.

Mpe ntangu yayi beto lenda kwenda ntama ve. Yayi kele nsungi ya nsuka. Mpe yinki Biblia ke tuba samu na nsungi yayi ya nsuka? Beno me mona, landila géographie, mpe landila ba-chronologiste, mpe pene nzila nionso beno zola kubaka yawu. Landila Masonuku, ntete; Masonuku, ya kieleka, ntete. Kimbangi, landila masolo, mutindu nionso beno zola kubaka yawu, beto me kuma na nsuka, nsungi ya dibuundu ya nsuka.

¹⁷⁰ Mpe, beno tala mbote mbote, na yina ya vwandaka kwenda na ntwala ya vwandaka kuma ngolo mingi mpe ngolo mingi. Mpe mutindu mosi samu na Dibundu ya kieleka ya mwa fioti, kulaka na kunungisama, kusantisama, mbotika ya Mpeve-Santu, mpe ntangu yayi tii nkwezulu ya Ditadi ya yintu, na kufikaka yawu mosi na zulu. Ata organisation dyaka na manima ya yayi. Ya ke vwanda dyaka ve. Beno me mona, ya lenda vwanda ve, beno me mona, beto kele na Wesete.

¹⁷¹ Kaka samu na kulakisa beno, na nzila ya bifwanukusu nionso mpe nionso yankaka. Mpe beno tala kudumuka tatu yina, kubenda tatu. Beto ke kota na yawu na nkokila yayi, beno me

mona, beno me mona, mutindu beto kele na ntangu ya nsuka. Ya kele kaka . . .

¹⁷² M-w-i-n-i me zyeta mutindu M-w-a-n-a; M-w-a-n-a mutindu m-w-i-n-i. Dibuundu me kwiza na kima mosi, kubanda Bansungi Sambwadi ya Dibuundu, mpe nionso yina. Sivilisasyo me landila na Wesete, mpe Dibuundu me landila na Wesete. Mpe ntangu yayi kana beto kwenda ntama mingi kulutila yina beto kele ntangu yayi, beto ke vutuka dyaka na Esete. Beno bika Simu ya Wesete, beno ke vutuka kaka na Chine, na Japon, mbala mosi dyaka na manima. Kusabuka bakilometele mafunda kumi na mosi na bankama zole, beno ke vutuka dyaka mbala mosi na Esete. Na yawu, Esete na Wesete me kutana, yawu yina nionso ya yawu. Beto me kuma na nsuka. Kima mosi ve me bikana.

¹⁷³ Mpe kima mosi ya mutindu mosi me salama, bubu yayi, yina salamaka kuna. Kima ya mutindu mosi me salama na Wesete kele yina salamaka na Esete. Bantu vwandaka zinga na kungenga ya nsemo yankaka yina vwandaka meka ya kieleka kulakisa Nsemo yina ke kwiza, mpe ke manga Yawu, samu bawu vwandaka na kungenga na kisika ya Nsemo. Oh! “Mpe ya vwandaka na Nsemo ya nene na yinsi ya Bantu ya makanda; na Zabulon, Nephthali; ya Galilée, . . . na Galilée, yinsi ya Bantu ya makanda.”

¹⁷⁴ Yayi kele nsungi ya dibuundu ya sambwadi. Beno bambuka moyo, mpe konso ntangu yina mwini ke banda na kulezima na Esete, ya kele mwini mosi yina ke lezima na Wesete. Mpe Mpeve mosi yina vwandaka nzila nionso na bansungi, mutindu yina, kele Mwana ya mutindu mosi bubu yayi. Kaka, yinki ya kele? Kaka mutindu kuyelisa, nsungi. Mwini yina kele ntangu yayi, ke vwanda mwini mosi yina ke yelisa mbuma automne yayi, automne yayi, beno me mona, kasi (yinki ya kele?) ya kele mwini na kubwela yina ya ke vwanda. Mpe bubu yayi, na nsungi yayi ya nsuka, ya kele yina bawu vwandaka, kubwela Yayi.

Mpe dyaka bawu zola kuzinga na manima kuna, mutindu kinkufini, kukulumuka na kisika ya nsunga ya kukangama, ya ntama ya interdeno- . . . na yisi ya yinzo ya ntama ya ba-denomination mpe ke benda balele ya bawu ya nela, ke tuba, “Mu me manga kaka na kumona Yawu. Ya kele nionso buzoba.” Mpe na ntangu Biblia ya kieleka, yina bawu ke tuba ti bawu ke kwikila, ke talana na nzila ya Mpeve-Santu mosi yina ke nata Nsemo na bilumbu ya nsuka!

¹⁷⁵ Beno me tala? Mpe beno tala mbote-mbote kuna na Malachie, mutindu yandi vwandisaka yawu, “Lukwikilu ya batata na bana, mpe ya bana na batata.” Beno me mona, Mpeve mosi yina kisika Yawu telamaka na manima kuna, kisika Yawu ke telama dyaka awa, kima mutindu mosi. Beno me mona, kaka mutindu yayi mpe yankaka, ya kieleka, ke vwanda dyaka na manima. Samu ti, samu na yinki? Esete mpe Wesete me kutana.

Kaka ya kieleka na ntwala ya kizizi ya beto, mpe dyaka ba ke mona yawu ve. Samu na yinki? Kuyituka ve ti Yesu tubaka, “Beno bika kaka bawu, kuna. Ba kele bampofu, ke na kutwadisa bampofu, bawu nionso ke kubwa na dibulu.”

¹⁷⁶ Nsemo ya bansungi yankaka vwandaka lakisa kaka Nsemo yayi. Beno me mona? Mwini bubu yayi ke lakisa kaka, kele kifwani ya mwini yina ke vwanda na Ngonda yayi ya sambwadi to na Ngonda ya nana, kana Nzambi. . . samu na kuyonzika. Mpe Mwana, ya Luther, ya Martin Luther, mpe ya Wesley, mpe ya Sankey, ya Finney, ya Knox, ya Calvin, ya Moody, ya bawu nionso yankaka, bantu ya nene yina kuna vwandaka na nsemo yina; mpe John Smith ya dibuundu ya ba-Baptiste, mpe Alexandre Campbell, dibuundu ya ba-Campbellite, mpe bayina ba ke bokilaka Bilandi ya Klisto, Dibundu ya Baklisto, mpe bankumbu nionso yina ba kele na yawu samu na bawu. Bantu yayi nionso kuna na manima, na bansungi ya bawu, vwandaka lakisa kaka yina yawu ke vwanda awa na nsuka.

¹⁷⁷ Mpe na manima awa, bana, na mbala mosi na manima ya mitungi ya bawu, yinki bawu salaka? Bawu vwandaka ve na zulu ya mwinga. Bawu kwendaka ntama na Yawu mpe salaka samu na bawu mosi mpusu na ngaanda ya kima awa. Na yina, kana beno katuka yinto ya kieleka ya Luzingu, beno kele na Luzingu ve. Beno ke katula mpusu na zulu ya yawu, mpe beno kuna awa na ntoto, ya ke lala mpe ke bola. Mpe mutindu mosi kele beno, na kumekaka na kudya mani ya kubola ya bilumbu ya ntama yina.

Bambuma me yela! Yesu me kubika mesa, kisika basantu ya Nzambi ke kudya Madia ya kuyela ya kilumbu, na nzila ya Nsemo ya Nsangu ya mbote yina ke pesa kimbangi mpe ke siamisa ti Yandi kele awa bubu yayi. Amen. Basantu ke kudya Dimpa.

¹⁷⁸ Beno banza kaka. Mpusu ya ntama ya mazono, beno me mona, beno vutuka na kukuna yawu ve kuna. Ya me bola. Ya lenda ve, ya lenda vwanda ve na yawu. Ve, tata. Ya ke sala ata mbote ve. Ya ke yela ve. Ya ke na Luzingu ve; mpe Ndinga kele Luzingu. Ya kele kieleka. Mpusu ke kubwaka, mwa mandefo ya ntama ke kubwaka, mpe bima ya mutindu yina. Yawu ke sala kaka denomination yawu mosi mpe ke kubwa. Yawu ke manga na kukwenda na ntwala na Luzingu.

Kasi Nsemo ke siamisaka Yawu. Oh, la la! Yinga, tata.

¹⁷⁹ Ya mazono, oh, la la, mutindu beto fwana mona yawu! Beno me mona, ti, bima ya kubola ya mazono, beno kudya yawu ve bubu yayi. Beno me mona? Ya kele na misobi na kati ya yawu. Beno zaba yina mu ke bokilaka mwa mafundi yayi? Mu zaba ve. Mu—mu zaba mingi ve na yina me tala luzingu ya bamiklobe, kasi mu zaba ti beto ke bokilaka yawu ntangu nionso mafundi. Ya ke kotaka na kati ya kima nionso ntangu ya ke bolaka fioti. Beno me mona? Mu zola yawu ve kuna. Kana beno ke sepela

na yawu, beno kwenda na ntuala, kasi munu ve. Kasi beno bambuka moyo . . .

Beno ke tuba, “Na yina samu na yinki ya vwandaka mbote mazono?”

¹⁸⁰ Kana beno zabaka kaka ti mwa nzutu yina vwandaka na zulu ya blé na mbandukulu, kana ya vwanda na kati ya mbuma, ya ke sala mbuma kukula. Ya kele kieleka kima yina ke salaka fololo ya blé, ya kele yina vwandaka mazono; kasi kana yawu ke kabuka yawu mosi na mbuma, mpe ya me kula ve, kuna ya ke zimbana. Beno me mona? Kasi kana ya lutila na nzila ya nsadulu, na nsadulu ya kupesa luzingu, mutindu ya ke kufwa ya ke kota kaka na kima yankaka mpe ke sala mbuma. Kana ya kele ve, wapi kisika ya ke katuka? Amen. Beno me bakula yawu?

¹⁸¹ Mutindu Ntinu ya kento ya Angleterre, mbala mosi, yandi kwendaka na kompani ya nene ya ba-papié, mpe yandi tubaka ti yandi ke zola kumona binikunu ya ba-papié. Na yawu ba lakisaka yandi binikunu ya ba-papié, bamvula mingi me luta ntete ba banda na kusala yawu na kiputi ya ba-papié mpe nionso yina, na yawu ba talaka . . . ke salaka ba-papié na nzila ya yawu. Na yina bawu, mbote, na manima ya mwa ntangu fioti, yandi kotaka na kivinga mosi kisika ya vwandaka na kima yankaka ve kasi kikunku mosi ya nene ya bitende ya mvindu, mpe yandi tubaka, “Wapi kisika yayi me katuka? Yayi kele yinki? Oh,” yandi tubaka.

Ntwadisi ya kompani me tuba, “Yayi kele—kele na yina beto ke sala ba-papié, na bitende yayi ya mvindu.”

Yandi tubaka, “Na yina, kusala bapapiye?”

“Yinga.” Na yawu na mpasi yandi lendaka kukwikila yawu.

¹⁸² Na yawu na manima ntangu yandi kwendaka, muntu yina bakaka kinkuku mosi yina ya bitende ya mvindu, mpe lutisaka yawu na nsadulu mosi, mpe basisaka yawu ya kutsyema, papié ya mpembe, beno zaba, ya lutaka na nsalulu mosi mpe salaka ya kieleka . . . Mpe yandi tulaka foto ya ntinu ya kento na kati ya yawu, mpe fidisaka yawu na yandi, na kulakisaka yandi mosi na yayi yina yandi bokilaka “bitende ya mvindu.”

¹⁸³ Ntangu yayi ya kele yina yawu kele. Bima ya kufwa ya mazono, nsangu ya Luther, nsangu ya Wesley, nsangu ya Pentecote, kana ya lenda lutila kaka na nsadulu ya Mpeve-Santu ya Nzambi mpe ya Ndinga me siamisama, yina ke nata kifwani ya Yesu Klisto, Ntinu. Amen. Kasi kana beno bika yawu kuna, ya kele bitende ya mvindu. Beno me mona?

¹⁸⁴ Ya fwana vwanda ya kusala na kati ya kima yankaka. Luther fwana vwanda ya kusala na kati ya Wesley, mpe Wesley fwana vwanda ya kusala na kati ya Pentecote, mpe Pentecote fwana vwanda ya kusala na kati ya Klisto. Ya ke lutilaka na nzila ya nsadulu mosi. Mutindu mosi lutilaka Nsangu ya mbote

na nsadulu mosi. Ya ke na kulutaka na nsadulu. Nsungi ya Luther, ya kunungisama, beto ke kwikila yawu; ya Wesley, ya kusantisama, beto ke kwikila yawu; ya ba-Pentecotiste, ya kuvutula makabu, samu na Mpeve-Santu, beto ke kwikila yawu, ya kieleka. Kasi, kusala yawu nionso kintwadi, na yinki beno ke basika? Yesu, kaka, mutindu mosi mazono, bubu yayi, mpe ntangu nionso. Oh! Ya ke basisa Yesu.

¹⁸⁵ Ntangu muntu na kompani yina ba ke vukisaka bisengo ke salaka ngunga, yandi kele na tone mosi yandi fwana kutula na yawu. Ntangu yandi ke vwanda na kusala kisadulu ya yandi mpe kudukula nsongo ya yandi, bisengo mingi, mitaku mingi. Samu na yinki? Yandi zaba kaka ya kieleka lutangu ya kutula, samu na kusala, ke pesa yawu tone ya kulunga.

Mpe ya kele yina Yesu salaka na ya Kento ya Yandi ya makwela. Yandi zolaka tula Luther mingi, ba-Methodiste mingi, mpe ba-Presbyterien mingi, ba-Pentecote mingi, na kati ya yawu. Kasi na yinki Yandi ke basika? Na kifwani ya Yandi Mosi.

Yinki ya kele? Kaka mutindu Nsangu ya pyramide, beno me mona, ya ke na kubaka nzutu, yayi, kukota na lutangu ya fioti, na Ditadi ya yintu. Ministele ya Yesu Klisto, na zulu ya ntoto, fwana vwanda mutindu mosi na ministele Yandi kuzwaka, to Yandi lenda kwiza na yawu ve. Kaka mutindu yintu, na makulu. Yintu. . . Makulu kele ve yintu, kasi yintu ke nataka makulu, to ke salaka makulu, ke tubaka na yawu kisika ya kukwenda. Beno me bakula yawu? Na mutindu ya kitoko, ya kele Nsemo ya ngunga.

¹⁸⁶ Wesley vwandaka Nsemo ya nene. Mutindu Yandi tubaka na Jean Baptiste, “Yandi vwandaka Nsemo ya nene samu na ngunga ya yandi.” Ya kieleka, yandi vwandaka.

¹⁸⁷ Ve. Yinga, tata, bitende ya kutsyema. . . To, bitende ya mvindu ya mazono, kana beno bikana mutindu yina, ya fwana. . . ya ke kuma kaka bitende ya mvindu ntangu nionso. Ya me sadila kikuma ya yawu, mutindu bilele, kasi ntangu yayi ya me kuma papiye.

Kunungisama me sadila ntangu ya yawu, na kununisama na yisi ya Luther, na manima ya fwana kuma kusantisama na nzila ya Wesley. Mpe kusantisama sadilaka ntangu ya yawu, tii ya kumaka mbotika ya Mpeve-Santu. Mpe mbotika ya Mpeve-Santu sadilaka ntangu ya yawu; tii Mpeve-Santu (na yina, ya kele kaka na Nzambi mosi) ke kota na Dibuundu, mpe Dibuundu ke kota na Klisto, mpe ya ke sala Yesu Klisto kutalana na zulu ya ntoto, yina Yandi silaka awa na kati ya Biblia. Beno lendaka kwikila yawu ve; mu lenda sala beno ve kukwikila yawu. Mu kele kaka na kizitu ya Ndinga. Beno me mona? Ya kele kieleka.

¹⁸⁸ Na yawu beno me mona yawu? Beno ke mona yawu? Kana beno mona yawu, ya ke vwanda mutindu muntu yina kwendaka na. . . na ntangu mosi, kwendaka kuna na yinsi ya Galles, na

ntangu ya reveil ya Galles. Nkonga ya bantu basikaka na Etats-Unis. Na yawu bawu kwendaka, mpe bawu tubaka ti bawu vwandaka sosa kuzaba na wapi yinzo ba vwanda sala reveil yayi ya Galles. Mingi ya beno ke bambuka moyo na reveil ya Galles, reveil ya nene yina mwanganaka na kati-kati ya Bantu ya yinsi ya Galles. Na yawu bantu yayi, milongi ya nene yayi, mpe nionso yina, basikaka na Etats-Unis, bawu vwandaka milongisi ya théologie. Bawu zolaka kukwenda kuna mpe kumona wapi kima ya nene bawu salaka, beno zaba.

Na yawu bawu vwandaka tambula na bala-bala, mpe bawu tubaka . . . kutanaka na mwa pulusu mosi ya kukula yina vwandaka ya kutelama na nsongi, yina vwanda ningisa munduki ya yandi, beno zaba, mpe vwanda bula nkunga na mwita, mutindu yina. Bawu tubaka, “Mbote, yandi ke na bulaka kaka nkunga na mwita. Beto lendaka belama, mpe kumona yandi, kumona yina yandi ke sala. Mbote, kuyufula yandi.”

Na yawu bawu belamaka na yandi, mpe tubaka, “Tata, wapi kisika reveil ya Galles kele?”

¹⁸⁹ Yandi bendaka yimpu ya yandi; yandi tubaka, “Batata, reveil ya Galles kele na kati *awa*,” na kati ya ntima ya yandi. Oh, yawu yina, yandi vwandaka reveil ya yinsi Galles.

O Nzambi, kana beto lenda kaka—kaka kubakula ti beto kele kifwani ya Yesu Klisto, Ndinga ya Yandi yina me monisama. Beno kele kifwani ya Ndinga ya Yandi. Beno me mona?

“Wapi kisika kele Reveil ya yinsi ya Galles? Na wapi yinzo ya kele?”

Yandi tubaka, “Tata, ya kele na kati ya ntima ya munu.” Yandi vwandaka reveil ya yinsi Galles. Ya kele kieleka.

¹⁹⁰ Mpe bubu yayi Dibuundu fwana vwanda Yesu Klisto na kisalu na zulu ya ntoto. “Samu Mu ke zinga, beno mpe ke zinga; mpe Luzingu ya Munu ke vwanda na kati ya beno. Bisalu yina Mu ke sala, beno ke sala yawu mpe.” Beno me mona? Dibuundu fwana kuma na kisika yina, mpe. Mpe Yandi silaka ti ya ke sala yawu, mpe ya ke vwanda. Ya fwana kwiza mutindu yina. Na yawu, beno me mona, ya kele yina ke salamaka. Beto, beto fwana vwanda mutindu yina.

Yandi kele Nsemo.

¹⁹¹ Mutindu mosi Noé vwandaka Nsemo na kilumbu ya yandi. Yandi vwandaka Nsemo. Noé vwandaka Nsemo yina. Yandi vwandaka Nsemo na yinki? Samu na kusala Ndinga ya Nzambi, “Mu ke bebisa muntu na zulu ya ntoto, yina Mu vangaka. Tunga nzasa, mpe bayina nionso ke vwanda na nsatu ya kukota ke kuzwa mpulusu.”

Noé kwendaka kuna, yandi tubaka, “Ya kele na nzila mosi, mpe ya kele nzasa.”

¹⁹² Bawu tubaka, “Kiboba ya fanatiki.” Yandi vwandaka Ndinga yina me monisama. Noé vwandaka Nsemo ya ngunga, ya kieleka yandi vwandaka. Na kilumbu ya yandi, na nsungi ya yandi, yandi lakisaka Nsemo.

¹⁹³ Moise vwandaka Nsemo ya ngunga ya yandi. “Ya kieleka Mu ke kwiza tala nge,” Nzambi tubaka na Abraham. “Mu ke kulumuka, mpe Mu ke basisa bantu ya Munu, na diboko ya ngolo, mpe Mu ke lakisa ngolo ya Munu na Égypte.”

Mpe ntangu Moise kuna kutanaka divunda ya tiya yina kuna, mpe talaka ti MU KELE vwandaka na divunda ya tiya yina, Moise kwendaka kuna, mpe yandi vwandaka Nsemo. Amen. Kukondwa ntembe ti yandi zolaka baka mwa fundu-fundu, mpe kufula yawu mpe kutuba, “Ti kuna basika bankasa na zulu ya ntoto.” Yandi vwandaka na Ndinga ya Nzambi. Yinki kusalamaka? Fundu-fundu bandaka na kufula, mpe bankasa bandaka na kukwiza na luzingu. Aleluya! Samu na yinki? Yandi vwandaka kumonisama ya Nsemo ya Ndinga ya Nzambi, “Mu ke talisa Egypte mpasi.” Yandi vwandaka profete. Yina yandi tubaka salamaka. Yandi vwandaka Nsemo ya kilumbu yina. Yandi vwandaka Nsemo ya Nzambi.

¹⁹⁴ Pharaon zola kuzwa nionso yina yandi zolaka kuzwa, mpe bayankaka ya bawu, banganga-Nzambi nionso vwandaka na yina bawu zolaka, kasi Moise vwandaka Nsemo. Samu na yinki? Yandi vwandaka lakisa Ndinga ya Nzambi, yina monisamaka. Nzambi silaka, “Mu ke basisa bawu, na yisi ya diboko ya ngolo, mpe Mu ke kuzwa Munu mosi nkembo.” Yawu yina Yandi vwandaka sala.

Ya kele samu na yina Moise siamisaka ti yandi lendaka vanga. Ve samu yandi zolaka kuvanga; samu Nzambi tubaka na yandi. “Mpe na yina, ‘Beno kwenda na dibuundu, beno tuba, ‘Mbasi . . .’” Mfumu Nzambi me zonza na munu, ‘Baka ndambu ya fundu-fundu mpe losa yawu na zulu, mutindu yayi, mpe bokila yawu.’ Ya kele na ata mosi ve awa, kasi ya ke vwanda kuna.” Amen!

Oh, mu banza ti beno ke na kulala ve. Oh! Kumonisama!

¹⁹⁵ Yandi tubaka, “Ba me tinda munu. Nzambi tubaka na batata ya beto, ya kieleka Yandi ke kwiza kutala beto awa mpe ke basisa beto. Mu me kwiza kusiamisa na beno ngunga me kuma pene-pene. Beno katukila yina kele na beno. Beto kwenda!” Yinga.

¹⁹⁶ Bayankaka na kati ya bawu tubaka, “Mbote, mu ke kwikila. . .” Dathan tubaka, “Mu ke banza ve ti ya kele na nsatu ya kusala nswalu. Beto zolaka vwanda ve na ntima na zulu samu na yayi.” Mpe ya ke talana mutindu ti ya me kubwa, bambala yiya to tanu. Kasi, kaka mutindu mosi, ya vwandaka landila na kukwenda.

¹⁹⁷ Bawu banzaka. Bawu basikaka mpe tubaka, “Beto ke losa Moise yayi matadi! Beto nata yandi ntama ya beto! Beto zola yandi ve na kimvuka ya beto—ya beto awa.”

Moise kwendaka kaka na ntwala, na mutindu nionso, samu yandi vwandaka Luzingu, yandi vwandaka Nsemo ya ngunga. Yina yandi kuzwaka, yinki yawu vwandaka? Nzambi na kutalisaka Ndinga ya Yandi ya nsilulu na nzila ya Moise, mpe Moise vwandaka Nsemo.

¹⁹⁸ Elie vwandaka Nsemo. “Kwenda kuna mpe vwanda na mongo yina! Mu me tuba na bangoy-ngoy na kudikisa nge.” Amen! Yinga, tata.

¹⁹⁹ Yandi kulumukaka na MUTINDU ME TUBA MFUMU. “Ata kinoko ke kubwa ve na Zulu tii mu ke bokila yawu.” Amen! “Mwini lendaka lezima, beno lendaka bokila matuti nionso, mpe kusala nionso yina beno zola, kasi ata kinoko ke kwiza tii mu ke bokila yawu.” Yinki yandi vwandaka? Nsemo! Aleluya! Yandi vwandaka Nsemo. Nsemo! Yandi vwandaka Ndinga ya Nzambi yina monisamaka.

²⁰⁰ Bawu banzaka ti yandi vwandaka kilawu, na kuvwandaka na zulu kuna. Yandi vwandaka na bangamba yina vwanda dikisa yandi; mpe bawu vwandaka kufwa na nzala. Bawu vwanda zola kuzinga na binkulu ya bawu; kukwenda na ntwala. Moise ve, to Elie ve, yandi vwandaka zinga na kati ya Nsemo. Ya kuvwandaka kuna na mwa maza yina, ya Kerith, mpe vwanda kuzwa kaka ntangu mosi ya mbote; vwanda kudya, mpe muntu na kukeba yandi, mpe nionso. Bawu banzaka ti yandi vwandaka kilawu, kasi yandi vwandaka—yandi vwandaka Nsemo.

²⁰¹ Bawu ke tuba, “Hé, yinki me kuma exalté yina ya ntama yina beto vwandaka na yawu awa? Mbote, beno zaba yinki? Muntu mosi vwandaka zomba kilumbu yankaka yina, mpe yandi tubaka ti bawu monaka yandi ya kuvwanda na zulu kuna ya nzila, kuna na zulu ya mongo yina. Mu ke zenga ndefi ti na ntangu yayi, biboba yayi me yuma.” Oh, ve. Yandi vwandaka Nsemo. Yandi vwandaka Nsemo. Yandi vwandaka Nsemo ya Nzambi, na kilumbu ya yandi.

²⁰² Jean, ntangu yandi kwendaka na ntoto, mpe kwendaka na ntoto ya kuyuma na kuzwa malongi ya yandi na Nzambi, seminere ve. Yandi zolaka kotisa Mesiya. Na yina ntangu yandi kwizaka, Yesu tubaka, “Yandi vwandaka Nsemo ke sema mpe ke lezima.” Aleluya! Samu na yinki? Yandi vwandaka Ndinga me monisama.

Ésaïe tubaka yawu. Yawu yina. Ya kele kieleka. “Yandi ke tinda ndinga mosi na ntoto ya kuyuma, ke boka, ke tuba, ‘Beni yidika nzila ya Mfumu, mpe beno sungika mwelo ya Yandi, beno sungika nzila.’ Yandi ke boka, ndinga mosi. . . ndinga ya muntu mosi ke looka na ntoto ya kuyuma.” Yandi yina me kwiza. Yinki

yandi vwandaka? “Ndinga ya muntu yina vwandaka boka na ntoto ya kuyuma.”

Yinki yandi vwandaka? Kumonisama ya Ndinga, Nsemo. Nzambi mosi yina zonzaka na Genèse; yina zonzaka yayi, mpe awa me kwiza Nsemo. Mutindu Yandi tubaka, “Ti nsemo kuvwanda, samu na mwini,” mwini kotaka na luzingu; yandi tubaka ti Yandi tubaka ti ya ke vwanda “na ndinga mosi ke boka na ntoto ya kuyuma,” yawu yayi me kwiza. Yawu vwandaka Nsemo ya ngunga.

²⁰³ Yandi tubaka mpe, na bilumbu ya nsuka! Amen! Ya kele Nsemo ya ngunga, ke na kuboka na ntoto ya kuyuma ya Babylone, “Beno basika na kati ya yandi, bantu ya Munu, ti beno vukana ve na masumu ya yandi. Beno simba ve kima ya yandi ya mvindu! Beno kwenda ntama na yawu! Beno tina ntama na nganzi yina ke na kwiza!”

²⁰⁴ Jean tubaka kima mutindu mosi. “Disoka me tulama na nsimbulu ya yinti.” Vwandaka na ndongosolo ve, kuzonzaka mpe ve mutindu mulongi. Yandi zonzaka na yina me tala banioka, mpe bankawa, mpe bayinti, mpe basoka, mpe bima, na yina yandi kumesanaka, na ntoto ya kuyuma. Ba kulisaka yandi ve na mwa kima yayi na nene, nene, ya mbote mutindu bawu kele na yawu bubu yayi, mutindu bawu vwandaka na yawu na kilumbu yina. Yandi kwizaka na mutindu ya yandi mosi ya ndinga. Yandi telemaka ve mpe tubaka, “Ah-muntu,” mpe kusala kukulumuka nionso yayi ya kitoko. Yandi basikaka mbala mosi, na ntoto ya kuyuma, ya kukawuka mpe ya kuyuma. Yandi tubaka, “Beno banda ve na kubanza mutindu yina, ‘Mu kele ya *yayi* mpe mu kele ya *yina*.’ Nzambi kele na lenda na matadi yayi na kubasisa bana na Abraham.”

²⁰⁵ Beno banza ve ti samu ti beno kele Methodiste, Baptiste, Presbyterien, ti beno kele na kima ya kukangama na Nzambi. Nzambi kele na lenda ya kubaka babandi mpe bakento ya kindumba na bala-bala, kusala bana ya Nzambi na ngaanda ya bawu. Muntu mosi ke kuwa Yawu, mpe muntu mosi ke kwikila Yawu.

²⁰⁶ Yandi tubaka, mpe, “Disoka me tulama na nsimbulu ya yinti. Mpe konso yinti yina ke kwikila ve, ba ke zenga mpe ke losa na tiya.” Na yawu yina vwandaka nsangu ya yandi. Yandi vwandaka Nsemo ya kilumbu.

²⁰⁷ Yesu tubaka, “Yandi vwandaka Nsemo ke sema mpe ke lezima, mpe beno ke vingila fioti na kutambula na kati ya yawu.”

²⁰⁸ Mpe yinki Jean tubaka, profete? “Yandi me telama na kati-kati ya beno malu-malu yayi. Mu kele ve ya kulunga na kuzibula basapatu ya Yandi. Mpe na ntangu Yandi ke kota na kisal, mu ke kwenda.” Oh, la la! Samu, Yandi vwandaka Nsemo.

Ya kele ve na Bansemo zole to tatu, ata ba-organisation yiya to tanu ya kuswaswana. Ya vwandaka na Nsemo mosi. Ya kele

ve na Methodiste, Baptiste, Lutherien, Presbyterien. Klisto kele Nsemo, mpe Nsemo kele Luzingu. Mpe Ndinga me talana kele Nsemo ya ngunga.

²⁰⁹ “Ti nsemo kuvwanda, mpe nsemo vwandaka.” Yinga, tata. “Ti Nsemo kuvwanda,” mpe Nsemo talanaka! Yandi zonzaka ya ke vwanda na Nsemo na kilumbu yayi, mpe Nsemo talana. Yandi ke na kwiza. Mu ke kwikila yawu. Beno tala bansilulu ya nsungi yayi. Oh, la la!

²¹⁰ Konso Nsemo yina me lezimaka, bansungi yayi ya dibuundu, beto ke mona mutindu bawu. . . Ya—ya vwandaka kinsamu ya kyadi na kumona, kumanga. Apocalypse 3, mu me sonika yawu awa, Apocalypse 3, mpe mu zaba na yina—na yina mu vwandaka landila na ntangu yina.

²¹¹ Beno tala nsilulu ya ngunga yayi, na yina beto ke na kuzinga; Nsemo yina ba me losa. Yinki bawu salaka? Bawu mangaka Yawu na manima kuna. Samu na yinki? Bawu vwandaka zinga na kungenga mosi. Yinki bawu ke na kusala bubu yayi? Kima mosi.

²¹² Mbote, nge kele—nge kele Muklisto? “Mu kele Luthérien. Mu kele Baptiste. Mu kele Presbyterien.”

Yina zola tuba kima mosi ve. Ya lenda tuba kaka ti beno vwandaka “ngulu, sumbu” to kima yankaka yina beno zola bokila beno mosi. Beno me mona? Ti, ya kele na kutala yina ya zola kutuba. Ntangu yayi ata—ata kukondwa buzitu na beno, kasi kana beno ke na kubaka yawu na kitini ya yawu ya kisina, ya kele kieleka.

Mu yufulaka, “Muklisto?” Ya kele Klisto na kati ya beno. Mpe kana Klisto kele na kati ya beno, na yina Ndinga kele na kati ya beno. Mpe kuna kana Ndinga kele na kati ya beno, ntangu Nsemo ke lezima, wapi mutindu beno ke tina Yawu? Beno me mona, yawu yina kyuvu. Ya kele yina kele na kati ntangu yayi, Nsemo. Nsemo ya nkokila ke na kulezima. Yinti ya Kento ya makwela ke na kumena.

²¹³ Oh, beno bambuka moyo, bawu zengaka Yinti yina ya ntama. “Mpe yina jelek bikaka, gazam kudyaka; mpe yina gazam bikaka, hasil me kudya.” Yina ba-Méthodiste bikaka, ba-Baptiste me kudya; yina ba-Baptiste bikaka, ba-Pentecotiste me kudya. Yandi tubaka, “Yinti yayi vwandaka,” Joël kuna, “ba me zenga kaka kisina me bikana,” kasi yandi vwandaka zola kuzaba kana ya ke zinga dyaka. Oh, yinga! Yandi bumbaka Yinti yina. Yandi bumbaka Yinti yina, yinga, tata, samu ya vwandaka Kento ya Yandi ya makwela.

Mpe Yandi tubaka, “‘Mu ke vutula dyaka,’ tubaka Mfumu.” Yinki ya kele? “Mu ke basisa yawu, yina nionso ba-Lutherien kudyaka, mpe ba-Wesleyen kudyaka, mpe bawu nionso. Mpe mu ke vutula dyaka yawu, samu ti ya kele nionso dyaka na kati ya nsimbulu ya Yinti.” Beno me mona?

Ya kele ya kuvwanda kuna na kati ya ntoto. Kaka mutindu maza ya yinti yina ke kwendaka na yisi, mutindu mu tubaka samu na mpangi ya kento, yandi kele ya kulala kuna. Mpe mpungi ya Nzambi ke wakana, kilumbu, mpe ba-Lutherien yina, ba-Méthodiste, ba-Baptiste, yina vwandaka ve na kima ya kusala na organisation mosi . . .

²¹⁴ Luther ata mbala mosi ve bongisaka kima. Moody ata mbala mosi ve bongisaka kima. Ya vwandaka kimvuka yina ya ba-Ricky, na manima ya yandi, bawu yina salaka organisation, bakaka mpusu. John Smith kubongisaka kima ve. Ata mosi ve ya bawu kusalaka organisation; ya vwandaka Nsemo ya ngunga. Luther, Wesley, to ata mosi ve ya bawu; ya vwandaka kimvuka yina landaka, bayina kwizaka, ti salaka organisation.

²¹⁵ Ata mbala mosi ve ti Mpeve-Santu kubongisaka kima na kati ya Pentecote. Pentecote kele kimbangi, denomination ve. Yawu salaka ata mbala mosi ve organisation. Oh, ve. Kasi muntu yina ke tubaka ti kele pentecotiste, yandi yina bongisaka yawu. Yina kele mpusu kuna, ke na kufwa. Na kisika ya kuniemaka yawu na mukanda, mpe kusala kifwani ya muvimba ya Yesu Klisto kubasika; ve, ba me bendana bawu mosi na ngaanda, na yawu bawu kele ve na kima ya kusala na kati ya Yawu. Beno bika kaka bawu swi.

²¹⁶ Kasi beto ke tala ntangu yayi, Nsemo yayi, Yinti yayi, Klisto, kulosamaka dyaka na dibuundu. Samu na yinki? Samu na dyambu mosi yina bawu salaka na ntwala, kungenga ya ntama ya luvunu ya bansemo ya bilumbu yankaka. Mpe “Yandi kele mutindu mosi mazono, bubu yayi, mpe ntangu nionso.” Hébreux 13:8 me tuba ti Yandi kele. Yandi kele mutindu mosi bubu yayi mutindu Yandi vwandaka na ntangu yina, samu Yandi ke sala kima ya mutindu mosi yina Yandi salaka. Ndinga mosi, yina Klisto . . .

²¹⁷ Beno kuwa, mu zola kaka kunata beno ntangu yayi, mpe ti yayi kuvwanda ya muntu yandi mosi. Mu zaba ve, mu kele mwa . . . -kanu kana kufwa yawu awa to ve, beno me mona, samu na bande yayi. Mu ke bika kaka yawu kuvwanda kuna. Beno me mona?

²¹⁸ Mu zola kuyufula beno kima mosi. Beno tala, beno tala mbote yayi. Beno me mona, “Yandi kele mutindu mosi mazono, mpe ntangu nionso.” Beno tala mbote. bisalu ya Yandi, yina Yandi salaka, ke talisa yawu mosi. Ntangu yayi beno kuwa mbote. Ntangu Yandi telemaka kuna, na Jean 14:12, Yandi tubaka, “Beno mpe ke sala bisalu yina Mu ke sala. Beno ke sala ya kulutula nene na yayi, samu Mu ke kwenda na Tata ya Munu.” Ntangu yayi, Yandi tubaka yawu. “Mazulu na ntoto ke luta, kasi Ndinga yina ke kondwa ata mbala mosi ve.” Ntangu yayi kana beto me kuma na nsuka ya nsungi, na wapi ntangu “bisalu ya

kulutila nene” yina ke kwiza? Beno me mona? Beto bawu yayi. Beto kele ve . . .

219 Beno kuwa, kana manaka ya ba-Romain kele ya kieleka, beto kele na -sambanu . . . bamvula makumi tatu na sambanu me bikana. Konso bamvula mafunda zole, yinza ke kutanaka nsuka ya yandi. Bamvula mafunda zole ya ntete, kubebisamaka na maza; na bamvula mafunda zole ya zole, Klisto kwizaka. Yayi kele mvula 1964 ke na kwiza; bamvula makumi tatu na sambanu. Ntangu yayi, manaka ya astronomie ya bantu ya Egypte ke tuba ti beto kele ya kuswaswana na bamvula kumi na sambwadi, “ya kele bamvula kumi na sambwadi na ntwala ya yawu,” yina ke bika bamvula kumi na yivwa kubikana.

Yesu tubaka, “Ba ke zenga kosalu, samu na mbote ya Misoolami, to ata nsuni ve ke kuzwa mpulusu.” Wapi kisika beto kele?

220 “Beno mpe ke sala bisalu yina Mu ke sala. Ya mutindu mosi, kasi ya kulutila nene, beno ke sala.” Ntangu yayi beno tala mbote. Beno kuwa mbote. Beno kuzwa ya beno . . . Mu ke sambila ti Nzambi ke zibula ntima ya beno mpe mabanza ya beno, na lubakusu, samu ti beno bakula kukondwa kutuba ti ya kele mingi awa. Beno tala. Yandi tubaka kilumbu mosi . . .

Beto mona ndambu ya kosalu “ya nene” yina Yandi salaka. Beto sikama kaka samu na mwa bima. Beto banza.

Kilumbu mosi, Yandi tubaka, “Beno pesa bawu kima ya kudya.”

Bawu tubaka, “Beto kele na kima ve.”

Yandi tubaka, “Yinki kele na beno? Beno natila Munu yina kele na beno.”

Mpe bawu tubaka, “Beto kele na mampa tanu ya orge mpe bambisi zole.”

Yandi tubaka, “Beno nata Munu yawu.”

221 Mpe Yandi bakaka mampa tanu ya kisina ya orge mpe bandaka na kubuka yawu. Mpe, na kisina, Yandi salaka dimpa. Ya dikisaka mafunda tanu. Ya kele kieleka? Na yina Yandi tubaka, mpe Yandi kuzwaka mbisi, “Beno pesa Munu mbisi.” Ya vwandaka mbisi, na kubanda. Mpe Yandi basisaka, na mbisi yina, mbisi yankaka mpe mbisi yankaka, mpe dikisaka mafunda tanu. Ya kele kieleka?

Kasi na bilumbu ya nsuka Yandi vwandaka na kima ve. Yandi zonzaka kaka, mpe tubaka, “Tuba ti ya ke vwanda kuna,” mpe ya vwandaka kuna, kukondwa kima na kati ya yawu. Yandi vwandaka ve na mpadi; ya vwandaka ve na mosi kuna. Yandi tubaka kaka, “Ti ya vwanda,” mpe ya vwandaka. Beno me mona? Oh, Ndinga ya Yandi ke kondwaka ve, mpe Yawu fwana kusalama.

222 Mu lenda tuba na beno mambu yina ke ningisa beno. Beno me mona? Ya kele kuna ntangu Yandi ke tuba ti ya kele kuna. Ti Yandi tuba yawu. Beno me mona, kieleka kaka.

223 Beno me mona, Esete, Wesete awa me vutuka mpe me kutana na Esete. Ya vwandaka Moise, yina lokotaka zyelo, mpe tubaka, “Ti ya vwanda na bankasa,” mpe nionso ya mutindu yina, “na zulu ya ntoto.” Kasi na kilumbu yayi ya nsuka Yandi ke baka kima mosi ve; beno me mona, kaka Ndinga. “Ti ya vwanda,” mpe ya kele. Yina me tubama, ya kele mutindu ya ke vwanda.

Mu zola kupesa kimbangi ya mwa bima yina na nkokila yayi, beno me mona, beno me mona, ya yina salamaka, ti beno lenda mona Yandi kele kaka Nzambi. Bandinga ya Yandi lenda ve . . .

“Bisalu yayi yina Mu ke sala beno mpe ke sala, mpe ya kulutula nene na yayi beno ke sala. Mu bakaka mbisi na kusala mbisi; beno kele na nsatu ya kuzwa mbisi ve.” Beno me mona? Yandi kele dyaka Nzambi, kele dyaka Mwana mosi. Mwana ya Nzambi mosi yina basisaka mbisi na mbisi, ya kele Mwana ya Nzambi mosi bubu yayi. “Beno mpe ke sala bisalu yayi. Mpe ya kulutula nene na yayi beno ke sala.” Ya ke vwanda ya kulutula, “Ya kulutula nene na yayi beno ke sala.” Mpe bantu ke manga na kumona yawu. Huh! “Bisalu ya kulutula nene!”

224 Nsemo ya luvunu. Beno zaba, mu vwanda banza kaka na kima mosi. Mu vwandaka zonza mingi na yina me tala Angleterre, kasi mu vwandaka banza na nsemo ya luvunu. Awa ntama mingi ve, beno nionso ke bambuka moyo na kuyiba yina ya kulutula nene yina—yina Angletrre me kuzwaka ntete ve, yina kusalamaka. Ya vwandaka kuyiba ya mafuku sambwadi ya ba-dollar. Mu banza ve ti ya kele na kima mosi ntete ya mutindu na yinza ya kufwanikisa na yawu. Kuyiba mosi ya nene, ntama mingi ve, ya mafuku sambwadi ya ba-dollar, mpe Scotland Yards ke na kulenda ve na kubakula yawu.

Beno zaba mutindu bawu salaka yawu? Na nzila ya nsemo ya luvunu. Bawu tulaka nsemo mosi na nzila ya masini, na kupesa atensyo, tii ya ke kuma na nsemo ya mbwaki, mpe sikimisaka bawu. Mpe kuna kuyiba kusalamaka, kaka na kisika ya kulunga. Nsemo ya luvunu pesaka kuyiba ya kulutula nene yina bayinsi me zabaka ntete ve. Ya yibaka bayinsi. Kuyiba ya kulutula nene, muyibi ya kulutula nene, ya salamaka na nzila ya nsemo ya luvunu.

225 Mpe kuyiba ya kulutula nene dibuundu ya Nzambi me kuzwaka ntete ve kele nsemo ya luvunu, kungenga, denomination ya bawu. Ya yibaka bawu ngolo ya Mpeve-Santu. Ya katulaka na dibuundu nzila ya Luzingu ya kieleka. Ya yibaka bawu Ndinga, na ntangu bawu ndimaka credo na kisika ya Ndinga. Ya yibaka bawu.

Oh, bawu ke tuba kele na Ndinga. Ndinga ke talisamaka Yawu mosi na nsungi; Yawu ke zabanaka Yawu mosi. Bawu

tubaka ti bawu vwandaka na Ndinga, mpe, ntama kuna na bilumbu ya Yesu. Kasi Yawu tubaka, “Bawu monaka Nsemo ya nene,” mpe bawu mangaka Yawu. Bawu monaka Yawu, kasi bawu mangaka Yawu.

²²⁶ Oh, nsemo ya luvunu, yinga, ya lombaka dibuundu kuyiba ya kulutila nene ya me kuzwaka ntete ve. Ba-credo ya madidi ya ba-denomination, mpangi, ke yelisa ve Ndinga yina me siamisama, mbuma. Biblia ke tuba, Yesu tubaka, “Ndinga ya Nzambi kele Nkuna yina mukuni me kuna.” Beno me mona? Mpe ba-credo ya madidi ke yelisa ve Ndinga yina. Ve, ve!

Bilumbu ya madidi ya mipepe ya bagalasi ke yelisa ve blé. Ve, ata fioti ve! Ya ke lomba tiya ya nsemo ya mwini, samu ya vwandaka Ndinga ya Nzambi yina zonzamaka na kusala kima ya mutindu yina.

Mpe ya ke lomba Ndinga yina tubamaka ya Nzambi, bubu yayi, samu na kulakisa basantu ya Nzambi ti Yesu Klisto kele moyo. Kaka mutindu Yandi vwandaka mazono, Yandi kele bubu yayi. Ba-credo mpe ba-denomination ke sala yawu ata mbala mosi ve. Bawu kele madidi mpe ke kipe ve, mpe mbuma ke bola na kati ya ntoto. Ya lenda basika ve na yisi ya yina.

²²⁷ Yawu yina kikuma, bubu yayi, beto kele na yina beto ke sala. Mutindu Mpangi ya beto ya ntalu Billy Graham, muntu ya reveil ya nene. Mu banza ti Nzambi ke na kusadila muntu. Kasi beno tala yina yandi ke na kusala; ke basika kuna na kati-kati ya ba-Baptiste mpe ba-Presbyterien. Yinki beno ke sala? Beno ke kuzwa nkonga mosi ya kimvuka ya bantu ya dibuundu.

²²⁸ Beno me mona kisika ba-Baptiste ya Sude ke na kunanguka kuna samu bawu vwandaka na ba-denomination ya kulutila, to, denomination ya bawu kulaka mingi kulutila nionso yankaka ya ba-Protestant? Ba-Katolika bakaka bawu nionso, na kutala, mvula me luta. Beno me mona yawu na zulunale? Ya kieleka ya salaka. Beno vwanda na boma ve, ya ke baka bawu nionso, samu ti ya ke baka ba-Baptiste mpe nionso, kaka kintwadi. Mpe bawu nionso kele mosi, mpe bawu zaba yawu ve.

Lukutakanu ya dibuundu, Lukutakanu ya Mabuundu, ke tula kaka bawu nionso na kima mosi. Denomination me tula . . . Mbote, samu na yinki, beno zola kuvwanda *awa* to *awa*? Ntangu nionso yina beno ke manga *Yayi*, wapi luswaswanu ya ke sala? Beno ke na kusadilaka ve batike mosi ya ba-denomination, kaka mutindu beno kele na kisika mosi? Mosi, kibulu; mpe yina yankaka, kidimbu. Na yawu, yawu yina, na yawu ya ke sala kaka luswaswanu mosi ve.

²²⁹ Ya kele kisika yina yandi vwandaka. Yandi tulaka kidimbu ya yandi ya kundima, mpe kuna beno ke baka yawu. Mpe kuna yandi twadisaka nionso, mbala mosi kuna na Yinzo ya Mpembe, mpe na Washington, DC, mpe—mpe Lukutakanu ya Mabuundu,

mpe kuna beno ke kwenda. Bisyelo vutulaka kaka bawu na manima, kaka yina Biblia tubaka ti bawu ke sala.

Oh, mu ke zola ti monteleyayi kukwenda mbangu mingi ve!

²³⁰ Ntangu yayi, beno banza kaka ntangu yayi kisika beto kele. Beno tala bansilulu ya kilumbu, yina ba me manga dyaka. Mutindu mabuundu ke salaka na kilumbu yayi ya nsuka, kungenga ya denomination!

²³¹ Na kuzingaka na kungenga ya luvunu kele kikuma ti Yawu ke yela ve. Ya kele samu na yina ti, Ndinga yayi, beno ke na kumona ve bimangu.

²³² Nganga-Nzambi mosi yufulaka munu, ntama mingi ve, mpe yandi tubaka, “Mulongi Branham,” yandi tubaka, “wapi mutindu nge botikaka?” Mwana mosi—mosi ya kento yina basikaka na dibuundu yayi; mpe yandi vutukaka manima mpe kwelanaka na mwana mosi ya bakala ya Katolika, mpe kotaka na dibuundu ya Katolika. Mpe yandi zolaka kotisa yandi na dibuundu.

²³³ Mu tubaka, “Mu botikaka yandi na mbotika ya Baklisto.”

Yandi tubaka, “Evêque zola kuzaba.”

Mu tubaka, “Mbote mingi, yawu yina.”

Yandi tubaka, “Nge ke zenga ndefi na yayi?”

²³⁴ Mu tubaka, “Mu ke kudyaka ndefi ata fioti ve.” Mpe yandi tubaka . . . “Yinga,” mu tubaka, “kana yandi lenda ve kubaka ndinga ya munu samu na yawu, mbote, ya kele mbote. Samu ti, mu ke kudyaka ndefi ve. Biblia ke tuba, ‘Beno kuya ndefi ve na mazulu; ya kele kiti ya kimfumu ya Nzambi; ntoto kele kinyatila ya Yandi. Bika ti yinga ya beno kuvwanda “yinga,” mpe ve, “ve.”’” Mu tubaka, “Yandi fwana baka ndinga ya munu samu na yawu.”

Yandi tubaka, “Mbote, nge—nge me tuba ‘mbotika ya Baklisto,’ yinki nge zola kutuba, na—na kukota na maza?”

²³⁵ Mu tubaka, “Ya kele kaka mutindu mbotika ya Baklisto ke salamaka.” Mu tubaka, “Mu botikaka yandi na nzadi ya Ohio; mu kotisaka yandi na yisi ya maza, na Nkumbu ya Yesu Klisto, mpe vumbulaka yandi. Mu botikaka yandi na ‘Nkumbu ya Mfumu Yesu Klisto,’ yina kele kaka mbotika ya Baklisto.”

Yandi tubaka, “Yinga, tata.” Yandi sonikaka yawu mutindu yina. Mpe yandi tubaka, “Ngitukulu!” Yandi tubaka, “Nge zaba ti, dibuundu ya Katolika vwandaka botika mutindu yina.”

Mu tubaka, “Na wapi ntangu?”

Mpe yandi tubaka. Yandi landilaka, mpe kusolula kwendaka na ntwala mwa ntangu fioti. Mpe yandi tubaka, “Mbote, beto kele bantu ya Katolika ya kieleka.”

²³⁶ Na kuzabaka, ya vwandaka kaka kuna na babuku, beno zaba, mpe disolo na zulu ya yawu, Mu tubaka, “Ya kele kieleka,

kasi,” mu tubaka, “samu na yinki beno ke salaka dyaka yawu ve bubu yayi?”

Yandi tubaka, “Beto kele na lenda ya kulemvokila masumu.” Yandi tubaka, “Yesu, Yandi tubaka ve na bilandi ya Yandi, ‘Muntu nionso beno ke lemvokila masumu, na bawu ba ke lemvokila; mpe na muntu nionso beno ke bika kulemvokila, na bawu ba ke bika kulemvokila?’”

Mu tubaka, “Yinga, tata. Yandi salaka.”

Yandi tubaka, “Na yina yawu ke pesa ve dibuundu lutumu? Pierre vwandaka mfumu ya dibuundu.”

²³⁷ Mu tubaka, “Kana dibuundu ke lemvokila masumu mutindu Pierre salaka yawu.” Mu tubaka, “Ntangu yayi, ntangu bawu yufulaka, ‘Yinki beto fwana sala samu na kuzwa mpulusu?’ Yandi tubaka, ‘Beno balula bantima, beno nionso, mpe beno botama na Nkumbu ya Yesu Klisto samu na mulemvo ya masumu ya beno.’” Mu tubaka, “Beno sala yawu, mpe mu ke kwenda na beno.”

“Oh,” yandi tubaka, “nge ke na kumeka na kunwanila Biblia.”

Mu tubaka, “Yina kele Ndinga.”

Yandi tubaka, “Nzambi kele na kati ya dibuundu ya Yandi.”

Mu tubaka, “Nzambi kele na kati ya Ndinga ya Yandi. ‘Muntu nionso, bandinga ya bantu yankaka, kele luvunu; ya Yandi kele Kieleka.’” Beno me mona?

²³⁸ Na yawu ya kele ve na mutindu yina yandi lendaka kumona. Kasi kuna—kuna bawu ke kwenda, ke landila na mpimpa. Mpe ba-Protestant, na nzila ya mafunda, ke kota na kati ya yawu. Awa ba kele, kaka kuna na kundimaka ba-credo ya bawu mpe nionso, na kulandilaka kaka na kati. Ndinga ke basika, ke siamisa yawu, Yesu Klisto na kutalanaka Yandi mosi, “mutindu mosi mazono, bubu yayi, mpe ntangu nionso.” Na kungenga ya credo yina, ba ke landila ka na kati ya mpimpa. Kaka mutindu bawu salaka na ntangu ya Noe, kaka mutindu bawu salaka na bantangu nionso, ba ke sala dyaka yawu bubu yayi, kaka na kati ya mpimpa! Samu na yinki? Ba mangaka Nsemo samu credo kufwaka bawu meso.

²³⁹ Oh, wapi ngunga ya mpimpa na kati ya yina beto kele na ntangu yayi! Uh-huh! Yinga, bawu mangaka Nsemo ya kieleka ya Seko ya Klisto, mpe ya kele yina ke salaka yawu.

²⁴⁰ Ba-denomination ya madidi lenda nata ata mbala mosi ve Luzingu na Ndinga ya Nzambi, samu yawu ke nataka luzingu na denomination ya bawu. Beto kele na Baklisto ya kufwanikisa mingi ntangu kaka yayi. . . . Beno tala awa, kana Muklisto. . . .

Mu yufulaka nganga-Nzambi yayi yayi. “Kana. . . Mu ke kwenda na beno, ti Dibundu ya katolika vwandaka, na

mbandukulu, na Pentecote,” ve na Nicée, na Rome. Ata mbala mosi ve ti Dibuundu kubandaka na Nicee, na Rome. Ya bandaka na Pentecote. Beno me mona? Na Jérusalem kele kisika Dibuundu bandaka. Kasi mu tubaka . . .

²⁴¹ Awa, mu ke ndima ti bantu yayi, bampika yayi mpe nionso yina, yina vwandak na Mpeve-Santu, bamfumu ya bawu monaka bangolo ya bawu mpe nionso, yina ba vwandaka sala; kuvumbula bantu ya kufwa, kuzonza na bandinga, kubasisa bampeve ya yimbi, kuzonza mambu na ntwala. Mpe baprofete na kati ya bawu, mpe nionso yina, basikaka na bampusu ya mameme na zulu ya bawu; vwanda kudya matiti, na kukwizaka na Lukutakanu yina ya Nicée, mpe nionso yina, mpe bawuwwandaka bantu ya nene! Mpe kuna bawu basikaka kuna, mpe kwendaka kuna na Lukutakanu ya Nicée, kutelamaka samu na Ndinga yina.

Kasi, na bilumbu kumi na tanu yina ya menga, bawu ndimaka “Tata, Mwana, mpe Mpeve-Santu” mutindu credo, na kisika ya malongi ya Biblia, “na Nkumbu ya Yesu Klisto.” Na nzila ya yina kwizaka mabuundu nionso ya Misyoni, kubutamaka kaka na kati ya yawu, kima mutindu mosi, bima nionso yayi yankaka. Dibanza ya luvunu ya Mpeve-Santu; bawu bakaka, bakaka kominyo, kunwaka vinu, “Yina kele *kominyo ya santu*, yina zola kutuba, ‘Mpeve-Santu.’” Nganga-Nzambi pesaka yawu na beno.

²⁴² Ntangu yayi, Biblia ke tuba ve, “Ntangu Kilumbu ya Pentecote kumaka, awa me kwiza nganga-Nzambi na nzila, nkingu ya kubaluka, ke tuba, ‘Beno basisa ludima mpe beno kuzwa kominyo ya santu.’” Ve, Yawu ke tuba ve, “Beno nionso bantu beno kima awa mpe beno pesa munu diboko ya kimpangi, beno ba-Baptiste, ba-Methodiste, mpe ba-Baptiste, mu ke tula nkumbu ya beno. Beno nata mukanda ya kisika mosi.”

²⁴³ Yandi tubaka, “Bawu nionso vwandaka kisika mosi, na ngwisani mosi. Mpe na mbala mosi kwizaka makelele katuka Mazulu mutindu mupepe ya ngolo, mpe ya fulusaka kivinga nionso kisika bawu vwandaka. Bawu nionso fulukaka na Mpeve-Santu, mpe bandaka na kuzonza na bandinga yankaka, mutindu Mpeve vwandaka twadisa bawu na kuzonza. Mpe kuna . . .” Kuna na bala-bala ba kwendaka, ba vwandaka kwenda tengu-tengu mutindu bantu ya kulawuka malafu, Marie mpe bayankaka nionso ya bawu, na yisi ya kisalu ya Mpeve-Santu.

Mbote, bantu tubaka, na kusekaka bawu, mpe tubaka, “Bantu yayi kele ya kufuluka na vinu ya malu-malu.” Yinki bawu vwandaka? Ya kufwa meso na credo.

²⁴⁴ Mwa mulongi yina ya mpamba kutelamaka kuna, na nkumbu ya Pierre, mpe yandi tubaka, “Beno bantu ya Judée mpe beno yina ke zingaka . . . beno bantu ya Jérusalem, yina ke

zingaka na Judée, ti yayi kuzabana na beno, mpe beno kuwa mambu ya munu. Bayayi kele ya kulawuka malafu ve. Kasi beno bika mu tuba na beno yina Masonuku ke tuba ti ya ke vwanda. Yayi kele Nsemo. Yayi kele Ndinga me monisama.” Amen.

Kima ya mutindu mosi ke salama bubu yayi, mpe bawu ke na kusalaka mutindu bawu salaka na ntangu yina, ke kwenda mpe ke ningisa bayintu ya bawu. Yandi tubaka, “Beno bika bawu; bampofo ke na kutwadisa bampofo, bawu nionso ke kubwa na dibulu.”

²⁴⁵ Oh, ya ke lomba Klisto, Luzingu ya Seko, samu na kunata Ndinga ya Luzingu na kimbangi, yina me kuma nsuni. Oh, la la, Nzambi! Ya ke lomba Ndinga . . . ke lomba Mpeve-Santu na kusala Ndinga ya Nzambi kusala.

²⁴⁶ Ntangu Yesu tubaka, “Beno kwenda na yinza ya muvimba, mpe beno longa Nsangu ya mbote na kivangu nionso.” Ntangu yayi beno tala, Marc 16, lutumu ya Yandi ya nsuka. “Na yinza ya muvimba, na yinza ya muvimba,” yawu me kuma ntete kuna ve, beno me mona. “Na yinza ya muvimba, mpe kulonga Nsangu ya mbote na kivangu nionso. Yandi yina ke kwikila,” na yinza ya muvimba, “mpe ke kuzwa mbotika ke kuzwa mpulusu; yandi yina ke kwikila ve ba ke bedisa yandi. mpe bidimbu yayi ke landa bawu yina ke kwikila.”

“Ba ke pesa mbote na mulon- . . .”? Ve. “Ba ke vwanda bamambeke na dibuundu ya mbote”? Ve.

“Na Nkumbu ya Munu ba ke basisa bampeve ya yimbi; ba ke zonza bandinga ya malu-malu; ba ke simba banyoka; to, kunwa manganga ya yimbi yina ke kufwaka, yawu ke sala bawu yimbi ve; kana bawu tentika maboko ya bawu na zulu ya bambevo, bawu ke beluka.” Oh, la la!

²⁴⁷ Tii wapi kisika? “Kivangu nionso.” Na bantu yikwa? “Yinza ya muvimba,” tii Yandi ke kwiza dyaka. “Bidimbu yayi ke . . .” “Yandi yina ke kwikila na Munu, yandi mpe ke sala bisalu yina Mu ke sala. Mpe ya kulutila nene na yayi yandi ke sala, samu Mu ke kwenda na Tata ya Munu.”

²⁴⁸ Oh, wapi mutindu beto lenda kwenda ntama na Yawu ya ke lutila munu! Beto kele na kati ya mpimpa mingi ntangu yayi kulutila na kati ya yina bawu vwandaka. Ntangu yayi mu kele kaka na mwa banzila dyaka awa, na manima mu zola kusukisa na nswalu mutindu mu len- . . . Beto kele na mpimpa ya kulutila na kati ya yina bawu vwandaka.

Mu zaba ti mu ke na kulembisa beno awa, na kutala ngunga mosi na ndambu. [Dibuundu me tuba, “Ve.”—Mu.] Kasi, beno me mona, ba ke na kubakaka na bande na kati kuna. Beno me mona? Beno me mona?

²⁴⁹ Ba kele na mpimpa ya kulutila kulutila na kati ya yina beto kele. Mu salaka nsamunu yayi, yina. Samu na yinki? Mabuundu,

na kungenga yayi, kele na luvunu mingi, ya ke talana mutindu ya kele Kieleka. Ntangu yayi, Yesu tubaka ve? Beto tala Matthieu 24, beno me mona. Matthieu 24, Yesu tubaka ti, “Na bilumbu ya nsuka, bampeve nionso zole ke vwanda ya kubelama mingi tii ya ke vuna bantu ya kieleka ya Kusolama kana ya lendaka salama.” Ya ke vwanda na nkonga ba soolaka ke basika samu na kusala Dibuuundu, na bilumbu ya nsuka. Mpe ba-organisation yayi, na yina ba ke bokilaka Kieleka ya bawu, ke vwanda ya kufwanana mingi mutindu Kima ya kieleka, ti ya ke vuna bantu ya kieleka ya Kusolama, ata bantu ya Pentecote.

²⁵⁰ Ntangu yayi, beno zaba ti beno lenda baka Pentecotiste ve mpe kuvuna yandi na malongi mosi ya ba-Methodiste to ya ba-Baptiste. Beno lenda tuba na yandi yina ve. Yandi zaba ya kulutula mbote. Beno lenda vuna mpe ve, Baptiste mosi na malongi ya ba-Lutherien. Beno me mona?

Mpe dyaka beno ke kuzwa Nsan-. . . ke vuna Nsangu, ntangu yayi na Ndinga yayi, na nzila ya malongi ya ba-Pentecotiste, na luvunu “Tata, Mwana, Mpeve-Santu,” mpe bima nionso yayi ya mutindu yina, mpe kuna na ba-credo ya bawu ya kutula yina kele na bawu na kati ya organisation yina. Ve, ata fioti ve. Ata mbala mosi ve ti beno ke vuna bawu, samu ti bantu ya Kusoolama ke vunama ve.

²⁵¹ Yinki ya kele? Yinki ya kele? Luvunu. Kungenga yayi, yinki ba ke na kusalaka? Ba ke na kutwadisaka dibuuundu na lukutakanu ya kufwa, na kungenga ya bawu. Yina ke vwanda kufwa ya nsuka, ntangu yandi na Rome ke vukana kintwadi. Ntangu bawu ke sala kizizi yina ya kibulu, yina kele kufwa ya nsuka. Mpe kungenga yayi yina kele na beno ntangu yayi, beno tala yina yawu ke na kusalaka, na kutwadisaka bantu. Ya kele nkombo.

²⁵² Nkombo ke twadisaka dimeme ntangu nionso na lufwa. Beno ke monaka yawu na ba-abattoir. Nkombo yina ke kima tii kuna mpe ke twadisa dimeme, mpe yandi ke dumuka mpe ke bika dimeme kulandila na kukwenda na kati. Yawu yina yandi ke salaka. Yandi ke salaka yawu ntangu nionso.

Ya vwandaka bankombo twadisaka Yesu, Mwana ya dimeme, na lufwa. Bankombo ya Rome! Ya kele kieleka.

Ya kele—ya kele bankombo ya denomination bubu yayi yina ke na kutwadisaka dimeme yina zaba dyambu ve na abattoir. Ke tula bawu mosi, bankumbu ya bawu na babuku yina kuna, mpe ba me manisa. Yina kele kidimbu ya kibulu. Na Nkumbu ya Mfumu, mu ke zonga. Mu vwanda me bumba yawu bilumbu mingi. Ya kele kieleka. Ya kele kieleka. Yinki kele kibulu? Yinki kele kibulu? Ya kele kimfumu ya Rome, organisation ya ntete. Yinki kele kidimbu ya yawu? Kima mosi, ya kieleka, kima mosi kaka mutindu yina vwandaka. Kufwa, na kungenga!

²⁵³ Kasi na kizizi ya mpimpa ya ntangu yayi, beto me mona dyaka Nsemo ya Nzambi kulezima. Wapi mutindu beto ke vutula matondo samu na yawu!

²⁵⁴ Beno kuwa mbote. Beto me mona Nsemo, Ndinga ya Yandi yina Yandi silaka samu na kilumbu yayi, kutalana mpe kusiamisama. Ya kele Kieleka, Nsemo ya ngunga. Oh, la la! Mu kele na kyese mingi. Ya kele ve na kima ya yimbi. Ya kele na kima mosi ve.

²⁵⁵ Awa ntama mingi ve mulongi mosi vwandaka tuba ti yandi vwandaka kuna na Floride, mpe ti yandi vwandaka na ditoma, mu banza ti ya vwandaka Chevrolet, mpe kima yina vwandaka tambula dyaka ve. Yandi vwanda lenda ve kuyidika yawu. Mpe yandi kwendaka na garage, mpe mwa kisadisi-matoma mosi vwanda tala na yisi ya yawu mpe na zulu ya yawu, mpe vwanda meka na kusala kima mosi; yandi vwanda lenda ve kuyidika yawu. Mpe yandi—yandi vwanda meka *yayi*, mpe ya vwanda simba ve. Mpe yandi vwanda meka kima yankaka; ya vwanda simba ve. Yandi tulaka kiduku-duku, tulaka *yayi*, mpe tulaka babuzi, tulaka bavise ya kupatama; yandi vwanda lenda ve na kusala kima yango kutambula. Yandi vwanda lenda ve kusala yawu kutambula.

Na nsuka, bakala mosi ya kulwata mbote me kwiza. Yandi tubaka, “Mu lenda pesa nge mwa malongi?”

²⁵⁶ Mwa kisadi-matoma yina vwandaka na mbanzulu mingi ya mbote na kutuba, “Yinga, tata.”

Yandi tubaka, “Baka *yayi*, mpe sungika *yayi* mpe *yayi*, mpe,” yandi tubaka, “vukisa yawu kintwadi mbala mosi mpe meka yawu.” Mpe yandi vukisaka *yayi* na *yina*, mpe tulaka yawu kintwadi, mpe kuna ya tambulaka.

²⁵⁷ Mwa kisadi-matoma yina balukaka, mpe tubaka, “Tuba, nani nge kele?” Yandi vwandaka ingénieur, mfumu ingénieur ya General Motors. Yandi salaka kima yina. Yandi vwandaka yandi yina fikulaka yawu.

²⁵⁸ Mpe, bubu yayi, ntangu beto ke na kuzonzila na ba-Methodiste, ba-Baptiste, mpe ba-Presbytérien. Mfumu Kisadi-Matoma kele awa; Kifikuni ya Ndinga ya Yandi, Muntu Yina vangaka mazulu mpe ntoto, mpe salaka Dibuundu ya Yandi! Yandi zaba ya kulutula na zulu ya yina ya ke lomba samu na Enlevement, to dibuundu ya ba-Methodiste to ya ba-Baptiste zaba ya kulutula na zulu ya yina ke lomba? Yandi kele Kifikuni. Yandi zaba yina ya ke lomba. Yandi kele ya kulwata mbote na Ngolo ya mvumbukulu ya Yandi. Aleluya! Yandi ke na kutambulaka na kati-kati ya beto, bubu yayi, na Ngolo ya mvumbukulu ya Yandi.

Yandi zaba yina ya ke lomba na kutula Dibuundu na nzila ya Enlevement. Yandi salaka Yawu, mpe tulaka bitini kintwadi awa na Biblia. Amen! Beno bika kaka Kulan kulutula na Yawu,

ntangu yayi beno tala Yawu mbote kusala. Beno bika lukwikilu, na Ndinga ya Yandi ya nsilulu ya bubu yayi, kulutula, beno ke mona mutindu Yawu ke salaka. Samu na yinki? Yandi salaka kima yango. Yandi salaka Dibuundu ya Yandi na nzila ya Ndinga. Ya kele yina Yandi tulaka kintwadi. Ve na nzila ya ba-Méthodiste, to ya ba-Baptiste, to ya ba-Presbytérien, to ya ba-organisation ya Pentecote; kasi na nzila ya Ndinga ya Yandi. “Muntu ke zinga kaka na dimpa ve, kasi na Ndinga nionso yina ke basika na yinwa ya Nzambi.” Yinga, tata.

²⁵⁹ Beno basika na kungenga ya bawu, na kati-kati ya mpimpa, na ntangu yayi ya mpimpa na kati ya yina beto ke na kuzinga na ntangu yayi. (Ya me bikana munu kaka baminuti tanu dyaka.) Na kati-kati ya mpimpa, nani ke basisa ntwenya ya Kento ya makwela? Nani zaba na Yawu? Mfumu Kifikuni. Oh, yinga. Na muvusu nionso yayi ya kungenga!

Awa, ba-Methodiste ke na kungenga na mutindu mosi, ba-Baptiste mutindu yankaka, mpe ba-Presbyterien mutindu yankaka, mpe ba-Pentecotiste mutindu yankaka, kungenga nionso yayi yina kele bisika nionso. Bawu ke tina, ke tula nkumbu ya bawu *awa*, na kungenga yayi awa; mpe ke tala, kima mosi kuna. Mpe ke kwiza *awa*; mpe kima mosi kuna. Ke kwiza *awa* . . .

²⁶⁰ Mutindu mu tubaka na nganga-Nzambi yina, “Kana beno nionso kele dibuundu ya ntete, mpe beno kwendaka na manima ya malongi ya bantu yayi kuvukanaka na Nicée, samu na yinki ya kele beno kele ve na ngolo yina bawu vwandaka na yawu kuna na mbandukulu? Samu na yinki beno ke sala ve bima yina bawu salaka, yina Yesu tubaka?”

Yandi tubaka, “Oh, beto kele bantu mingi ntangu yayi. Beto, beto ke na kuzinga na nsungi yankaka.”

²⁶¹ Mu tubaka, “Kasi Ndinga ke sobaka ve. Yandi tubaka, ‘Bidimbu yayi ke landa bawu na bansungi nionso. Mazulu na ntoto ke luta, kasi Ndinga ya Munu ke luta ata mbala mosi ve.’ Yawu yina.”

Yandi tubaka, “Mbote, nge ke na kuzonzila na Biblia.”

²⁶² Mu tubaka, “Yinga, Ndinga, yina kele Klisto.” Ya kele kieleka. Mpe na yawu beno bawu yayi. Beno me mona?

²⁶³ Mpe na kungenga yayi, ba-Methodiste ke lakisa ya bawu, ba-Baptiste ke lakisa ya bawu, ba-Presbyterien ya bawu, mosi na mosi ke na kukula nene mingi mpe nene mingi, ntangu nionso.

Ntwenya ya Kento ya mputu ya makwela, wapi kisika Yandi kele? Yandi kwendaka mbangu awa na ba-Pentecotiste Unitaire, mwa ntangu fioti; Yandi tulaka nkumbu ya Yandi na zulu kuna, mpe Yandi tubaka, mbote . . . Yandi bakulaka, talaka yina bawu ke salaka. Ba kwizaka awa, mpe, “Nge fwana vwanda ya beto. Kana nge vwanda ve ya dibuundu ya beto, nge kele mpe ve

na kati ya Kento ya makwela. Nge kele mpe kima mosi ve.” Ba kwendaka awa na ba-Assemblée, mpe beno tala yina bawu kuzwaka; beno bawu yayi dyaka. Ba kwendaka kuna na ba-Baptiste, talaka yina vwandaka na bawu. Beno tala ba-Pres- . . .

²⁶⁴ Yinki ke salama na ntwenya ya Kima yayi ya mputu? Beno me mona? Kasi Yandi ke na kukwenda na ntuala. Beno vwanda na boma ve. Yandi ke vwanda kuna.

²⁶⁵ Muntu mosi vwanda tuba, awa na kutala mwa bamvula zole me luta. Yandi vwandaka na New Mexico. Mu kuzwaka balukutakanu kuna pene ya kintadi ya Carlsbad Caverns. Beno kuwaka na zulu ya yawu kuna, ya nene. . . Mpe bawu bakaka bakala mosi mpe kento ya yandi, mpe nkonga ya bana, kwendaka na ascenseur yayi, kwendaka nzila nionso tii na yisi ya dibulu. Mpe ntangu ba kumaka na yisi kuna, ba kufwaka minda nionso. Mpe ntangu ba kufwaka minda nionso, ya vwandaka mpimpa ya kati-kati ya mpimpa.

Mu lombaka bawu na kusala yawu awa na bansaba yayi awa, mpe na ntangu mosi kuna na Colorado kuna, kento ya munu mpe munu, kuna na manima, vwandaka na kati kuna. Mpe bawu namisaka minda yina. Oh, beno ke tula diboko ya beno mutindu *yayi*, beno lenda ve kumona kima mosi.

Mpe ya vwandaka na mwa mwana mosi ya kento yina vwandaka kuna, mpe yandi bandaka na kuboka, “Oh!” Vwandaka boka. Yandi, yandi vwandaka na boma ya lufwa, ya vwandaka mpimpa mingi. Mwa kima yayi ya mawa vwanda kangimila bisika nionso, mpe vwanda meka na kuboka mpe kuzonza na ngolo na papa ya yandi, mama ya yandi, bisika nionso. Yandi vwanda lenda kaka yawu ve, ya vwandaka mpimpa mingi. Yandi me monaka ntete ve mpimpa ya mutindu yina.

²⁶⁶ Mpe ya kele na kutala mutindu ya kele ntangu yayi. Ya kele kieleka. Ya kele mpimpa mingi ti beno zaba ve kisika ya kukwenda. Beno ke kwenda na ba-Methodiste, beno ke kwenda na ba-Baptiste, beno ke kwenda na ba-Presbytérien, ya kele nionso kima mosi, beno me mona, na kudyaka mani yina ya ntama ya kufwa, ya kubola na mafundi na yawu. Beno me mona, kima mosi, kledo mosi, “Beno kota mpe beno vukana na *yayi*, mpe yankaka, na *yina*,” credo ya ntama mpe nionso. Beno ke mona Klisto ve na kati ya yawu. Beno me mona? Oh, beno ke mona bantu ya kukilunga, mu ke tuba mutindu yina. Mingi kele bantu ya mbote na kati kuna ntangu yayi, na ba-denomination yina. Mu ke na kutubilaka na ssysteme, na bantu na kati kuna ve. Kasi, beno me mona, ya kele yina bawu ke na kudyaka. Beno tubila bawu na yawu!

Mpe *Awa* kele Madya ya malu-malu!

²⁶⁷ Mpe mwa mwana ya kento yayi ya kutelama kuna, yandi vwandaka boka, na ngolo ya yandi nionso, tii zolaka kuma

kilawu; na kutala mutindu ntwenya ya Kento ya makwela kele. Kasi beno zaba yinki? Mwa mpangi ya yandi ya bakala, tubaka, “Leki ya kento, kutala boma ve.” Samu ti, yandi vwandaka kaka ya kutelema pene ya ingénieur. Yandi tubaka, “Ya kele na muntu awa yina lenda pelisa minda.”

Kutala boma ve, leki ya Kento, ya kele na Muntu awa Yina lenda pelisa Mwindi. Yandi lenda sala Ndinga yayi kukuma moyo. Beto zaba ve mutindu Yandi ke kwiza. Beto zaba ve, ntangu Yandi ke kwiza. Mu zaba kima mosi ve na yawu. Kasi Yandi kele awa, mpe Yandi lenda pelisa Minda. Wapi mutindu beto ke basika na yawu? Mu zaba ve. Kasi Yandi kele awa, mpe Yandi kele Yandi yina lenda pelisa Minda. Yinga, tata. Yandi kele Yandi yina. Yandi kele Nsemu. Yandi ke salaka kaka Yandi mosi kuzabana, ya kele mutindu Yandi ke pelisaka Nsemu. Ya kieleka kaka.

Ya ke lombaka Klisto, na kupelisa Minda ya Yandi, kuna mpimpa nionso ke zimbana. Yandi ke kabulaka. Yandi ke na kubasisa ntwenya ya Yandi ya Kento ya makwela. “Mu ke kuzwa bantu na kati ya Bantu ya makanda, samu na mbote ya Nkumbu ya Munu, bayina ke vwanda na Nkumbu ya Munu.” Yinki kele Nkumbu ya Yandi? Mbote mingi. Methodiste, Baptiste, Presbyterien, Luthérien ve. Ya kele Yesu Klisto. Ya kele kieleka.

²⁶⁸ Yandi kele Nsemu, Kieleka; Nsemu, mpe ya kele ve na mpimpa na kati ya Yandi. Mpe Yandi ke zimbisaka mpimpa ntangu Yandi ke kotaka, samu ti Yandi kele Ndinga. Ndinga kele Nsemu. Ya kele kieleka. Samu ti, Yandi zonzaka mpe tubaka, “Ti nsemu kuvwanda,” yina vwandaka Ndinga yina vwandaka nsemu. Ntangu Yandi ke zonzaka *Yayi*, ya kele Nsemu ya nsungi yina, konso ntangu.

Ntangu yayi Yandi kele awa, na—na kungenga ve; kasi bantu ke na kuzingaka na kungenga. Kasi Yandi kele Ndinga me siamisama. Yandi kele kieleka Nsemu na ntangu ya mpimpa. Yinga, tata. Kungenga nionso yayi ya luvunu mpe bima ke zimbana. Yinga, tata. Yandi kele awa. Beno vwanda na boma ve. Beno pelisa Minda, Ndinga ya Yandi ya nsilulu. Yawu ke zinga. Yawu ke salaka . . .

“Yandi yina ke kwikila na Munu, bisalu yina Mu ke sala, beno mpe ke sala.” Na yina, ya kele Ndinga. “Mutindu Tata fidisaka Munu, mutindu mosi Mu ke fidisa beno.” Tata yina fidisaka Yandi, kwizaka na kati ya Yandi. Yesu yina fidisaka beno, ke kwiza na kati ya beno. Mpe bisalu yina Yandi salaka kuna, Yandi ke sala kima mosi, samu (samu na yinki?) Ndinga me kuma nsuni, na kati ya nzutu ya muntu, ke lakisa Yawu mosi mutindu Nsemu ya kilumbu. Beto bawu yayi. Yawu yayi. Ya ke na kulakisaka kaka nzila na Nsemu, na kati ya Nsemu. Bantu ya ndwenga, yina kele ya kufwa meso ve na nzila ya ba-credo

mpe na ba-denomination, ke tambula na kati ya Nsemo yina. Oh, la la!

²⁶⁹ Ya kele na Muntu awa yina lenda pelisa Minda, mbote mingi. Yinki Yandi ke sala? Na kupesaka kimbangi ya Ndinga ya Yandi ya kilumbu yayi. Yesu, Mwana ya Nzambi, Yina silaka Ndinga samu na bubu yayi, kele kaka awa na beto.

Beno vwanda na boma ve. Beno landa ve yina bawu ke na kusalaka; kana beno sala, beno ke tambula na kati ya mpimpa.

Beno vwanda na ndwenga. “Bawu yina ke salaka na ndwenga,” Daniel ke tuba, “na bilumbu yayi ya nsuka, ke sala ya nene samu na Nzambi ya bawu.” Beno me mona? Beno me mona? Bawu ke tambula na kati ya Nsemo, mutindu Yandi kele na kati ya Nsemo.

²⁷⁰ Beno tala boma ve. Ya lendaka vwanda mpimpa, ya ke monana mutindu ba ke tuma beto na ngolo, beto nionso. Nionso yayi, beno ke mona kusamuna kupesa nsangu ya bawu, “Mwa mabuundu yayi nionso mpe bima fwana kota ntangu yayi. Beno fwana kota,” to ba ke kanga myelo ya beno. Ba ke sala yawu.

²⁷¹ Ntangu yayi beto zola kubula yawu ngolo mingi, na nkokila yayi, ntangu mu ke kuma kuna, beno me mona.

²⁷² Ntangu yayi, bawu, “Beto ke pelisa.” Beno fwana vwanda mosi ya yawu, to ve. Beno kele—beno kele to na kati ya yawu, to beno lenda sala kima ve, beno lenda sumba ve to kutekisa ve. Kaka yina. Beno ke sambila ve samu na bambevo. Kana ba simba beno ke na kuzonzaka na mbevo mosi to muntu mosi na kima mosi ya kimpeve kuna, ba ke lutisa beno na ntuala ya musiku ya yinsi, samu ba kufwa beno. Ya kele kaka kieleka. Beno me mona? Beno zaba yawu. Ya kele kieleka. Ya kele na mikanda ya bawu. Yinga, tata. Na yawu, beno lenda sala yawu ve, beno fwana vwanda ya kinzambi-nzambi.

Mpangi, bika mu tuba na beno kima mosi. Beno ke sala mbote na kuvwanda na Klisto na kati ya ntima ya beno malu-malu yayi, samu ti ya kele na ntangu ke kwiza kieleka kisika beno ke vwanda na nsatu ya Yawu. Ba ke basisa beno kuna. Beno bambuka moyo, ntangu ba ke tula kidimbu yina, ya kele kuna samu na mbote. Beno me mona? Na yawu, beno sala mutindu yina ve. Beno kwikila bima yina ve. Beno kota kaka na Klisto na ntangu yayi, Ndinga. Yinga, tata.

²⁷³ Ke siamisa Ndinga, mpe ke lakisa ti Yawu kele Nsemo ya ngunga. Ya kele mutindu beto zaba ti Yandi kele Nsemo, samu ti Yandi kele Nsemo ke na kulakisa Yawu mosi na nsuni.

Wapi mutindu beto zaba? Yandi vwandaka Ndinga ya Nzambi yina kumaka nsuni. Beno me mona, Ndinga ya Nzambi vwandaka lakisa Yawu mosi, vwandaka siamisa Yandi mosi, ntangu Mesiya ke kwiza, yina Yandi ke sala.

274 Kento yina tubaka, na dibulu ya maza, “Ntangu Mesiya ke kwiza, Yandi ke sala bima yayi. Nge fwana vwanda Profete, yina kele Ndinga, yina ke na kuzonza na beto mambu yayi na ntuala.”

275 Yandi tubaka, “Mu kele Yandi yandi.” Beno me mona? Yina lungaka. Nsemo kulezimaka na Ndinga ya nsilulu. Beno tala Nsemo.

276 Kaka na mbanza yandi kotaka, yandi tubaka, “Beno kwiza, mona Muntu Yina me tuba na munu mambu yina mu salaka. Yayi kele kaka Mesiya ve?” Ya vwandaka yawu. Beno me mona? Ata yina bayankaka tubaka, yandi zabaka ti yina vwandaka Mesiya.

277 Beno bambuka moyo, na konso nsungi, na ntangu ya mpimpa, Nzambi ke vwandaka na Ndinga ya Yandi ntangu nionso samu na kukabula Nsemo na mpimpa.

Yandi vwandaka na Yawu na bilumbu ya Luther, ntangu dibuundu ya Katolika vwandaka na nionso; Yandi fidisaka Luther mutindu Nsemo ke lezima, mpe Luther kukabulaka Kieleka na mpimpa.

Mpe ntangu ba-Lutherien kotaka na poto-poto, Yandi salaka John Wesley, mpe yandi kabulaka Nsemo na mpimpa.

Mpe na bilumbu ya pentecote, ntangu ba-Wesleyen kukumaka nionso. . . mpe ba-Methodiste kukumaka na mpasi, mpe ba-Baptiste, mpe ba-Presbytérien, Yandi fidisaka nsangu ya pentecote na kukabula Nsemo na mpimpa.

Pentecote vutukaka dyaka na kati ya mpimpa, mutindu yina, na organisation ya bawu, bakaka ba-credo ya bawu mpe nionso.

Ntangu yayi ngunga me kwiza samu na Ndinga yayi na kusiamisama. Yandi fidisaka Nsemo, Ndinga yina monisamaka, mutindu Yandi salaka na mbandukulu; fidisaka Ndinga, mpe Yawu kukisiamisaka Yawu mosi. Ya kele na Nsemo, mpe Yandi ke kabulaka ntangu nionso. Mutindu mosi ya kele ntangu yayi, mutindu Minda ya fioti ya Seko na mbandukulu.

278 Beno tala bana, mutindu mu me tuba, mu me luta ngunga na baminuti tanu ntangu yayi. Kasi beno bika mu tuba kima mosi yayi.

Ya kele na Muntu awa! Beno vwanda na boma ve, ata nionso yina bawu ke tuba. Mu me monaka yawu kukuma na kisika yina mu zaba ve yinki kusala dyaka, kasi Yandi kele ntangu nionso kuna. Mvwandulu ke kondwaka ve, Yandi kele kuna ntangu nionso. Yandi lenda pelisa Mwindi. Yinga, tata. Yandi ke na kuingilaka kaka, na kumona yina beno ke sala. Yandi lenda byeta na kinamisi ntangu nionso Yandi zola. Yinga, tata.

279 Ya kele na Muntu awa yina lenda pelisa Minda. “Bayina vwandaka na bizunga ya kivudi ya lufwa,” bayankaka ya bawu na yisi ya cancer, bayankaka ya bawu na yisi ya lufwa ya denomination, bayankaka ya bawu na yisi ya ba-credo ya lufwa,

bayankaka ya bawu na yisi ya binkulu ya lufwa, mpe mitindu nionso yina ya lufwa, “mpe bawu me mona Nsemo ya nene.” Muntu yina lezimaka Minda kuna, kele Muntu mosi Yina tubaka, na mbandukulu, “Ti nsemo kuvwanda.” Nzambi mosi yina, “mazono, bubu yayi, mpe ntangu nionso,” Yandi kele bubu yayi, kaka awa ntangu yayi. Beno vwanda na boma ve. Yandi lenda pelisa Minda.

Ntangu mpasi ke kwiza, beno vwanda na boma ve. Ya kele na Nsemo, tubaka ti Yandi ke katula bantu ya Yandi. Yandi ke luta ve na lukwamusu. Yandi ke sala yawu ata fioti ve. Yandi tubaka ti Yandi ke sala ve. Ba ke katula Yandi. “Wapi mutindu bawu ke sala yawu, Mpangi Branham? Ya kele mpimpa mingi!” Ata mutindu mpimpa ya ke kuma, ti beno lenda ve kumona diboko ya beno na ntuala ya beno, beno bambuka kaka moyo, ya kele na Muntu awa yina lenda pelisa Mwindi. Yandi ke zangula Dibuundu yinas.

Beno ke tuba, “Mbote, mu kele . . .”

²⁸⁰ Yinga, Schadrac, Méschac, mpe Abed Nego, kumaka kaka tii na dibulu ya tiya, kasi ya kele na Muntu kuna Yina lendaka kupelisa mupepe. Yinga, tata. Mupepe ya ngolo yina kulumukaka na Kilumbu ya Pentecote, Yandi namisaka dyaka Yawu mpe bingisaka mupepe nionso ntama na bawu, tiya nionso. Ya vwandaka na Muntu kuna; ba ke bokila yandi “Muntu ya yiya.”

²⁸¹ Ya kele na Mosi awa bubu yayi. Kaka Yandi kele! Aleluya! Yandi kele na kinamisi Mwindi na diboko ya Yandi. “Bayina vwandaka na bizunga ya kivudi ya lufwa, Nsemo ya nene me telama.” Beno manga Yawu ve. Beno yamba Yawu, na Nkumbu ya Mfumu. Na yina beto ke kulumusa bayintu ya beto mwa ntangu fioti.

Beto ke tambula na Nsemo, Nsemo ya kitoko,
Beno kwiza kisika ke lezima kinoko ya kyadi;
Lezima na beto kilumbu mpe mpimpa,
Yesu, Nsemo ya yinza.

Beto ke tambula na Nsemo, ya kele Nsemo mosi
ya kitoko mingi,
Ya ke kwizaka kisika ke lezima kinoko ya
kyadi;
Lezima na beto kilumbu mpe mpimpa,
Yesu, Nsemo ya yinza.

Beno kwisa, beno basantu ya Nsemo, beno
tuba,
Yesu, Nsemo ya yinza;
Kuna bangunga ya Mazulu ke wakana,
Yesu, Nsemo . . .

Yinki ya kele? Ndinga yina me siamisama kele Yesu bubu yayi. Yandi kele Ndinga.

Beto ke tambula na Nsemo yayi, ya kele Nsemo
mosi ya kitoko mingi,
Ya ke kwizaka kisika ke lezima kinoko ya
kyadi;
Oh, lezima na beto, kilumbu mpe mpimpa,
Yesu, Nsemo ya . . .

²⁸² Na bayintu ya beno ya kukulumusa. Mu ke kukiyufula bantu yikwa awa ke zola tambula na Nsemo yayi, na yisi ya ntwadusulu ya Mpeve-Santu, Ndinga me siamisama bubu yayi? Beno me mona? Ndinga yina Nzambi silaka bubu yayi, beno tala Yawu kumonisama!

Ya vwandaka ve yina Yandi vwandaka na mbandukulu? Yandi vwandaka Ndinga. Mwana kubutukaka; Yandi vwandaka Ndinga. Yandi vwandaka Mesiya; Yandi vwandaka Ndinga ba siamisaka. Na yawu kuna Ndinga, Nzambi zonzaka mba- . . . nsuka kubanda mbandukulu.

²⁸³ Ntangu yayi ya kele na Ndinga samu na kilumbu yayi, mpe Yandi kele awa na ksiamisaka Ndinga yina.

Na kati-kati ya mvwanzi, mpimpa mpe kungenga, ya ke talana mingi mutindu Yawu, kasi ya kele Yawu ve. Ya ke talisa ve ti ya kele Yawu; credo.

²⁸⁴ Yesu tubaka, “Kana Mu ke basisa bampeve ya yimbi na nzila ya musapi ya Nzambi, na nani beno ke basisaka bawu?” Ba basisaka bawu ve. Beno me mona? “Kasi, ve, kana Mu ke basisa bampeve ya yimbi na nzila ya musapi ya Nzambi, na yina Kimfumu ya Nzambi me belama na beno.”

Oh, beto banza na yawu, na yina beto me telemisa maboko ya beto. Na malembe nionso ntangu yayi, mpe beno banza, na malembe nionso.

Beto ke tambula na Nsemo yayi, yayi kele
Nsemo mosi ya kitoko mingi,
Mpe ya ke kwizaka kisika ke lezima kinoko
ya . . .

Beno sala funguna ya beno. Beno kwikila na Nzambi ntangu yayi.

Lezima na beto kilumbu mpe mpimpa,
Yesu, Nsemo ya yinza.

Beto ke tambula na Nsemo yayi, ya kele Nsemo
mosi ya kitoko mingi,
Ya ke kwizaka kisika ke lezima kinoko ya
kyadi;
Lezima na beto kilumbu mpe mpimpa,
Yesu, Nsemo ya yinza.

²⁸⁵ Na yina bawu ke na kulandila na kubula, mu zola kuyufula. Konso nsungi me vwanda mutindu mosi. Na bilumbu ya Noé, bayina mangaka Nsemo, yinki bawu salaka? Bawu kwendaka na

lufundusu ya Nzambi. Yinki salamaka na Pharaon na bilumbu ya Nsemo ya divunda ya tiya, yina vwandaka na Moise? Yandi kotaka na nzadi ya lufwa. Yinki salamaka na Dathan yina bandaka mpe na manima mangaka Nsemo? Yandi kotaka na kupasuka ya ntoto; ya dyamisaka yandi. Yinki salamaka na bansungi nionso, na bayina lembanaka na kutambula na kati ya Nsemo, Nsemo ya kilumbu?

Ya kele Yesu ntangu nionso. Ya vwandaka Yesu na bilumbu ya bantu yina. Ya kele Yesu bubu yayi, samu ti Yandi kele Ndinga, mpe Ndinga ke salaka Nsemo. Ya kele Nsemo ya kilumbu.

Beno banza na yawu ntangu yayi, na malembe nionso, na yina beto kele na bukieleka, beno kukiyufula, beno ke na kutambula na Nsemo? Na yina beto ke yimba dyaka yawu na kati ya yinwa.

. . . Nsemo ya kitoko mingi,
Beno kwiza kisika ke lezima kinoko ya kyadi;
Lezima na beto kilumbu mpe mpimpa,
O Yesu, Nsemo ya yinza.

Beto telama, ntangu yayi.

²⁸⁶ Mu ke sambila Tata ya Mazulu na kubika Nsangu yayi kukota na kati ya bantima ya bantu yina kele awa, mpe bayina ke kuwa Yawu na bande. Mpe ti Nsemo kukwiza na zulu ya Ndinga, Nkuna, mpe kubasisa Nkuna nionso yina zabanaka ntete yina ba kunaka awa na mitundu ya kungenga yayi mpe na ba-organisation. Ti bawu kumona mutindu Nicodeme, ata kana bawu fwana “kwiza na mpimpa,” kukwiza na Nsemo. Pesa yawu, Tata.

²⁸⁷ Ti kima ya nene yayi kusalama, ya Ditadi yayi yina katukaka na mongo, kukondwa lusalusu ya diboko. Ya ke mwangisa bimfumu yayi ya Bantu ya makanda na ntoto, bimfumu nionso yayi, bimfumu ya kimpeve mpe bimfumu ya yinza. Mpe Ditadi ke fuka ntoto ya muvimba; ya ke vwanda diamba ya kuvedisa. Bayina Ditadi yina ke nika ke kuma mfututu; bayina ke kubwa na zulu ya Ditadi yina ke kuzwa lufulu ya ngolo.

²⁸⁸ O Klisto, bika munu, mutindu kisadi ya Nge, kufwa na Ditadi yayi, na Ditadi yayi ya Ndinga ya Nge. Mfumu Nzambi, bika mu telega, mutindu David, mpe binwani mvita ya ntama yina telemaka samu na David, bika mu telama samu na Ndinga yayi bubu yayi na yina mu ke mona ti ba me manga Yawu na ba-denomination. Ya kele awa na kiswamunu mosi ya fioti kisika mosi. O Nzambi, mu . . . Sala ti beto kuzwa ngolo mpe kikesa, mpe Mpeve-Santu, na kutelama, samu ti bangunga me kuma mpimpa mingi mpe mpimpa mingi.

Kasi beto bambuka moyo ntangu nionso ti Nge kele awa samu na kupelisa Mwinda. Na konso ngunga yina Nge zola, Nge lenda pelisa Mwinda, Tata. Na yawu beto ke sambila . . .

289 Mutindu Nge tubaka, “Beni kele Nsemo ya yinza.” Sala, Mfumu, ti Minda ya beto, yina kele samu na kisalu ya Nge, kulezima mingi na bayankaka, ti ba ke mona Nsemo ya Nsangu ya mbote mutindu beto ke zingila yawu, Mfumu, kilumbu na manima ya kilumbu, na kulakisaka na bawu Luzingu ya Yesu Klisto mutindu Yandi vwandaka na zulu ya ntoto; ya kufuluka na lembami mpe bumbote, kasi Ndinga vwandaka zinga kaka na nzila ya Yandi. Pesa yawu, Mfumu.

Na yina, beto ke tala na Nge, Muntu ya nene na buto ya mwinda na diboko. Nge ke simbaka yinza na diboko ya Nge. Nge ke simbaka bima nionso na diboko ya Nge, mpe ke simbidilaka yinza na Ndinga ya Nge.

O Tata, bika beto kuzwa Ndinga; Nge zola, lemvo ya Nge, Mfumu? Ti ya kuvwanda kimbangi mpe nsatu ya konso ntima na kati awa.

290 Tata, na yina beto ke yimba bankunga yayi... Mutindu David kuyimbaka bankunga, ya me kuma baprosesi. Ya vwandaka baprosesi, mpe Nge ndimaka yawu, mutindu baprosesi. Na yina beto ke yimba yawu, Mfumu, ti ya vwanda na kati ya bantima ya beto, mpe, na yina beto ke yimba, “Beto ke tambula na kati ya Nsemo yayi.” Ti ya kuvwanda, Mfumu.

Yayi kele Nsemo ya kitoko. Ya kele Ndinga. Ya kele Klisto ke zinga na kati ya beto. Ve yina Yandi vwandaka; yina Yandi kele, mpe, beto zaba yina Yandi vwandaka talisa kaka vwandaka yina Yandi kele. Mpe beto ke sambila, Tata, ti bantu ke bakula mpe ke tambula na kati ya Nsemo yayi ya kitoko mingi. Beto me lomba na Nkumbu ya Yesu.

291 Na ntangu beto ke bikana ya kutelema kaka na mwa ntangu fioti, mu zola ti beto nionso kuyimba.

292 Ntangu yayi na kati awa ya kele na ba-Presbytérien, ba-Méthodiste, Bakatolika. Yayi kele nkonga ya bantu ya kuvukana, na yina me tala ba-denomination.

293 Ntangu yayi beno bambuka moyo, ti ya zabana, ti mu ke na kuzonzila ve yimbi bantu na kati ya kungenga yayi. Kasi mu me siamisa yawu, na Biblia, ti ya kele kungenga. Kana ya vwandaka ve, Klisto ke sala mutindu Yandi silaka na kusala, na bawu. Beni me mona? Kasi bawu mangaka Yawu. Beni me mona? Mpe ntangu beno ke kuma kuna, yinki beno ke mona? “Kukuma ya dibuundu, kutanga credo.” Mpe yinki ya me kuma? Na kukumaka na nsuka ya nzila, beno ke tala ti ya vwandaka luvunu, maza ya luvunu.

Klisto kele Ndinga. Yandi kele Nsemo. Beni zinga ntangu yayi, na yina beno lenda zinga. Beni ke zinga samu na kima mosi.

294 Samu na yinki beno ke na kuzinga? Samu beno lenda kufwa. Beni nionso, samu na yinki beno ke salaka? Samu na kudya.

Samu na yinki beno ke kudyaka? Samu na kuzinga. Samu na yinki beno ke zingaka? Samu na kufwa.

Na yawu samu na yinki kuzinga ve samu na kuzinga? Samu na yinki kuzinga ve samu na kuzinga? Na yina, mutindu kaka beno lenda zinga kele kundima Ndinga. Samu ti, “Muntu ke zinga kaka na dimpa ve,” yina beto ke salaka awa na mutoki ya beto, “kasi na konso Ndinga yina ke basika na yinwa ya Nzambi.” Ntangu yayi Ndinga ya yinwa ya Nzambi me siamisama kaka awa na ntwala ya beto, na nzila ya Mpeve-Santu. Beno zinga na nzila ya Yawu, ve?

²⁹⁵ Ntangu yayi mu zola, na yina beto ke yimba dyaka yayi, ti beto nionso kutelama kaka na kisika ya beto, kutelemisa diboko mpe kusimba maboko ya muntu mosi, mpe kutuba, “Mpangi, beto tambula na kati ya Nsemo yayi,” na yina beto ke yimba *Tambula Na Nsemo*. Beno zola? Beno sambila samu na mosi na yankaka na yina beno ke tula maboko ya beno kintwadi, na yina beto ke yimba yawu kintwadi; na kukangaka meso ya beto, mutindu beto lenda.

Beto ke tambula na Nsemo, Nsemo mosi ya
kitoko mingi,
Ya ke kwizaka kisika ke lezima kinoko ya
kyadi;
Ke lezima pene-pene ya beto kilumbu mpe
mpimpa, (Nani Yandi kele?)
Yesu, Nsemo ya yinza.

Ntangu yayi beto telemisa maboko ya beto.

Beto ke tambula na Nsemo, ya kele Nsemo ya
kitoko mingi,
Beno kwiza kisika ke lezima kinoko ya kyadi;
Lezima na beto kilumbu mpe mpimpa,
Oh, Yesu, Nsemo ya yinza.

Beno kwiza beno nyonso basantu ya Nsemo,
beno tuba, (Yinki ya kele?)
Yesu, Nsemo ya yinza;
Kuna bangunga ya Mazulu ke wakana,
Yesu, Nsemo ya yinza.

Beto nionso, beto yimba yawu ntangu yayi.

Beto ke tambula na Nsemo, mpe ya kele Nsemo
ya kitoko mingi,
Beno kwiza kisika ke lezima kinoko ya kyadi;
Lezima na beto kilumbu mpe mpimpa,
Yesu, Nsemo ya yinza.

²⁹⁶ Na bayintu ya beto ya kukulumusa ntangu yayi. Beno bambuka moyo ntangu Israël vwandaka na nzyetolo ya bawu, vwanda kudya mani ya malu-malu konso kilumbu, bawu tambulaka na Nsemo ya Dikunzi ya Tiya. Dikunzi ya Tiya yina

vwandaka Yesu Klisto. Biblia ke tuba ti Yawu vwandaka. Mpe bubu yayi Yandi keke na beto; beto keke na Yawu. Beto zaba ti Yandi keke na beto, Dikunzi mosi ya Tiya, na kusalaka bima mutindu mosi yina Yandi salaka ntangu Yandi vwandaka awa na zulu ya ntoto, na kulungisa Ndinga ya Yandi.

²⁹⁷ Na yina beto ke kwenda awa, ti beto bambuka moyo, beto bumba nkunga yina na kati ya bantima ya beto na yina beto ke kwenda na bayinzo ya beto, mutindu bapine ke yimba nkunga. Ntete beno kudya madya ya beno ya nkokila, beno kulumusa yintu ya beno mpe beno tonda Nzambi na kufidisaka mwinda na kunata madya na zulu ya ntoto, samu na nzutu ya beno. Na yina beno tonda Nzambi na kufidisaka Nsemo ya kimpeve, Ndinga ya Yandi, ti Yandi lendaka pesa Madya na moyo. “Samu ti muntu ke zinga kaka na dimpa ve, kasi na konso Ndinga yina ke basika na yinwa ya Nzambi.”

²⁹⁸ Beno landila kaka na kuyimba nkunga yayi samu na beno mosi, na yinzo ya beno, na kati ya bantu ya beno, mpe beto kutana dyaka awa na pene ya ngunga ya sambanu na ndambu, na nkokila yayi, samu na bakalati ya bisambu mpe nionso yina. Beto ke mona beno na ntangu yina. Tii kuna, beno kulumusa bayintu ya beno.

²⁹⁹ Mu ke lomba na Mpangi Neville kana yandi lenda mata awa ntangu yayi, pasteur, mpe kukanga na mpova ya kisambu samu na beto.



YA KELE NA MUNTU AWA YINA LENDA PELISA MWINDA KNG63-1229M
(There Is A Man Here That Can Turn On The Light)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 29 ya Ngonda ya kumi na zole, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org